

二月邨園暖。桑閒戴勝飛。農夫春舊穀。蠶妾擣新衣。牛馬因風遠。鷄豚過社稀。黃昏林下路。鼓笛賽神歸。

題施山人野居

得道應無著。謀生亦不妨。春泥秧稻暖。夜火焙茶香。水巷風塵少。松齋日月長。高閑真是貴。何處覓侯王。

白樂天詩集卷十四

律詩

五言七言
凡九十六首

翰林中送獨孤二十七起居罷職出院

碧落重雲住。青冥放鶴還。銀臺向南路。從此到人間。

重尋杏園

忽憶芳時頻酌酒。卻尋醉處重徘徊。杏花結子春深後。誰解多情又獨來。

曲江獨行

自此後詩。在翰林中時作。

獨來獨去何人識。廐馬朝衣野客心。閒愛無風水邊坐。楊花不動樹陰陰。

同李十一醉憶元九

花時同醉破春愁。醉折花枝當酒籌。忽憶故人天際去。計程今日到梁州。

同錢員外題絕糧僧巨川

三十年來坐對山。唯將無事化人閒。齋時往往聞鐘笑。一食何如不食閒。

絕句代書贈錢員外

欲尋秋景閒行去。君病多慵我與孤。可惜今朝山最好。強能騎馬出來無。

晚秋有懷鄉中舊隱

天高風嫋嫋。鄉思繞關河。寥落歸山夢。殷勤採蕨歌。病添心寂寞。愁入鬢蹉跎。晚樹蟬鳴少。秋階日上多。長閒羨雲鶴。久別愧煙蘿。其奈丹墀上。君恩未報何。

禁中九日對菊花酒憶元九

元九云。不是花中偏愛。菊此花開盡更無花。

賜酒盈杯誰共持。宮花滿把獨相思。相思只傍花邊立。盡日吟君詠菊詩。

送王十八歸山寄題仙遊寺

曾於太白峯前住。數到仙遊寺裏來。黑水澄時潭底出。白雲破處洞門開。林閒暖酒燒紅葉。石上題詩掃綠苔。惆悵舊遊無復到。菊花時節羨君迴。

答張籍因以代書

憐君馬瘦衣裘薄。

許到江東訪鄙夫。

今日正閒天又暖。

可能扶病暫來無。

曲江早春

曲江柳條漸無力。

杏園伯勞初有聲。

好傍池邊下馬行。

見元九悼亡詩。因以此寄。

夜淚闇銷明月幌。

春腸遙斷牡丹庭。

人閒此病治無藥。

寒食夜

無月無燈寒食夜。

夜深猶立閣花前。

忽因時節驚年幾。

杏園花落時。招錢員外同醉。

近西數樹猶堪醉。

半落春風半在枝。

花園欲去去應遲。

正是風吹狼藉時。

今年況作江陵別。

重題西明寺牡丹

時元九在江陵

往年君向東都去。

曾歎花時君未迴。

惆悵花前又獨來。

只愁離別長如此。

不道明年花不開。

同錢員外禁中夜直

宮漏三聲知半夜。

好風涼月滿松筠。

此時閒坐寂無語。

禁中夜作書與元九

心緒萬端書兩紙。

欲封重讀意遲遲。

五聲宮漏初鳴後。

八月十五日夜禁中獨直對月憶元九

銀臺金闕夕沈沈。

獨宿相思在翰林。

三五夜中新月色。

渚宮東面煙波冷。

浴殿西頭鐘漏深。

猶恐清光不同見。

寄陳式五兄

年來白髮兩三莖。

憶別君時髮未生。

惆悵料君應滿鬢。

庾順之以紫霞綺遠贈以詩答之

千里故人心鄭重。

一端香綺紫氛氳。

開絨日映晚霞色。

爲褥欲裁憐葉破。

製裘將翦惜花分。

不如縫作合歡被。

送元八歸鳳翔

莫道岐州三日程。

其如風雪一身行。

與君況是經年別。

雨雪放朝因懷微之

歸騎紛紛滿九衢。

放朝三日爲泥塗。

不知雨雪江陵府。

詠懷

歲去年來塵土中。

眼看變作白頭翁。

如何辦得歸山計。

兩頃邨田一畝宮。

兩頃邨田一畝宮。

兩頃邨田一畝宮。

開微之江陵臥病以大通中散碧腹垂雲膏寄之因題四韻

已題一帖紅消散 又封一合碧雲英 憑人寄向江陵去 道路迢迢一月程

未必能治江上瘴 且圖遙慰病中情 到時想得君拈得 枕上開看眼暫明

酬錢員外雪中見寄

松雪無塵小院寒 閉門不似住長安 煩君想我看心坐 報道心空無可看

重酬錢員外

雪中重寄雪山偈 問答殷勤四句中 本立空名緣破妄 若能無妄亦無空

獨酌憶微之

時對所贈

獨酌花前醉憶君 與君春別又逢春 惆悵銀杯來處重 不曾盛酒勸閒人

微之宅殘牡丹

殘紅零落無人賞 雨打風摧花不全 諸處見時猶悵望 況當元九小亭前

新磨鏡

衰容常晚櫛 秋鏡偶新磨 一與清光對 方知白髮多 鬢毛從幻化 心地付頭陀

任意渾成雪 其如似夢何

感髮落二首

昔日愁頭白 誰知未白衰 眼看應落盡 無可變成絲

八月十五日夜聞崔大員外翰林獨直對酒翫月因懷禁中清景偶題是詩

秋月高懸空碧外 仙郎靜翫禁闌閒 歲中唯有今宵好 海內無如此地閒

皓色分明雙闕勝 清光深到九門關 遙聞獨醉還惆悵 不見金波照玉山

酬王十八見寄

秋思太白峯頭雪 晴憶仙遊洞口雲 未報皇恩歸未得 慙君為寄北山文

立春日酬錢員外曲江同行見贈

下直遇春日 垂鞭出禁闌 兩人攜手語 十里看山歸 柳色早黃淺 水紋新綠微

風光向晚好 車馬近南稀 機盡笑相顧 不驚鷓鴣飛

和錢員外青龍寺上方望舊山

舊峯松雪舊溪雲 悵望今朝遙屬君 共道使臣非俗吏 南山莫動北山文

宴周皓大夫光福宅

座上作

何處風光最可憐 妓堂階下砌臺前 軒車擁路光照地 絲管入門聲沸天

綠蔥不香饒桂酒 紅櫻無色讓花鈿 野人不敢求他事 唯借泉聲伴醉眠

惜牡丹花二首

一首翰林院北廳花下作一首新昌寶給事中宅南亭下作

白樂天詩集卷十四

惆悵階前紅牡丹。

晚來唯有兩枝殘。

明朝風起應吹盡。

夜惜衰紅把火看。

【二】

寂寞萎紅低向雨。

離披破豔散隨風。

晴明落地猶惆悵。

何況飄零泥土中。

答元奉禮同宿見贈

相逢俱歎不閉身。

直日常多齋日頻。

曉鼓一聲分散去。

明朝景景屬何人。

答馮待御見贈

謬入金門待玉除。

煩君問我意何如。

蟠木詎堪明主用。

龍禽徒與故人疎。

苑花似雪同隨輦。

宮月如眉伴直廡。

淺薄求賢思自代。

嵇康莫寄絕交書。

上巳日恩賜曲江宴會卽事

賜歡仍許醉。

此會與如何。

翰苑主恩重。

曲江春意多。

共道昇平樂。

元和勝永和。

夜惜禁中桃花因懷錢員外

前日歸時花正紅。

今夜宿時枝半空。

坐惜殘芳君不見。

風吹狼藉月明中。

答劉戒之早秋別墅見寄

涼風木槿籬。

暮雨槐花枝。

併起新秋思。

爲得故人詩。

避地烏擇木。

入朝魚在池。

城中與山下。喧靜闌相思。

涼夜有懷

念別感時節。

早蛩聞一聲。

風簾夜涼入。

露篔秋意生。

關凝無限思。

起傍藥欄行。

秋思

病眠夜少夢。

閒立秋多思。

寂寞餘雨晴。

蕭條早寒至。

何況鏡中年。

又過三十二。

禁中聞蛩

悄悄禁門閉。

夜深無月明。

西窗獨聞坐。

滿耳新蛩聲。

秋蟲

切切聞夜下。

嗶嗶深草裏。

秋天思婦心。

雨夜愁人耳。

春夜喜雪懷有王二十二

夜雪有佳趣。

幽人出書帷。

微寒生枕席。

輕素封階墀。

明宜滅燭後。

淨愛褰簾時。

意引曙色早。

庭銷春氣遲。

酬和元九東川路詩十二首

白樂天詩集卷十四

十二篇皆因新境追憶舊事不能一一曲敘。但隨而和之。唯予與元知之耳。

駱口驛舊題詩

拙詩在壁無人愛。鳥汗苔侵文字殘。唯有多情元侍御。繡衣不惜拂塵看。

南秦雪

往歲曾爲西邑吏。慣從駱口到南秦。三時雲冷多飛雪。二月山寒少有春。

我思舊事猶惆悵。君作初行定苦辛。仍賴愁猿寒不叫。若聞猿叫更愁人。

山枇杷花二首

萬重青嶂蜀門口。一樹紅花山頂頭。春盡憶家歸未得。低紅如解替君愁。

【一】

葉如裙色碧稍淺。花似芙蓉紅粉輕。若使此花兼解語。推囚御史定違程。

江樓月

嘉陵江曲曲江池。明月雖同人別離。一宵光景潛相憶。兩地陰晴遠不知。

誰料江邊懷我夜。正當池畔望君時。今朝共語方同悔。不解多情先寄詩。

亞枝花

山郵花木似平陽。愁殺多情驄馬郎。還似昇平池畔坐。低頭向水自看粧。

江上笛

江上何人夜吹笛。聲聲似憶故園春。此時聞者堪頭白。況是多愁少睡人。

嘉陵夜有懷二首

露濕墻花春意深。西廊月上半床陰。憐君獨臥無言語。惟我知君此夜心。

【二】

不明不闌朦朧月。非暖非寒慢慢風。獨臥空牀好天氣。平明閒事到心中。

夜深行

百牢關外夜行客。三殿角頭宵直人。莫道近臣勝遠使。其如同是不閒身。

望驛臺 三月三十日

靖安宅裏當窗柳。望驛臺前撲地花。兩處春光同日盡。居人思客客思家。

江岸梨花

梨花有意綠和葉。一樹江頭惱殺君。最似嬌閨少年婦。白粧素袖碧紗裙。

感元九悼亡詩因爲代答三首

答謝家最小偏憐女

嫁得梁鴻六七年。耽書愛酒日高眠。雨荒春圃唯生草。雪壓朝厨未有煙。

身病憂來綠女少。家貧忘卻爲夫賢。誰知厚俸今無分。枉向秋風吹紙錢。

答騎馬入空臺

君入空臺去。朝往暮還來。我入泉臺去。泉門無復開。鰥夫仍繫職。稚女未勝哀。寂寞咸陽道。家人覆墓廻。

答山驛夢

入君旅夢來千里。閉我幽魂欲二年。莫忘平生行坐處。後堂階下竹叢前。

和元九與呂二同宿話舊感贈

見君新贈呂君詩。憶得同年行樂時。爭入杏園齊馬首。潛過柳曲鬪蛾眉。

八人雲散俱遊宦。七度花開盡別離。聞道秋娘猶且在。至今時復問微之。

憶元九

渺渺江陵道。相思遠不知。近來文卷裏。半是憶君詩。

蕭員外寄新蜀茶

蜀茶寄到但驚新。渭水煎來始覺珍。滿甌似乳堪持斝。況是春深酒渴人。

寄上大兄

已後詩在
郗林居作

秋鴻過盡無書信。病戴紗巾強出門。獨上荒臺東北望。日西愁立到黃昏。

病中哭金鑾子

子名

豈料吾方病。翻悲汝不全。臥驚從枕上。扶哭就燈前。有女誠爲累。無兒豈免憐。病來纔十日。養得已三年。慈淚隨聲迸。悲傷遇物牽。故衣猶架上。殘藥尙頭邊。送出深邨巷。看封小墓田。莫言三里地。此別是終天。

寄內

桑條初綠卽爲別。柿葉半紅猶未歸。不如邨婦知時節。解爲田夫秋擣衣。

病氣

自知氣發每因情。情在何由氣得平。若問病根深與淺。此身應與病齊生。

歎元九

不入城中來五載。同時班列盡官高。何人牢落猶依舊。唯有江陵元士曹。

眼暗

早年勤倦看書苦。晚歲悲傷出淚多。眼損不知都自取。病成方悟欲如何。夜昏乍似燈將滅。朝闇長疑鏡未磨。千藥萬方治不得。唯應閉目學頭陀。

得袁相書

穀苗深處一農夫。面黑頭斑手把鋤。何意使人猶識我。就田來送相公書。

病中作

病來城裏諸親故，厚薄親疎心總知。

唯有詩章於我分。

深於同在翰林時。

感化寺見元九劉三十二題名處。

微之謫去千餘里。

太白無來十一年。

今日見名如見面。

塵埃壁上破窗前。

遊悟真寺廻山下別張殷衡。

世緣未了住不得。

孤負青山心共知。

愁君又入都門去。

即是紅塵滿眼時。

邨居寄張殷衡。

金氏邨中一病夫。

生涯濳落性靈迂。

唯看老子五千字。

不蹋長安十二衢。

藥銚夜傾殘酒暖。

竹床寒取舊氈鋪。

聞君欲發江東去。

能到茅庵訪別無。

病中得樊大書。

荒邨破屋經年臥。

寂絕無人問病身。

唯有東都樊著作。

至今書信尙殷勤。

開元九詩書卷。

紅箋白紙兩三束。

半是君詩半是書。

經年不展緣身病。

今日閒看生蠹魚。

畫臥

抱枕無言語。

空房獨悄然。

誰知盡日臥。

非病亦非眠。

夜坐

庭前盡日立到夜。

燈下有時坐徹明。

此情不語何人會。

時復長吁一兩聲。

暮立

黃昏獨立佛堂前。

滿地槐花滿樹蟬。

大抵四時心總苦。

就中腸斷是秋天。

有感

絕絃與斷絲。

猶有卻續時。

唯有衷腸斷。

無應續得期。

答友問

似玉童顏盡。

如霜病鬢新。

莫驚身頓老。

心更老於身。

邨夜

霜草蒼蒼蟲切切。

邨南邨北行人絕。

獨出門前望野田。

月明蕎麥花如雪。

聞蟲

聞蟲唧唧夜繅繅。

況是秋陰欲雨天。

猶恐愁人暫得睡。

聲聲移近臥床前。

寒食夜有懷

寒食非長非短夜。

春風不熟不寒天。

可憐時節堪相憶。

何況無燈各早眠。

贈內

漠漠關苦新雨地。 微微涼露欲秋天。

莫對月明思往事。

損君顏色減君年。

得錢舍人書問眼疾。

春來眼關少心情。 點盡黃連尙未平。

唯得君書勝得藥。

開緘未讀眼先明。

還李十一馬。

傳語李君勞寄馬。 病來唯拄杖扶身。

縱擬強騎無出處。

卻將牽與趁朝人。

九日寄行簡。

摘得菊花攜得酒。 遠邨騎馬思悠悠。

下邨田地平如掌。

何處登高望梓州。

夜坐

斜月入前楹。 迢迢夜坐情。 梧桐上階影。

蟋蟀近牀聲。 曙傍窗閒至。 秋從簾上生。

感時因憶事。 不寢到雞鳴。

邨居二首

田園莽蒼經春早。 籬落蕭條盡日風。

若問經過談笑者。 不過田舍白頭翁。

【二】

門閉仍逢雪。 厨寒未起煙。 貧家重寥落。 半爲日高眠。

早春

雪散因和氣。 冰開得暖光。 春銷不得處。 唯有鬢邊霜。

王昭君二首 時年十七

滿面胡沙滿鬢風。

眉銷殘黛臉銷紅。

愁苦辛勤憔悴盡。

如今卻似畫圖中。

【一】

漢使卻迴憑寄語。 黃金何日贖蛾眉。

君王若問妾顏色。

莫道不如宮裏時。

白樂天詩集卷十五

律詩

五百七首 凡九十九首

渭邨退居寄禮部崔侍郎翰林錢舍人詩一百韻

聖代元和歲。 閒居渭水陽。 不才甘命舛。 多幸遇時康。 朝野分倫序。 賢愚定否臧。 重文疎卜式。 尙少棄馮唐。 由是推天運。 從茲樂性場。 籠禽放高翥。 霧豹得深藏。 世慮休相擾。 身謀且自強。 猶須務衣食。 未免事農桑。 蘿草通三徑。 開田占一坊。 畫屏扁白版。 夜確掃黃梁。 隙地治場圃。 閒時糞土疆。 枳籬編刺夾。 薤藎擊科秧。 稽力嫌身病。 農心願歲穰。 朝衣典杯酒。 佩劍博牛羊。 因倚栽松錘。 饑提採蕨筐。

引泉來後湖。移竹下前岡。生計雖勤苦。家資甚渺茫。塵埃常滿甌。錢帛少盈囊。
 弟病仍扶杖。妻愁不出房。傳衣念襤褸。舉案笑糟糠。犬吠邨香闌。蟬鳴織婦忙。
 納租看縣帖。輸粟問軍倉。夕歇攀邨樹。秋行遠野塘。雲容陰慘澹。月色冷悠揚。
 蕎麥鋪花白。棠梨開葉黃。早寒風撼撼。新霽月蒼蒼。園菜迎霜死。庭蕪過雨荒。
 簷空愁宿燕。壁闇思啼螿。眼為看書損。肱因運甕傷。病骸渾似木。老鬢欲成霜。
 少睡知年長。端憂覺夜長。舊遊多廢忘。往事偶思量。忽憶煙霄路。常陪劍履行。
 登朝思檢束。入閣學趨跄。命偶風雲會。恩覃雨露霽。沾枯發枝葉。磨鈍起鋒鋟。
 崔閔連鑿鷲。錢兄接翼翔。齊竽混韶夏。燕石廁琳琅。同日升金馬。分宵直未央。
 共詞加寵命。合表謝恩光。駝馬驕初跨。天廚味始嘗。朝晡頒餅餌。寒暑賜衣裳。
 對秉鵝毛筆。俱含雞舌香。青緘金薄絮。朱裏幕高張。晝食恆連案。宵眠每並床。
 差肩承詔旨。連署進封章。起草偏同視。疑文輒共詳。減私容黠賈。窮理析毫芒。
 便共輸肝膽。何曾異肺腸。慎微參石奮。決密學張湯。禁闈青交瑣。宮垣紫界牆。
 井欄排菡萏。簷瓦闌鴛鴦。樓額題鳩鵲。池心浴鳳凰。風枝萬年動。溫樹四時芳。
 宿露凝金掌。晨暉上璧璫。砌筠塗綠粉。庭果滴紅漿。曉從朝興慶。春陪宴柏梁。
 傳呼鞭索索。拜舞珮鏘鏘。仙仗環雙闕。神兵闢兩廡。火翻紅尾旆。冰卓白竿槍。

混漢經魚藻。深沈近浴堂。分庭皆命婦。對院即儲皇。貴主冠浮動。親王帶鬧裝。
 金鈿相照耀。朱紫閉熒煌。毳簇桃花綺。歌巡竹葉觴。窪銀中貴帶。昂黛內人妝。
 賜褱東城下。頽脯曲水傍。尊鼻分聖酒。妓樂借仙倡。淺酌看紅藥。徐吟把綠楊。
 宴迴過御陌。行歇入僧房。白鹿原東郭。青龍寺北廊。望春花景暖。避暑竹風涼。
 下直閒如社。尋芳醉似狂。有時還後到。無處不相將。雞鶴初雖雜。蕭蘭久乃彰。
 來燕隗貴重。去魯孔恂惶。聚散期難定。飛沈勢不常。五年同晝夜。一別似參商。
 屈折孤生竹。銷摧百鍊鋼。途窮任憔悴。道在肯徬徨。尚念遺簪折。仍憐病雀蒼。
 郵寒分賜帛。救餒減餘糧。藥物來盈囊。書題寄滿箱。殷勤翰林主。珍重禮闈郎。
 煦沫誠多謝。搏扶豈所望。提攜勞氣力。吹簾不飛揚。拙劣才何用。龍鍾分自當。
 妝媿徒費黛。磨甌詎成璋。習隱將時背。千名與道妨。外身宗老氏。齊物學蒙莊。
 疎放遺千慮。愚蒙守一方。樂天無怨歎。倚命不勸勸。憤懣胸須豁。交加臂莫攘。
 珠沈猶是寶。金躍未為祥。泥尾休搖掉。灰心罷激昂。漸閒親道友。因神事醫王。
 息亂歸禪定。存神入坐亡。斷癡求慧劍。濟苦得慈航。不動為吾志。無何是我鄉。
 可憐身與世。從此兩相忘。

酬盧秘書二十韻

時初奉詔除
贊善大夫

謬歷文場選，慙非翰苑才。雲霄高暫致，毛羽弱先摧。誠分忘軒冕，知歸返草萊。
 杜陵書積蠹，豐獄劔生苔。晦壓鳴雞雨，春驚震蟄雷。舊恩收墜履，新律動寒灰。
 鳳詔容徐起，鷓行許重陪。衰顏雖拂拭，蹇步尚徘徊。睡少鐘偏警，行遲漏苦催。
 風霜趁朝去，雨雪拜陵迴。上感君猶念，傍慙友或推。石頭鑄費匠，女醜嫁勞媒。
 倏忽青春度，奔波白日頹。性將時共背，病與老俱來。聞有蓬壺客，知懷杞梓材。
 世家標甲第，官職滯麟臺。筆盡鉛黃點，詩成錦繡堆。嘗思豁雲霧，忽喜訪塵埃。
 心爲論文合，眉因勸善開。不勝珍重意，滿袖寫瓊瑰。

題盧秘書夏日新栽竹二十韻

湘竹初封植，盧生此考槃。久持霜節苦，新託露根難。等度須當砌，疎稠要滿欄。
 買憐分薄俸，栽稱作閒官。葉剪藍羅碎，莖抽玉瑄端。幾聲清浙瀝，一簇綠檀欒。
 未夜青嵐入，先秋白露團。拂肩搖翡翠，斝手弄琅玕。韻透窗風起，陰鋪砌月殘。
 炎天聞覺冷，窄地見疑寬。稍動勝搖扇，枝低好掛冠。碧籠煙罽翠，珠灑雨珊珊。
 晚簾晴雲展，陰芽蟄虺蟠。愛從抽馬策，惜未截魚竿。松韻徒煩聽，桃夭不足觀。
 梁慙當家杏，臺陋本司蘭。古詩云：盧家園家杏爲梁。又蘭書府即蘭臺也。撐撥詩人興，句牽酒客歡。靜連盧簟滑，
 涼拂葛衣單，豈止消時暑。應能保歲寒，莫同凡草木。一種夏中看。

渭邨酬李二十見寄

百里音書何太遲，暮秋把得暮春詩。柳條綠日君相憶，梨葉紅時我始知。
 莫歎學官貧冷落，猶勝邨客病支離。形容意緒遙看取，不似華陽觀裏時。

初授贊善大夫早朝寄李二十助教

病身初謁青宮日，衰貌新垂白髮年。寂寞曹司非熱地，蕭條風雪是寒天。
 遠坊早起常侵鼓，瘦馬行遲苦費鞭。一種共君官職冷，不如猶得日高眠。

欲與元八卜鄰先有是贈

平生心迹最相親，欲隱牆東不爲身。明月好同三徑夜，綠楊宜作兩家春。
 每因暫出猶思伴，豈得安居不擇鄰。何獨終身數相見，子孫長作隔牆人。

遊城南曹元九李二十晚歸

老遊春飲莫相違，不獨花稀人亦稀。更勸殘杯看日影，猶應趁得鼓聲歸。
 廣宣上人以應制詩見示因以贈之詔許上人居安國寺紅樓院以詩供奉

道林談論惠休詩，一到人天便作師。香積筵承紫泥詔，昭陽歌唱碧雲詞。
 紅樓許住請銀鑰，翠輦陪行踏玉墀。惆悵甘泉曾侍從，與君前後不同時。

重過秘書舊房因題長句時爲貴善大夫

閣前下馬思徘徊。第二房門手自開。昔爲白面書郎去。今作蒼頭贊善來。吏人不識多新補。松竹相親是舊栽。應有題墻名姓在。試將衫袖拂塵埃。重到城七絕句

見元九

容貌一日減一日。心情十分無九分。每逢陌路猶嗟歎。何況今朝是見君。

高相宅

青苔故里懷恩地。白髮新生抱病身。涕淚雖多無哭處。永寧門館屬他人。

張十八

諫垣幾見遷遺補。憲府頻聞轉殿監。獨有詠詩張太祝。十年不改舊官銜。

劉家花

劉家牆上芳還發。李十門前草又春。處處傷心心始悟。多情不及少情人。

裴五

莫怪相逢無笑語。感今思舊戟門前。張家伯仲偏相似。每見清揚一惘然。

仇家酒

年年老去歡情少。處處春來感事深。時到仇家非愛酒。醉時心勝醒時心。

恆寂師

舊遊分散人零落。如此傷心事幾條。會逐禪師坐禪去。一時滅盡定中消。

靖安北街贈李二十

榆莢拋錢柳展眉。兩人竝馬語行遲。還似往年安福寺。共君私試卻迴時。

重傷小女子

學人言語凭牀行。嫩似花房脆似瓊。纔知恩愛迎三歲。未辯東西過一生。

汝異下殤應殺禮。吾非上聖詎忘情。傷心自歎鳩巢拙。長墮春雛養不成。

過顏處士墓

向墳通徑沒荒榛。滿室詩書積閭塵。長夜肯教黃壤曉。悲風不許白楊春。

簞瓢顏子生仍促。布被黔婁死更貧。未會悠悠上天意。惜將富壽與何人。

題周皓大夫新亭子二十二韻

東道常爲主。南亭別待賓。規模何日創。景致一時新。廣砌羅紅藥。疎窗蔭綠筠。鏤開賓閣曉。梯上妓樓春。置醴寧三爵。加箋過八珍。茶香飄紫筍。膾縷落紅鱗。輝赫車輿鬧。珍奇鳥獸馴。獼猴看握馬。鸚鵡喚家人。錦額簾高捲。銀花盞慢巡。

勸嘗光祿酒。許看洛川神。斂翠凝歌黛。流香動舞巾。裙翻繡鷓鴣。梳陷銅麒麟。
 笛怨音含楚。筇嬌語帶秦。侍兒催畫燭。醉客吐文茵。投轄多連夜。鳴珂便達晨。
 入朝紆紫綬。待漏擁朱輪。貴介交三事。光榮照四鄰。甘濃將奉客。穩煖不緣身。
 十載歌鐘地。三朝節鉞臣。愛才心偶儻。敦舊禮殷勤。門以招賢盛。家因好事貧。
 始知豪傑意。富貴爲交親。

賦得聽邊鴻

驚風吹起塞鴻羣。半拂平沙半入雲。爲問昭君月下聽。何如蘇武雪中聞。

見楊弘貞詩賦因題絕句以自諭

賦句詩章妙入神。未年三十卽無身。常嗟薄命形憔悴。若比弘真是幸人。

病中早春

今朝枕上覺頭輕。強起增前試脚行。羶膩斷來無氣力。風痰惱得少心情。

煖銷霜瓦津初合。寒減冰渠凍不成。唯有愁人鬢閒雪。不隨春盡逐春生。

送人貶信州判官

地僻山深古上饒。土風貧薄道程遙。不唯遷客須洒屑。見說居人也寂寥。

溪畔毒沙藏水弩。城頭枯樹下山魘。若於此郡爲卑吏。刺史廳前又折腰。

曲江醉後贈諸親故

郭東丘墓何年客。江畔風光幾日春。只合殷勤逐杯酒。不須疎索向交親。

中天或有長生藥。下界應無不死人。除卻醉來開口笑。世閒何事更關身。

和元八侍御升平新居四絕句時方與元八下鄉

看花屋。忽驚映樹新開屋。卻似當簷故種花。可惜年年紅似火。今春始得屬元家。

累土山。堆土漸高山意出。終南移入戶庭閒。玉峯藍水應惆悵。恐見新山忘舊山。

高亭。亭脊太高君莫拆。東家畱取當西山。好看落日斜銜處。一片春風映半環。

松樹。白金換得青松樹。君既先栽我不栽。幸有西風易憑仗。夜深偷送好聲來。

醉後卻寄元九。蒲池邨裏勿勿別。澧水橋邊兀兀迴。行倒城門殘酒醒。萬重離恨一時來。

重寄一作重寄元九。重寄一作重寄元九。

蕭散弓驚鷹，分飛劍化龍。悠悠天地內，不死會相逢。

李十一舍人松園飲小酌酒得元八侍御詩，敍云在臺中推院有物獄之苦，卽事書懷因酬四韻。

愛酒舍人開小酌。

能文御史寄新詩。

亂松園裏醉相憶。

古柏廳前忙不知。

早夏我當逃暑日。

晚衙君是慮囚時。

唯應清夜無公事。

新草亭中好一期。

重到華陽觀舊居。

憶昔初年三十二。

當時秋思已難堪。

若爲重入華陽院。

病鬢愁心四十三。

答勸酒

莫怪近來都不飲。

幾回因醉卻沾巾。

誰料平生狂酒客。

如今變作酒悲人。

題王侍御池亭

朱門深鎖春池滿。

岸落薔薇水浸莎。

畢竟林塘誰是主。

主人來少客來多。

聽水部吳員外新詩，因贈絕句。

朱紱仙郎白雪歌。

和人雖少愛人多。

明朝說向詩家道。

水部如今不姓何。

雨夜憶元九

天陰一日便堪愁。

何況連宵雨不休。

一種雨中君最苦。

偏梁閣道向通州。

雨中攜元九詩訪元八侍御

微之詩卷憶同開。

暇日多應不入臺。

好句無人堪共詠。

衝泥蹋水就君來。

贈楊秘書巨源

楊嘗有贈盧洛州詩云三刀夢益州一箭取遼城由是知名

早聞一箭取遼城。

相識雖新有故情。

清句三朝誰是敵。

白鬚四海半爲兄。

貧家薔草時時入。

瘦馬尋花處處行。

不用更教詩過好。

折君官職是聲名。

和武相公感韋令公舊池孔雀

深字

索寞少顏色。

池邊無主禽。

難收帶泥翅。

易結著人心。

放歸飛不得。

雲海故巢深。

頂鬢落殘碧。

尾花銷閫金。

寄生衣與微之，因題封上。

淺色縠衫輕似霧。

紡花紗袴薄於雲。

莫嫌輕薄但知著。

猶恐通州熱殺君。

白牡丹

白花冷淡無人愛。

亦占芳名道牡丹。

應似東宮白贊善。

被人還喚作朝官。

夢舊

別來老大苦修道。

鍊得離心成死灰。

平生憶念消磨盡。

昨夜因何入夢來。

戲題盧祕書新移薔薇

風動翠條腰。腰娜。露垂紅夢淚闌干。

移他到此須爲主。

不別花人莫使看。

曲江夜歸聞元八見訪。

自入臺來見面稀。班中遙得揖容輝。

早知相憶來相訪。

悔待江頭明月歸。

苦熱題板寂師禪室。

人人避暑走如狂。獨有禪師不出房。

可是禪房無熱到。

但能心靜即身涼。

微之到通州日授館未安見塵壁閒有數行字讀之即僕舊詩其落句

云綠水紅蓮一朵開千花百草無顏色然不知題者何人也微之吟歎

不足因綴一章兼錄僕詩本同寄省其詩乃是十五年前初及第時贈

長安妓人阿軟絕句繙思往事杳若夢中懷舊感今因酬長句

十五年前似夢遊。

曾將詩句結風流。

偶助笑歌嘲阿軟。

可知傳誦到通州。

昔教紅袖佳人唱。

今遣青衫司馬愁。

惆悵又聞題處所。

雨淋江館破墻頭。

得微之到官書備知通州之事悵然有感因成四章

來書子細說通州。

州在山根峽岸頭。

四面千重火雲合。

中心一道瘴江流。

蟲蛇白晝攔官道。

蚊蚋黃昏撲郡樓。

何罪遣君居此地。

天高無處問來由。

【二】

匠匠巖山萬仞餘。

人家應似甌中居。

寅年離下多逢虎。

亥日沙頭始賣魚。

衣斑梅雨長須髮。

米澀畝田不解鋤。

努力安心過三考。

已曾愁殺李尙書。

【三】

人稀地僻醫巫少。

夏旱秋霖瘴瘧多。

老去一身須愛惜。

別來四體得如何。

侏儒飽笑東方朔。

惹草讒憂馬伏波。

莫遣沈愁結成病。

時時一唱澀纓歌。

【四】

通州海內恹惶地。

司馬人閒冗長官。

傷鳥有弦驚不定。

臥龍無水動應難。

劔埋獄底誰深掘。

松偃霜中盡冷看。

舉目爭能不惆悵。

高車大馬滿長安。

病中答招飲者

願我鏡中悲白髮。

儘君花下醉青春。

不緣眼痛兼身病。

可是樽前第二人。

燕子樓三首并序

徐州故張尙書有愛妓曰盼盼善歌舞雅多風態予爲校書郎時遊徐泗閒張尙書宴予酒酣出盼盼以佐歡歡甚予因贈詩云醉嬌勝不得風媚牡丹花盡歡而去爾後絕不相聞迨茲僅一紀矣昨日司動員外郎張仲素續之訪予因吟新詩有燕子樓三首詞甚婉麗詰其由爲盼盼作也續之從事武寧軍累年頗知盼盼始末云尙書既沒歸葬東洛而

彭城有張氏舊第，第中有小樓，名燕子。盼盼念舊愛而不嫁，居是樓十餘年，幽獨塊然，于今尚在。予愛續之新詠，感彭城舊遊，因同其題作三絕句。

滿窗明月滿簾霜，被冷燈殘拂臥牀。燕子樓中霜月夜，秋來只爲一人長。

【二】

銅盃羅衫色似煙，幾回欲著卽潸然。自從不舞霓裳曲，疊在空箱十一年。

【三】

今春有客洛陽回，曾到尙書墓上來。見說白楊堪作柱，爭教紅粉不成灰。

感故張僕射諸妓

黃金不惜買蛾眉，揀得如花三四枝。歌舞教成心力盡，一朝身去不相隨。

初貶官過望秦嶺

自此後詩。江州路上作。

草草辭家憂後事，遲遲去國問前途。望秦嶺上回頭立，無限秋風吹白鬚。

藍橋驛見元九詩

詩中云。江陵歸時逢春雪。

藍橋春雪君歸日，秦嶺秋風我去時。每到驛亭先下馬，循牆遠柱覓君詩。

韓公堆寄元九

韓公堆北瀾西頭，冷雨涼風拂面秋。努力南行少惆悵，江州猶似勝通州。

發商州

商州館裏停三日，待得妻孥相逐行。若比李三猶自勝，兒啼婦哭不聞聲。

武關南見元九題山石播花見寄

往來同路不同時，前後相思兩不知。行過關門三四里，播花不見見君詩。

紅鸚鵡

商山路逢

安南遠進紅鸚鵡，色似桃花語似人。文章辯慧皆如此，籠檻何年出得身。

題四皓廟

臥逃秦亂起安劉，舒卷如雲得自由。若有精靈應笑我，不成一事謫江州。

罷藥

自學坐禪休服藥，從他時復病沈沈。此身不要全強健，強健多生人我心。

白鷺

人生四十未全衰，我爲愁多白髮垂。何故水邊雙白鷺，無愁頭上亦垂絲。

襄陽舟夜

下馬襄陽郭，移舟漢陰驛。秋風截江起，寒浪連天白。本是多愁人，復此風波夕。

江夜舟行

煙澹月濛濛。舟行夜色中。江鋪滿槽水。帆展半檣風。叫曙嗷嗷鴈。啼秋唧唧蟲。只應催北客。早作白鬚翁。

紅藤杖

交親過滄別。車馬到江廻。唯有紅藤杖。相隨萬里來。

江上吟元八絕句

大江深處月明時。一夜吟君小律詩。應有水仙潛出聽。翻將唱作步虛詞。

途中感秋

節物行搖落。年顏坐變衰。樹初黃葉日。人欲白頭時。鄉國程程遠。親朋處處辭。唯憐病與老。一步不相離。

登郢州白雪樓

白雪樓中一望鄉。青山簇簇水茫茫。朝來渡口逢京使。說道煙塵近洛陽。

舟夜贈內

三聲猿後垂鄉淚。一葉舟中載病身。莫凭水窗南北望。月明月闇總愁人。

逢舊

我梳白髮添新恨。君掃青蛾減舊容。應被傍人怪惆悵。少年離別老相逢。

白口阻風十日

洪濤白浪塞江津。處處遭迴事事遲。世上方為失途客。江頭又作阻風人。

魚蝦遇雨腥盈鼻。蚊蚋和煙瘴滿身。老大光陰能幾日。等閒白口坐經旬。

浦中夜泊

暗上江隄還獨立。水風霜氣夜稜稜。回看深浦停舟處。蘆荻花中一點燈。

盧侍御與崔評事爲予於黃鶴樓置宴宴罷同望

江邊黃鶴古時樓。勞置華筵待我遊。楚思淼茫雲水冷。商聲清脆管絃秋。

白花浪濺頭陀寺。紅葉林籠鸚鵡洲。總是平生未行處。醉來堪賞醒堪愁。

舟中讀元九詩

把君詩卷燈前讀。詩盡燈殘天未明。眼痛滅燈猶闌坐。逆風吹浪打船聲。

舟行阻風寄李十一舍人

扁舟厭泊煙波上。輕策閒尋浦嶼閒。虎踞青泥稠似印。風吹白浪大於山。

且愁江郡何時到。敢望京都幾歲還。今日料君朝退後。迎寒新耐煖開顏。

雨中題衰柳

濕屈青條折。寒飄黃葉多。不知秋雨意。更遣欲如何。

題王處士郊居

半依雲渚半依山。

愛此令人不欲還。

負郭田園八九頃。

向陽茅屋兩三間。

寒松縱老風標在。

野鶴雖飢飲啄閒。

一臥江邨來早晚。

著書盈帙鬢毛斑。

歲晚旅望

朝來暮去星霜換。

陰慘陽舒氣序牽。

萬物秋霜能壞色。

四時冬日最凋年。

煙波半露新沙地。

鳥雀羣飛欲雪天。

向晚蒼蒼南北望。

窮陰旅思兩無邊。

晏坐閒吟

昔爲京洛聲華客。

今作江湖潦倒翁。

意氣銷磨羣動裏。

形骸變化百年中。

霜侵殘鬢無多黑。

酒伴衰顏只暫紅。

賴學禪門非想定。

千愁萬念一時空。

題李山人

厨無煙火室無妻。

籬落蕭條屋舍低。

每日將何療飢渴。

井華雲粉一刀圭。

讀莊子

去國辭家誦異方。

中心自怪少憂傷。

爲尋莊子知歸處。

認得無何是本鄉。

江樓偶宴贈同座

南浦閒行罷。

西樓小宴時。

望湖凭檻久。

待月放杯遲。

相逢且同樂。

何必舊相知。

江果嘗盧橘。

山歌聽竹枝。

放言五首并序

九在江陵時有放言長句詩五首韻高而體律意古而詞新予每詠之甚覺有味雖前輩深於詩者未有此作唯李頎有云濟水至清河自濁周公大聖接輿狂斯句近之矣予出佐潯陽未屆所任舟中多暇江上獨吟因綴五篇以續其意耳

【一】

朝真暮僞何人辯。

古往今來底事無。

但愛滅生能詐聖。

可知靴子解伴愚。

【二】

草螢有耀終非火。

荷露雖圓豈是珠。

不取燔柴兼照乘。

可憐光彩亦何殊。

【三】

世途倚伏都無定。

塵網牽纏卒未休。

禍福迴還車轉轂。

榮枯反覆手藏鉤。

【四】

贈君一法決狐疑。

不用鑽龜與祝蓍。

試玉要燒三日滿。

辨材須待七年期。

周公恐懼流言日。

王莽謙恭未篡時。

向使當時身便死。

一生真僞復誰知。

誰家第宅成還破。

何處親賓哭復歌。

昨日屋頭堪炙手。

今朝門外好張羅。

北邙未省畱閒地。

東海何曾有定波。

莫笑賤貧誇富貴。

共成枯骨爾如何。

【五】

泰山不要欺毫末。

顏子無心羨老彭。

松樹千年終是朽。

槿花一日自爲榮。

何須戀世常憂死。

亦莫嫌身漫厭生。

生去死來都是幻。

幻人哀樂繫何情。

歲暮道情二首

壯日苦曾驚歲月。

長年都不惜光陰。

爲學空門平等法。

先齊老少死生心。

【二】

半故青衫半白頭。

雪風吹面上江樓。

禪功自見無人覺。

合是愁時亦不愁。

讀李杜詩集因題卷後

翰林江左日。

員外劔南時。

不得高官職。

仍逢苦亂離。

暮年逋客恨。

浮世謫仙悲。

吟詠流千古。

聲名動四夷。

文場供秀句。

樂府待新詞。

天意君須會。

人間要好詩。

強酒

若不坐禪銷妄想。

卽須吟醉放狂歌。

不然秋月春風夜。

爭那閒思往事何。

獨樹浦雨夜寄李六郎中

忽憶兩家同里巷。

何曾一處不追隨。

閒遊預算分朝日。

靜語多同待漏時。

花下放狂衝黑飲。

燈前起坐徹明棋。

可知風雨孤舟夜。

蘆葦叢中作此詩。

聽崔七妓人箏

花臉雲鬢坐玉樓。

十三絃裏一時愁。

憑君向道休彈去。

白盡江州司馬頭。

望江州

江廻望見雙華表。

知是潯陽西郭門。

猶去孤舟三四里。

水煙沙雨欲黃昏。

初到江州

潯陽欲到思無窮。

庾亮樓南溢口東。

樹木凋疎山雨後。

人家低濕水煙中。

菰蔣餒馬行無力。

蘆荻編房臥有風。

遙見朱輪來出郭。

相迎勞動使君公。

醉後題李馬二妓

行搖雲鬢花鈿飾。

應似霓裳趁管絃。

豔動舞裙渾是火。

愁凝歌黛欲生煙。

有風縱道能迴雪。

無水何由忽吐蓮。

疑是兩般心未決。

雨中神女月中仙。

盧侍御小妓乞詩座上畱贈

鬱金香汗裊歌巾。

山石槽花染舞裙。

好似文君還對酒。

勝於神女不歸雲。

夢中那及覺時見。

宋玉荆王應羨君。

白樂天詩集卷十六

律詩

五言七首
凡九十六首

東南行一百韻寄通州元九侍御澧州李十一舍人果州崔二十二使君開州韋大員外庾三十二補闕杜十四拾遺李二十助教員外竇七校書

南去經三楚，東來過五湖。山頭看候館，水面問征途。地遠窮江界，天低接海隅。飄零同落葉，浩蕩似乘桴。漸覺鄉原異，深知土俗殊。夷音語嘲謔，蠻態笑睢盱。水市通闌閭，煙邨混舳舻。吏徵魚戶稅，人納火田租。亥日饒蝦蟹，寅年足虎驅。成人男作婢，事鬼女爲巫。樓暗攢倡婦，隄喧簇販夫。夜船論鋪賃，春酒斷瓶沽。見果皆盧橘，聞禽悉鷓鴣。山歌猿獨叫，野哭鳥相呼。嶺微雲成棧，江郊水當郛。月移翹柱鶴，風汎颭樵烏。鼃礙潮無信，蛟驚浪不虞。鼉鳴江播鼓，蜃氣海浮圖。樹裂山魃穴，沙含水弩樞。喘牛犁紫芋，羸馬放青菰。繡面誰家婢，鷄頭幾歲奴。泥中采菱芡，燒後拾樵蘇。鼎膩愁烹飪，盤腥厭膾臠。鍾儀徒戀楚，張翰浪思吳。

氣序涼還熱，光陰且復晡。身方逐萍梗，年欲近桑榆。渭北田園廢，江西歲月徂。憶歸恆慘澹，懷舊忽踟躕。自念咸秦客，嘗爲鄒魯儒。蘊藏經國術，輕棄度關繻。賦力凌鸚鵡，詞鋒敵鸞鶴。戰文重掉鞅，射策一彎弧。崔杜鞭齊下，元韋轡並驅。名聲逼揚馬，交分過蕭朱。世務輕摩揣，周行竊覬覦。風雲皆會合，雨露各霑濡。共遇昇平代，偏慙固陋軀。承明連夜直，建禮拂晨趨。美服頒王府，珍羞降御廚。議高通白虎，諫切伏青蒲。柏殿行陪宴，花樓走看餽。神旗張鳥獸，天籟動笙竽。戈劍星芒耀，魚龍電策驅。定場排越妓，促坐進吳圖。縹緲疑仙樂，嬋娟勝畫圖。歌聲低翠羽，舞汗墮紅珠。別選閒遊伴，潛招小飲徒。一杯愁已破，三瓊氣彌麤。軟美仇家酒，幽閒葛氏姝。十千方得斗，二八正當壚。論笑杓胡肆，談憐鞶嚙嚙。李酣尤短寶，庚醉更蕪迂。鞍馬呼教住，殷盤喝遣輸。長驅波卷白，連擲采成盧。籌併頻逃席，觥嚴別置盂。滿卮那可灌，頽玉不勝扶。入視中樞草，歸乘內廐駒。醉曾衝宰相，驕不揖金吾。日近恩雖重，雲高勢卻孤。翻身落霄漢，失脚倒泥塗。博望移門籍，潯陽佐郡符。時情變寒暑，世利算錙銖。望日辭雙闕，明朝別九衢。播遷分郡國，次第出京都。秦嶺馳三驛，商山上二刊。峴陽亭寂寞，夏口路崎嶇。大道全生棘，中丁盡執戈。江關未徵警，淮寇尙稽誅。林對東西寺，山分大小姑。

廬峰蓮刻削。溢水帶紫紆。九派吞青草。孤城覆綠蕪。黃昏鐘寂寂。清曉角嗚嗚。
 春色辭門柳。秋聲到井梧。殘芳悲鷓鴣。暮節感荼蘼。藥拆金英菊。花飄雪片蘆。
 波紅日斜沒。沙白月平鋪。幾見林抽筍。頻驚燕引雛。歲華何倏忽。年少不須臾。
 眇默思千古。蒼茫想八區。孔窮緣底事。顏天有何辜。龍智猶經醜。龜靈未免刳。
 窮通應已定。聖哲不能踰。況我身謀拙。逢他厄過拘。漂流隨大海。鍾鍛任洪爐。
 險阻嘗之矣。栖遲命也夫。沈冥消意氣。窮餓耗肌膚。防瘴和殘藥。迎寒補舊襦。
 書牀鳴蟋蟀。琴匣網蜘蛛。貧室如懸磬。端憂劇守株。時遭人指點。數被鬼揶揄。
 兀兀都疑夢。昏昏半似愚。女驚朝不起。妻怪夜長吁。萬里拋朋侶。三年隔友于。
 自然悲聚散。不是恨榮枯。去夏微之瘡。今春席八殂。天涯書達否。泉下哭知無。
 謾寫詩盈卷。空盛酒滿壺。只添新恨望。豈復舊歡娛。壯志因愁減。衰容與病俱。
 相逢應不識。滿頰白髭鬚。

初到江州寄翰林張李杜三學士

早攀霄漢上天衢。晚落風波委世途。雨露施恩無厚薄。蓬蒿隨分有榮枯。
 傷禽側翅驚弓箭。老婦低顏事舅姑。碧落三仙曾識面。年深記得姓名無。
 庚樓曉望

獨遇朱檻立凌晨

山色初明水色新

竹霧曉籠銜嶺月

蘋風煖送過江春

子城陰處猶殘雪

衙鼓聲前未有塵

三百年來庾樓上

曾經多少望鄉人

宿西林寺

木落天晴山翠開

愛山騎馬入山來

心知不及柴桑令

一宿西林便卻回

江樓宴別

樓中別曲催離酌

燈下紅裙閃綠袍

縹緲楚風羅綺薄

錚鏦越調管絃高

寒流帶月澄如鏡

夕吹和霜利似刀

尊酒未空歡未盡

舞腰歌袖莫辭勞

題山石榴花

一叢千朵壓欄干

剪碎紅綃卻作團

風煽舞腰香不盡

露銷粧臉淚新乾

薔薇帶刺攀應懶

茵苕生泥甃亦難

爭及此花簷戶下

任人採弄盡人看

代春贈

山吐晴峰水放光

辛夷花白柳梢黃

知但莫作江西意

風景何曾異帝鄉

答春

草煙低重水花明

從道風光似帝京

其奈山猿江上叫

故鄉無此斷腸聲

櫻桃花下歎白髮

白樂天詩集卷十六

逐處皆花好。隨年貌自衰。紅櫻滿眼日。白髮半頭時。倚樹無言久。攀條欲放遲。臨風兩堪歎。如雪復如絲。

惜落花贈崔二十四

淡淡紛紛不奈何。狂風急雨兩相和。晚來悵望君知否。枝上稀疎地上多。

移山櫻桃

亦知官舍非吾宅。且刷山櫻滿院栽。上佐近來多五考。少應四度見花開。

官舍閒題

職散優閒地。身慵老大時。送春唯有酒。銷日不過棋。祿米曬牙稻。園蔬鴨脚葵。飽餐仍晏起。餘暇弄龜兒。龜兒即小姪名

晚春登大雲寺南樓贈常禪師

花盡頭新白。登樓意若何。歲時春日少。世界苦人多。愁醉非因酒。悲吟不是歌。

求師治此病。唯勸讀楞伽。

北樓送客歸上都

憑高眺遠一悵懷。卻下朱欄手共攜。京路人歸天直北。江樓客散日平西。窮愁自要醉如泥。

長津欲渡迴船尾。殘酒重傾簇馬蹄。

不獨別君須強飲。

北亭招客

疎散郡丞同野客。幽閒官舍抵山家。春風北戶千莖竹。晚日東園一樹花。

小盞吹醅嘗冷酒。深爐敲火炙新茶。能來盡日宮棊否。太守知慵放晚衙。

宿西林寺早赴東林滿上人之會因寄崔二十二員外

謫辭魏闕鷓鴣隔。老入廬山麋鹿隨。薄暮蕭條投寺宿。凌晨清淨與僧期。

雙林我起聞鐘後。隻日君趨入閣時。鵬鷗高低分皆定。莫勞心力遠相思。

遊寶稱寺

竹寺初晴日。花塘欲曉春。野猿疑弄客。山鳥似呼人。酒嫩傾金液。茶新碾玉塵。

可憐幽靜地。堪寄老慵身。

早春聞提壺鳥因題隣家

厭聽秋猿催下淚。喜聞春鳥勸提壺。誰家紅樹先花發。何處青樓有酒沽。

進士蠶豪尋靜盡。拾遺風彩近都無。欲期明日東林醉。變作騰騰一俗夫。

見紫薇花憶微之

一叢暗澹將何比。淺碧籠裙襯紫巾。除卻微之見應愛。人間少有別花人。

薔薇花一叢獨死不知其故因有是篇

柯條未嘗損。根蔕不曾移。同類今齊茂。孤芳忽獨萎。仍憐委地日。正是帶花時。碎碧初凋葉。焦紅尙戀枝。乾坤無厚薄。草木自榮衰。欲問因何事。春風亦不知。

湖亭望水
久雨南湖漲。新晴北客過。日沈紅有影。風定綠無波。岸沒閭闔少。灘平船舫多。可憐心賞處。其奈獨遊何。

閒遊

外事因慵廢。中懷與靜期。尋泉上山遠。看笋出林遲。白石磨樵斧。青竿理釣絲。澄清深淺好。最愛夕陽時。

憶微之傷仲遠

李三仲遠
去年春喪

幽獨辭羣久。漂流去國賒。只將琴作伴。唯以酒爲家。感逝因看水。傷離爲見花。李三埋地底。元九謫天涯。舉眼青雲遠。回頭白日斜。可能勝賈誼。猶自滯長沙。

過鄭處士

閒道移居邨塢閒。竹林多處獨開關。故來不是求他事。暫借南亭一望山。

霖雨苦多江湖暴漲。塊然獨望。因題北亭

自作潯陽客。無如苦雨何。陰昏晴日少。閒悶睡時多。湖闊將天合。雲低與水和。

籬根舟子語。巷口釣人歌。霧鳥沈黃氣。風帆蹴白波。門前車馬道。一宿變江河。

春末夏初閒遊江郭二首

閒出乘輕屐。除行蹋軟沙。觀魚傍溢浦。看竹入楊家。林迸穿籬笋。藤飄落水花。雨埋釣舟小。風颺酒旗斜。嫩剝青菱角。濃煎白茗芽。淹留不知夕。城樹欲栖鴉。

【二】

柳影繁初合。鶯聲澁漸稀。早梅迎夏結。殘絮送春飛。西日韶光盡。南風暑氣微。展張新小箴。髮帖舊生衣。綠蟻杯香嫩。紅絲餠糲肥。故園無此味。何必苦思歸。

紅藤杖

杖出南蠻

南詔紅藤杖。西江白首人。時時攜步月。處處把尋春。勁健孤莖直。疎圓六節勻。火山生處遠。瀘水洗來新。粗細纒盈手。高低僅過身。天邊望鄉客。何日挂歸秦。

風雨中尋李十一因題船上

匹馬來郊外。扁舟在水濱。可憐衝雨客。來訪阻風人。小棹沾清醕。行厨煮白鱗。停杯看柳色。各憶故園春。

題廬山山下湯泉

一眼湯泉流向東。浸泥澆草煖無功。驪山溫水因何事。流入金鋪玉甃中。

寄新州董與元九因題六韻

時元九
歸居

笛竹出新春，霜刀劈翠筠。織成雙鎖篔，寄與獨眠人。卷作筒中信，舒爲席上珍。滑如鋪薤葉，冷似臥龍鱗。清潤宜乘露，鮮華不受塵。通州炎瘴地，此物最關身。

秋熱

西江風候接南威。

暑氣常多秋氣微。

猶道江州最涼冷。

至今九月著生衣。

題元八溪居

溪風漠漠樹重重。

水檻山牕次第逢。

晚葉尙開紅躑躅。

秋房初結白芙蓉。

聲來枕上千年鶴。

影落杯中五老峰。

更媿殷勤畱客意。

魚鮮飯細酒香濃。

晚出西郊

散吏閒如客，貧州冷似邨。

早涼湖北岸。

殘照郭西門。

嬾鑷從鬚白。

休醫任眼昏。

老來何所用，少興不多言。

階下蓮

葉展影翻當砌月。

花開香散入簾風。

不如種在天池上。

猶勝生於野水中。

端居詠懷

賈生俟罪心相似。

張翰思歸事不如。

斜日早知驚鷓鴣。

秋風悔不憶鱸魚。

胸襟曾貯匡時策。

懷袖猶殘諫獵書。

從此萬緣都擺落。

欲攜妻子買山居。

夜宿江浦聞元八改官因寄此什

君遊丹陛已三遷。

我汎滄浪欲二年。

劍珮曉趨雙鳳闕。

煙波夜宿一漁船。

交親盡在青雲上。

鄉國遙拋白日邊。

若報生涯應笑殺。

結茅栽芋種畝田。

百花亭

朱檻在空虛。

涼風八月初。

山形如峴首。

江色似桐廬。

高亭仍有月。

今夜宿何如。

佛寺乘船入。

人家枕水居。

江樓早秋

南國雖多熱，秋來亦不遲。湖光朝霽後，竹氣晚涼時。樓閣宜佳客，江山入好詩。清風水蘋葉，白露木蘭枝。欲作雲泉計，須營伏臘資。匡廬一步地，官滿更何之。

送客之湖南

年年漸見南方物，事事堪傷北客情。山鬼趨跳唯一足，峽猿哀怨過三聲。帆開青草湖中去，衣濕黃梅雨裏行。別後雙魚難定寄，近來潮不到湓城。

百花亭晚望夜歸

百花亭上晚徘徊，雲影陰晴掩復開。日色悠揚映山盡，雨聲蕭颯渡江來。

鬢毛漸病雙如雪。

心緒逢秋一似灰。

向夜欲歸愁未了。

滿湖明月小船迴。

西樓

小郡大江邊。危樓夕照前。青燕卑濕地。白露次寥天。鄉國此時阻。家書何處傳。仍聞陳蔡戍。轉戰已三年。

尋李道士山居兼呈元明府

盡日行還歇。遲遲獨上山。攀藤老筋力。照水病容顏。陶巷招居住。茅家許往還。飽諳榮辱事。無意戀人閒。

四十五

行年四十五。兩鬢半蒼蒼。清瘦詩成癖。粗豪酒放狂。老來猶委命。安處即爲鄉。或擬廬山下。來春結草堂。

寄李相公崔侍郎錢舍人

曾陪鶴馭兩三仙。親侍龍輿四五年。天上歡娛春有限。世閒漂泊海無邊。榮枯事過都成夢。憂喜情忘便是禪。官滿更歸何處去。香爐峰在宅門前。

廳前桂

天台嶺上凌霜樹。司馬廳前委地叢。一種不生明月裏。山中猶校勝塵中。

尋王道士藥堂因有題贈

行行覓路緣松嶠。步步尋花到杏壇。白石先生小有洞。黃芽姹女大還丹。常悲東郭千家塚。欲乞西山五色丸。但恐長生須有籍。仙臺試爲檢名看。

南浦歲暮對酒送王十五歸京

臘後冰生覆溢水。夜來雲闊失廬山。風飄細雪落如米。索索蕭蕭蘆葦閒。此地二年留我住。今朝一酌送君還。相看漸老無過醉。聚散窮通總是閒。

除夜

薄晚支頤坐。中宵枕臂眠。一從身去國。再見日周天。老度江南歲。春拋渭北田。潯陽來早晚。明日是三年。

聞李十一出牧澧州崔二十二出牧果州因寄絕句

平生相見即眉開。靜念無如李與崔。各是天涯爲刺史。緣何不覓九江來。

元和十二年淮寇未平詔停歲仗憤然有感率爾成章

聞停歲仗軫皇情。應爲淮西寇未平。不分氣從歌裏發。無明心向酒中生。愚計忽思飛短檄。狂心便欲請長纓。從來妄動多如此。自笑何曾得事成。

庾樓新歲

歲時銷旅貌。風景觸鄉愁。牢落江湖意。新年上庾樓。

上香爐峯

倚石攀蘿歌病身。

青筇竹杖白紗巾。

他時畫出廬山障。

便是香爐峯上人。

憶微之

與君何日出屯蒙。

魚戀江湖鳥厭籠。

分手各拋滄海畔。

折腰俱老綠衫中。

三年隔濶音塵斷。

兩地飄零氣味同。

又被新年勸相憶。

柳條黃軟欲春風。

雨夜贈元十八

卑濕沙頭宅。連陰雨夜天。

共聽簷溜滴。

心事兩悠悠。

把酒循環飲。

移牀曲尺眠。

莫言非故舊。相識已三年。

寒食江畔

草香沙暖水雲晴。

風景令人憶帝京。

還似往年春氣味。

不宜今日病心情。

聞鶯樹下沈吟立。

信馬江頭取次行。

忽見紫桐花恨望。

下邳明日是清明。

三月三日登庾樓寄庾三十二

三日歡遊辭曲水。

二年愁臥在長沙。

每登高處長相憶。

何況茲樓屬庾家。

聞李六景儉自河東令授唐鄧行軍司馬以詩賀之

誰能淮上靜風波。

聞道河東應此科。

不獨文詩供奏記。

定將談笑解兵戈。

泥埋劍戟終難久。

水借蛟龍可在多。

四十著緋軍司馬。

男兒官職未蹉跎。

石楠樹

可憐顏色好陰涼。

葉剪紅棧花撲霜。

繖蓋低垂金翡翠。

薰籠亂搭繡衣裳。

春芽細炷千燈燄。

夏藥濃焚百和香。

見說上林無此樹。

只教桃柳占年芳。柳一作李

大林寺桃花

人閒四月芳菲盡。

山寺桃花始盛開。

長恨春歸無覓處。

不知轉入此中來。

詠懷

自從委順任浮沈。

漸覺年多功用深。

面上滅除憂喜色。

胸中消盡是非心。

妻兒不問唯耽酒。

冠帶皆慵只抱琴。

長笑靈均不知命。

江離叢畔苦悲吟。

早發楚城驛

過雨塵埃滅。

沿江道徑平。

月乘殘夜出。

人趁早涼行。

荷塘翻露氣。

稻蕪瀉泉聲。

宿犬聞鈴起。

栖禽見火驚。

嘯嘯煙樹色。

十里始天明。

箬峴東池

思峴亭東有小池。

早荷新荇綠參差。

中宵把火行人發。

驚起雙棲白鷺鷥。

白樂天詩集卷十六

一九九一

建昌江

建昌江水縣門前。

立馬教人喚渡船。

忽似往年歸蔡渡。

草風沙雨渭河邊。

哭從弟

傷心一尉便終身。

叔母年高新婦貧。

一片綠衫消不得。

腰金拖紫是何人。

香爐峯下新卜山居草堂初成偶題東壁

五架三間新草堂。

石階桂柱竹編牆。

南簷納日冬天煖。

北戶迎風夏月涼。

灑砌飛泉纔有點。

拂聽斜竹不成行。

來春更葺東廂屋。

紙閣蘆簾著孟光。

重題四首

喜入山林初息影。

厭趨朝市久勞生。

早年薄有煙霞志。

晚歲深諳世俗情。

已許虎溪雲裏臥。

不爭龍尾道前行。

從茲耳界應清淨。

免見啾啾毀譽聲。

【二】

長松樹下小溪頭。

斑鹿胎巾白布裘。

藥圃茶園爲產業。

野麋林鶴是交遊。

雲生澗戶衣裳潤。

嵐隱山厨火燭幽。

最愛一泉新引得。

清冷屈曲透階流。

【三】

日高睡足猶慵起。

小閣重裘不怕寒。

遺愛寺鐘欹枕聽。

香爐峯雪撥簾看。

匡廬便是逃名地。

司馬仍爲送老官。

心泰身寧是歸處。

故鄉何獨在長安。

【四】

宦途自此心長別。

世事從今口不言。

豈止形骸同土木。

兼將壽夭任乾坤。

胸中壯氣猶須遣。

身外浮雲何足論。

還有一條遺恨事。

高家門館未酬恩。

山中問月

爲問長安月。

誰教不相離。

昔隨飛蓋處。

今照入山時。

如歸舊鄉國。

似對好親知。

松下行爲伴。

谿頭坐有期。

正月十五日夜東林寺學禪偶懷藍田楊主簿因呈智禪師

千巖將萬壑。

無處不相隨。

新年三五東林夕。

星漢迢迢鐘梵遲。

花縣當君行樂夜。

松房是我坐禪時。

忽看月滿還相憶。

始歎春來自不知。

不覺定中微念起。

明朝更問鴈門師。

臨水坐

昔爲東掖垣中客。

今作西方社內人。

手把楊枝臨水坐。

閒思往事似前身。

山居

山齋方獨往。

塵事莫相仍。

籃輿辭鞍馬。

緇徒換友朋。

除卻青衫在。

其餘便是僧。

朝餐唯藥菜。

夜伴只紗燈。

遺愛寺

弄石臨溪坐，尋花遶寺行。時時聞鳥語，處處是泉聲。

山中與元九書，因題書後

憶昔封書與君夜，金鑾殿後欲明天。今夜封書在何處，廬山菴裏曉燈前。

籠鳥檻猿俱未死，人閒相見是何年。

黃石巖下作

久別鷓鴣侶，深隨鳥獸羣。教他遠親故，何處覓知聞。昔日青雲意，今移向白雲。

戲贈李十三判官

垂鞭相送醉醺醺，遙見廬山指似君。想君初覺從軍樂，未愛香爐峰上雲。

醉中戲贈鄭使君

時使君先歸，兩妓樂重飲。

密度移紅毯，醜顏照綠杯。雙娥留且住，五馬任先迴。醉耳歌催醒，愁眉笑引開。

平生少年興，臨老暫重來。

江亭夕望

憑高望遠思悠哉，晚上江亭夜未迴。日欲沒時紅浪沸，月初生處白煙開。

辭枝雪蕊將春去，滿鑷霜毛送老來。爭取三年作歸計，心知不及賈生才。

酬元員外三月三十日慈恩寺相憶見寄

恨望慈恩三月盡，紫桐花落鳥關關。誠知曲水春相憶，其奈長沙老未還。

赤嶺猿聲催白首，黃茅瘴色換朱顏。誰言南國無霜雪，盡在愁人鬢髮閒。

中秋月

一作秋月

萬里清光不可思，添愁益恨遠天涯。誰人隴外久征戍，何處庭前新別離。

失寵故姬歸院夜，沒蕃老將上樓時。照他幾許人腸斷，玉兔銀蟾遠不知。

謝李六郎中寄新蜀茶

故情周匝向交親，新茗分張及病身。紅紙一封書後信，綠芽十片火前春。

湯添勺水煎魚眼，末下刀圭攪麴塵。不寄他人先寄我，應緣我是別茶人。

攜諸山客同上香爐峰，遇雨而還沾濕狼籍，互相笑謔，題此解嘲

蕭灑登山去，龍鍾遇雨回。磴危攀薜荔，石滑踐莓苔。襪汗君相諠，輾穿我自哈。

莫欺泥土脚，曾蹋玉階來。

彭蠡湖晚歸

彭蠡湖天晚，桃花水氣春。鳥飛千白點，日沒半紅輪。何必為遷客，無勞是病身。

但來臨此望，少有不愁人。

酬贈李鍊師見招

幾年司諫直承明。今日求真禮上清。
 劉綱有婦仙同得。伯道無兒累更輕。
 西河雨夜送客。會犯龍鱗容不死。
 雲黑雨脩脩。江昏水闊流。有風催解纜。無月伴登樓。酒罷無多興。帆開不少留。

唯看一點火。遙認是行舟。
 登西樓憶行簡。始覺人閒道路長。
 礙日暮山青簇簇。浸天秋水白茫茫。
 風波不見三年面。書信難傳萬里腸。早晚東歸來下峽。穩乘船舫過瞿唐。

羅子

有女名羅子。生來纔兩春。我今年已長。日夜二毛新。願念嬌啼面。思量老病身。
 直應頭似雪。始得見成人。

讀僧靈徹詩

東林寺裏西廊下。石片鐫題數首詩。言句怪來還校別。看名知是老湯師。

聽李士良琵琶

人各賦一十八字

聲似胡兒彈舌語。愁如塞月恨邊雲。閒人暫聽猶眉斂。可使和蕃公主聞。

昭君怨

明妃風貌最娉婷。合在椒房應四星。只得當年備宮掖。何曾專夜奉幃屏。
 見疎從道迷圖畫。知屈那教配虜庭。自是君恩薄如紙。不須一向恨丹青。

閒吟

自從苦學空門法。銷盡平生種種心。唯有詩魔降未得。每逢風月一閒吟。

戲問山石榴

小樹山榴近砌栽。半含紅萼帶花來。爭知司馬夫人妬。移到庭前便不開。

編集拙詩成一十五卷因題卷末戲贈元九李二十

一篇長恨有風情。十首秦吟近正聲。每被老元偷格律。元九向江陵日嘗以拙詩一軸贈行自後格變。

苦教短李伏歌行。李二十常自負歌行近見予樂府五十首默然心伏。世閒富貴應無分。身後文章合有名。

莫怪氣粗言語大。新排十五卷詩成。

湖上閒望

藤花浪拂紫茸條。菰葉風翻綠剪刀。閒弄水芳生楚思。時時合眼詠離騷。

白樂天詩集卷十七

律詩

五言七言自兩韻至五十韻凡一百首

江南謫居十韻

自晒沈冥客，曾爲獻納臣。壯心徒許國，薄命不如人。
 纔展凌雲翅，俄成失水鱗。葵枯猶向日，蓬斷欲辭春。
 澤畔長愁地，天邊欲老身。蕭條殘活計，冷落舊交親。
 草合門無徑，煙消飯有塵。憂方知酒聖，貧始覺錢神。
 行藏與通塞，一切任陶鈞。虎尾難容足，羊腸易覆輪。

江樓夜吟元九律詩成三十韻

昨夜江樓上，吟君數十篇。詞飄朱檻底，韻墮涿江前。
 收將白雪麗，奪盡碧雲妍。寸截金爲句，雙雕玉作聯。
 冰扣聲聲冷，珠排字字圓。文頭交比繡，筋骨軟於綿。
 醴泉流出地，鈞樂下從天。神鬼聞如泣，魚龍聽似禪。
 鴈感無鳴者，猿愁亦悄然。交流遷客淚，停住買人船。
 韻墮涿江前，清楚音諧律。精微思入玄，八風淒閒發。
 雙雕玉作聯，八風淒閒發。五彩爛相宣，涸湧同波浪。
 筋骨軟於綿，涸湧同波浪。錚鏦過管絃，星廻疑聚集。
 神鬼聞如泣，星廻疑聚集。月落爲雷連，閨被歌姬乞。
 鴈感無鳴者，猿愁亦悄然。交流遷客淚，停住買人船。
 潛聞思婦傳，閨被歌姬乞。

斜行題粉壁，短卷寫紅箋。肉味經時忘，頭風當日痊。
 道屈才方振，身閒業始專。天教聲烜赫，理合命迍邐。
 功夫雖共到，巧拙尚相懸。各有詩千首，俱拋海一邊。
 酬答朝妨食，披尋夜廢眠。老債文債負，宿結字因緣。
 名高折人爵，思苦減天年。不得當時遇，空令後代憐。
 每歎陳夫子，常嗟李謫仙。相悲今若此，溢浦與通川。

潯陽歲晚寄元八郎中庾三十二員外

閱水年將暮，燒金道未成。丹砂不肯死，白髮自須生。
 春深舊鄉夢，歲晚故交情。一別浮雲散，雙瞻列宿榮。
 封事頻聞奏，除書數見名。虛懷事僚友，平步取公卿。
 可憐白司馬，老大在滄城。病肺慙杯滿，衰顏忌鏡明。
 龍尾道前行，朝回幼女迎。

元九以綠絲布白輕容見寄製成衣服以詩報知

綠絲文布素輕容，珍重京華手自封。貧友遠勞君寄附，
 病妻親爲我裁縫。袴花白似秋雲薄，衫色青於春草濃。
 欲著卻休知不稱，折腰無復舊形容。

清明日送韋侍御貶虔州

寂寞清明日，蕭條司馬家。留餽和冷粥，出火煮新茶。
 欲別能無酒，相留亦有花。

南遷更何處。此地已天涯。

九江春望

森茫積水非吾土。飄泊浮萍是我身。
爐煙豈異終南色。溢草寧殊渭北春。
此地何妨便終老。眼前隨事覓交親。
匹如元是九江人。

晚題東林寺雙池

向晚雙池好。初晴百物新。
鼻枝翻翠羽。飛水躍紅鱗。
萍汎同遊子。蓮開當麗人。
臨流一惆悵。還憶曲江春。

贈內子

白髮方與歎。青娥亦伴愁。
寒衣補燈下。小女戲牀頭。
閨澹屏幃故。淒涼枕席秋。
貧中有等級。猶勝嫁黔婁。

送客春遊嶺南二十韻

因序嶺南方物以論之。并擬發之送崔二十二之作。

已訝遊何遠。仍嗟別太頻。
離容君蹙促。贈語我殷勤。
迢遞天南面。蒼茫海北濱。
訶陵國分界。交趾郡爲鄰。
蒼鬱三光晦。溫暾四氣勻。
陰晴變寒暑。昏曉錯星辰。
瘴地難爲老。蠻貊不易馴。
土民稀白首。洞主盡黃巾。
戰艦猶驚浪。戎軍未息塵。
紅旗圍卉服。紫綬裹文身。
麪苦桃榔棗。漿酸橄欖新。
牙檣迎海舶。銅鼓賽江神。

不凍貪泉暖。無霜毒草春。
雲煙蟒蛇氣。刀劍鱷魚鱗。
路足羈棲客。官多謫逐臣。
天黃生鬪母。雨黑長楓人。
廻使先傳語。征軒早返輪。
須防杯裏蠱。莫愛橐中珍。
北與南殊俗。身將貨孰親。
嘗聞君子誠。憂道不憂貧。

自題

功名宿昔人多許。寵辱斯須自不知。
一旦失恩先左降。三年隨例未量移。
馬頭覓角生何日。石火敲光住幾時。
前事是身俱若此。空門不去欲何之。

自悲

火宅煎熬地。霜松摧折身。
因知羣動內。易死不過人。

尋郭道士不遇

郡中乞假來相訪。洞裏朝元去不逢。
看院祇留雙白鶴。入門惟見一青松。
藥爐有火丹應伏。雲碓無人水自舂。
欲問參同契中事。更期何日得從容。

潯陽春三首

元和十二年作

春生

春生何處闌周遊。海角天涯遍始休。
先遣和風報消息。續教啼鳥說來由。
展張草色長河畔。點綴花房小樹頭。
若到故園應覓我。爲傳淪落在江州。

春來

春來觸動故鄉情，忽見風光憶兩京。
誰家綠酒歡連夜，何處紅樓睡失明。
金谷蹋花香騎入，曲江碾草鈿車行。
春去 獨有不眠不醉客，經春冷坐古湓城。

一從澤畔為遷客，兩度江頭送暮春。
百川未有回流水，一老終無卻少人。
白髮更添今日鬢，青衫不改去年身。
夢微之 二十八年八月二十日夜 四十六時三月盡，送春爭得不殷勤。

晨起臨風一惆悵，通川溢水斷相聞。
不知憶我因何事，昨夜三更夢見君。
贈韋鍊師 身似浮雲心似灰，何因相顧兩徘徊。

潯陽遷客為居士，身似浮雲心似灰。
共疑過去人閒世，曾作誰家夫婦來。
上界女仙無嗜好，何因相顧兩徘徊。

綠蠅新醕酒，紅泥小火爐。晚來天欲雪，能飲一杯無。
得行簡書聞欲下峽先以此寄 能飲一杯無。
路經三峽想還愁。

朝來又得東州信，欲取春初發梓州。
書報九江聞慙喜，路經三峽想還愁。

瀟湘瘴霧加餐飯，澗瀨驚波穩泊舟。
欲寄兩行迎爾淚，長江不肯向西流。

南湖早春

風迴雲斷雨初晴，返照湖邊暖復明。
翅低白鴈飛仍重，舌澁黃鸝語未成。
亂點碎紅山杏發，平鋪新綠水蘋生。

元十八從事南海欲出廬山臨別舊居有戀泉聲之什因以投和兼伸別情

賢侯辟士禮從容，莫戀泉聲問所從。
傷弓未息新驚鳥，得水難留久臥龍。
雨露初承黃紙詔，煙霞欲別紫霄峰。
一杯可易得相逢。

題韋家泉池

泉落青山出白雲，縈邨遶郭幾家分。
自從引作池中水，深淺方圓一任君。

醉中對紅葉

臨風杪秋樹，對酒長年人。
醉貌如霜葉，雖紅不是春。

遣懷

羲和走馭趁年光，不許人閒日月長。
榮銷枯去無非命，壯盡衰來亦是常。
遂使四時都似電，爭教兩鬢不成霜。
窮通生死不驚忙。

點額魚

龍門點額意何如。

紅尾青鬢卻返初。

見說在天行雨苦。

為龍未必勝為魚。

開龜兒詠詩

憐渠已解詠詩章。

搖膝支頤學二郎。

莫學二郎吟太苦。

纔年四十鬢如霜。

對酒

未濟卦中休卜命。

參同契裏莫勞心。

無如飲此銷愁物。

一餉愁消直萬金。

東牆夜合樹。去秋為風雨所摧。今年花時。悵然有感。

碧莢紅縷今何在。

風雨飄將去不回。

惆悵去年牆下地。

今春唯有薺花開。

病起

病不出門無限時。

今朝強出與誰期。

經年不上江樓醉。

勞動春風颺酒旗。

夢亡友劉太白同遊彰敬寺

三千里外臥江州。

十五年前哭老劉。

昨夜夢中彰敬寺。

死生魂魄暫同遊。

與果上人歿時題此訣別兼簡二林僧社

本結菩提香火社。

為嫌煩惱電池身。

不須惆悵從師去。

先請西方作主人。

贈寫真者

子騎丹青日。

予當醜老時。

無勞役神思。

更畫病容儀。

迢遞麒麟閣。

圖功未有期。

區區尺素上。焉用寫真為。

劉十九同宿

時淮寇初破

紅旗破賊非吾事。

黃紙除書無我名。

唯共嵩陽劉處士。

圍碁賭酒到天明。

十二年冬。江西溫暖。喜元八寄金石稜。一作到。因題此詩。

今冬臘候不嚴凝。

暖霧溫風氣上騰。

山脚庵中纔有雪。

江流慢處亦無冰。

欲將何藥防春瘴。

只有元家金石稜。

閒意

不爭榮耀任沈淪。

日與時疎共道親。

北省朋僚音信斷。

東林長老往還頻。

病停夜食閒如社。

慵擁朝裘煖似春。

漸老漸諳閒氣味。

終身不擬作忙人。

送友人上峽赴東川辟命

見說瞿塘峽。

斜銜澆瀨根。

難於尋鳥道。

險過上龍門。

山廻若鼉轉。

舟入似鯨吞。

岸合愁天斷。

波跳恐地翻。

夜送孟司功

憐君經此去。

為感主人恩。

薄陽白司馬。

夜送孟功曹。

江關管絃急。

樓明燈火高。

且莫開征棹。

陰風正怒號。

湖波翻似箭。

霜草殺如刀。

衰病

老辭遊治尋花伴。病別荒狂舊酒徒。

更恐五年三歲後。

些些談笑亦應無。

題詩屏風絕句并序

十二年冬，微之猶滯通州。予亦未離滄上。相去萬里，不見三年。鬱鬱相念，多以吟咏自解。前後辱微之寄示之什，殆數百篇。雖藏篋中，永以為好。不若置之座右，如見所思。繇是撥律句中短小麗絕者，凡一百首，題錄合為一屏風。舉目會心，參若其人在於前矣。前輩作事，多出偶然，則安知此屏不為好事者所傳，異日作九江一故事，爾因題絕句，聊以獎之。相憶采君詩作障，自書自勸不辭勞。障成定被人爭寫，從此南中紙價高。

答微之

微之於閬州西寺手題予詩予又以微之百篇題此屏上各以絕句報答

君寫我詩盈寺壁

我題君句滿屏風

與君相遇知何處

兩葉浮萍大海中

偶宴有懷

遇興尋文客。因歡命酒徒。春遊憶親故。夜會似京都。詩思閒仍在。鄉愁醉暫無。狂來欲起舞。慙見白髭鬚。

山中酬江州崔使君見寄

眷眇情無限。優容禮有餘。三年為郡吏。一半許山居。酒熟心相待。詩來手自書。

庾樓春好醉。明日且回車。

山枇杷

深山老去惜年華。況對東溪野枇杷。火樹風來翻綠燄。瓊枝日出曬紅紗。回看桃李都無色。映得芙蓉不是花。爭奈結根深石底。無因移得到人家。

聞李尚書拜相以長句寄賀微之

憐君不久在通川。知己新提造化權。夔尚定求才濟世。張雷應辨氣衝天。那知淪落天涯日。正是陶鈞海內年。肯向泥中拋折劍。不收重鑄作龍泉。

歲暮

窮陰急景坐相催。壯齒韶顏去不回。舊病重因年老發。新愁多是夜長來。膏明自燕緣多事。鴈默先烹為不才。禍福細尋無會處。不如且進手中杯。

雨中赴劉十九二林之期及到寺劉已先去因以四韻寄之

雲中臺殿泥中路。既阻同遊嬾卻還。將謂獨愁猶對雨。不知多興已尋山。纔應行到千峰裏。只校來遲半日閒。最惜杜鵑花爛熳。春風吹盡不同攀。

薔薇正開春酒初熟因招劉十九張大夫崔二十四同飲

薔薇正開春酒初熟。因招劉十九張大夫崔二十四同飲。似火淺深紅壓架。如鴿氣味綠粘臺。

試將詩句相招去。

倘有風情或可來。

明日早花應更好。

心期同醉卯時杯。

李白墓

采石江邊李白墳。

繞田無限草連雲。

可憐荒壤窮泉骨。

曾有驚天動地文。

但是詩人多薄命。

就中淪落不過君。

對酒

漫把參同契。

難燒伏火砂。

有時成白首。

無處問黃芽。

唯將綠醕酒。

且替紫河車。

幻世如泡影。

浮生抵眼花。

戲答諸少年

願我長年頭似雪。

饒君壯歲氣如雲。

朱顏今日雖欺我。

白髮他時不放君。

風雨晚泊

苦竹林邊蘆葦叢。

停舟一望思無窮。

青苔撲地連春雨。

白浪掀天盡日風。

忽忽百年行欲半。

茫茫萬事坐成空。

此生飄蕩何時定。

一縷鴻毛天地中。

題崔使君新樓

憂人何處可銷憂。

碧甃紅闌溢水頭。

從此潯陽風月夜。

潯公樓替庾公樓。

山中戲問韋侍御

我抱棲雲志。君懷濟世才。常吟反招隱。那得入山來。

贈曇禪師

作夢中

五年不入慈恩寺。今日尋師始一來。

欲知火宅焚燒苦。

方寸如今化作灰。

寄微之

帝城行樂日紛紛。

天畔窮愁我與君。

秦女笑歌春不見。

巴猿啼哭夜常聞。

何處琵琶絃似語。

誰家髯鬢髻如雲。

人生多少歡娛事。

那獨千分無一分。

醉吟二首

空王百法學未得。

姪女丹砂燒即飛。

事事無成身老也。

醉鄉不去欲何處。

【二】

兩鬢千莖新似雪。

十分一盞欲如泥。

酒狂又引詩魔發。

日午悲吟到日西。

曉寢

轉枕重安寢。

回頭一欠伸。

紙窗明覺曉。

布被煖知春。

雞鳴猶獨睡。

不博早朝人。

莫強疎慵性。

須安老大身。

答元八郎中楊十二博士

身學浮雲無所著。

心同止水有何情。

但知瀟灑疎朝市。

不要崎嶇隱姓名。

盡日觀魚臨湖坐。

有時隨鹿上山行。

誰能拋得人閒事。

來共騰騰遇此生。

湖亭與行簡宿

潯陽少有風情客。

招宿湖亭盡卻回。

水檻虛涼風月好。

夜深唯共阿憐來。

八月十五日夜湓亭望月

昔年八月十五夜。

曲江池畔杏園邊。

今年八月十五夜。

湓浦沙頭水館前。

西北望鄉何處是。

東南見月幾回圓。

臨風一歎無人會。

今夜清光似往年。

贈江客

江柳影寒新雨地。

塞鴻聲急欲霜天。

愁君獨向沙頭宿。

水繞蘆花月滿船。

殘暑招客

雲截山腰斷。風驅雨脚回。

早陰江上散。

殘暑日中來。

卻取生衣著。

重拈小簾開。

誰能淘晚熱。閒飲兩三杯。

潯陽秋懷贈許明府

霜紅二林葉。風白九江波。

暝色投煙鳥。

秋聲帶雨荷。

馬閒無處出。

門冷少人過。

鹵莽還鄉夢。依稀望闕歌。

共思除醉外。

無計奈愁何。

試問陶家酒。

新藹得幾多。

九日醉吟

有恨頭還白。無情菊自黃。

一爲州司馬。

三見歲重陽。

劔匣塵埃滿。

籠禽日月長。

身從漁父笑。門任雀羅張。

問疾因畱客。

聽吟偶置觴。

歎時論倚伏。

懷舊數存亡。

奈老應無計。治愁或有方。

無過學王績。

唯以醉爲鄉。

問韋山人山甫

身名身事兩蹉跎。

試就先生問若何。

從此神仙學得否。

白鬚雖有未爲多。

送蕭鍊師步虛詞十首卷後以二絕繼之

欲上瀛洲臨別時。

贈君十首步虛詞。

天仙若愛應相問。

向道江州司馬詩。

〔一〕

花紙瑤絨松墨字。

把將天上共誰開。

試呈王母如堪唱。

發遣雙成更取來。

贈李兵馬使

身得貳師餘氣概。

家藏都尉舊詩章。

江南別有樓船將。

燕領虬鬚不姓楊。

題遺愛寺前溪松

偃亞長松樹。侵臨小石溪。

靜將流水對。高共遠峰齊。

翠蓋煙籠密。花幢雪壓低。

與僧清影坐。借鶴穩枝棲。

筆寫形難似。琴偷韻易迷。

著天風撼撼。晴夜露淒淒。

獨憩依爲舍。閒行繞作蹊。

棟梁君莫采。畱著伴幽棲。

廬山草堂夜雨獨宿寄牛二李七庾三十二員外

丹霄攜手三君子，白髮垂頭一病翁。
蘭省花時錦帳下，廬山雨夜草庵中。
終身膠漆心應在，半路雲泥迹不同。
唯有無生三昧觀，榮枯一照兩成空。

聞楊十二新拜省郎遙以詩賀

文昌新入有光輝，紫界宮牆白粉闌。
曉日雞人傳漏箭，春風侍女護朝衣。
雪飄歌句高難和，鶴拂煙霄老慣飛。
官職聲名俱入手，近來詩客似君稀。

三月三日懷微之

良時光景長虛擲，壯歲風情已闕銷。
忽憶同爲校書日，每年同醉是今朝。

贈韋八

辭君歲久見君初，白髮驚嗟兩有餘。
容鬢別來今至此，心情料取合何如。
會同曲水花亭醉，亦共華陽竹院居。
豈料天南相見夜，哀猿瘴霧宿匡廬。

春江閒步贈張山人

江景又妍和，牽愁發浩歌。
晴沙金屑色，春水麴塵波。
紅簇交枝杏，青含卷葉荷。
藉萍憐軟暖，憩樹愛婆娑。
書信朝賢斷，知音野老多。
相逢不閒語，爭奈日長何。
春聽琵琶兼簡長孫司戶

四絃不似琵琶聲，亂寫真珠細滅鈴。
指底商風悲颯颯，舌頭胡語苦醒醒。
如言都尉思京國，似訴明妃厭虜庭。
遷客共君相勸諫，春腸易斷不須聽。

吳宮詞

一入吳王殿，無人視翠蛾。
樓高時見舞，宮靜夜聞歌。
半露曾如雪，斜廻臉似波。
妍媸各有分，誰敢妒恩多。

送韋侍御量移金州司馬

時子官獨未出

春歡雨露同霑澤，冬歎風霜獨滿衣。
畱滯多時如我少，遷移好處似君稀。
臥龍雲到須先起，蟄燕雷驚尚未飛。
莫恨東西溝水別，滄溟長短擬同歸。

自到潯陽生三女子因詮真理用遣妄懷

宦途本自安身拙，世累由來向老多。
遠謫四年徒已矣，晚生三女擬如何。
預愁嫁娶真成患，細念因緣盡是魔。
賴學空王治苦法，須拋煩惱入頭陀。

江西裴常侍以優禮見待又蒙贈詩輒敘鄙誠用伸感謝

一從簪笏事金貂，每借溫顏放折腰。
長覺身輕離泥滓，忽驚手重捧瓊瑤。
馬因回顧雖增價，桐遇知音已半焦。
他日秉鈞如見念，壯心直氣未全銷。

自江州司馬授忠州刺史仰荷聖澤聊書鄙誠

炎瘴拋身遠，泥塗索脚難。網初鱗撥刺，籠久翅摧殘。雷電頒時令，陽和變歲寒。還管承舊念，剖竹授新官。鄉覺前程近，心隨外事寬。生還應有分，西笑問長安。

除忠州寄謝崔相公

提拔出泥知力竭，吹噓生翅見情深。劍鋒缺折難衝斗，桐尾燒焦豈望琴。感舊兩行年老淚，酬恩一寸歲寒心。忠州好惡何須問，鳥得辭籠不擇林。

初除官蒙裴常侍贈鶻銜瑞草緋袍魚袋因謝惠貺兼抒離情

新授銅符未著緋，因君裝束始光輝。鶻銜紅綬繞身飛，惠深范叔絺袍贈。榮過蘇秦佩印歸，魚綴白金隨步躍，明朝戀別朱門淚。不敢多垂恐汗衣。

洪州逢熊孺登

靖安院裏辛夷下，醉笑狂吟氣最粗。莫問別來多少苦，低頭看取白髭鬚。

初著刺史緋答友人見贈

故人安慰善為辭，五十專城道未遲。徒使花袍紅似火，其如蓬鬢白成絲。且貪薄俸君應惜，不稱衰容那自知。銀印可憐將底用，只堪歸舍嚇妻兒。

又答賀客

銀章暫假為專城，賀客來多懶起迎。似挂緋衫衣架上，朽株枯竹有何榮。

別草堂三絕句

正聽山鳥向陽眠，黃紙除書落枕前。為感君恩須暫起，爐峰不擬住多年。

【二】

久眠褐被為居士，忽挂緋袍作使君。身出草堂心不出，廬山未要動移文。

【三】

三閒茅舍向山開，一帶山泉遶舍迴。山色官聲莫惆悵，三年官滿卻歸來。

鍾陵餞送

翠幕紅筵高在雲，歌鐘一曲萬家聞。路人指點滕王閣，看送忠州白使君。

潯陽宴別

此後忠州路上作

鞍馬軍城外，笙歌祖帳開。乘潮發溢口，帶雪別廬山。暮景牽行色，春寒散醉顏。共嗟災瘴地，盡室得生還。

戲贈戶部李巡官

好去民曹李判官，少貪公事且謀歡。男兒未死爭能料，莫作忠州刺史看。

行次夏口先寄李大夫

連山斷處大江流，紅旆逶迤鎮上游。幕下翔翔秦御史，軍前奔走漢諸侯。

曾陪劔履升鸞殿。

欲謁旌幢入鶴樓。

假著緋袍君莫笑。

恩深始得君忠州。

重贈李大夫

早接清班登玉陛。

同承別詔直金鑾。

鳳巢閣上容身穩。

鶴籠籠中展翅難。

流落多年應是命。

量移遠郡未成官。

慙君獨不欺憔悴。

猶作銀臺舊眼看。

對鏡吟

閒看明鏡坐清晨。

多病姿容半老身。

誰論情性乖時事。

自想形骸非貴人。

三殿失恩宜放棄。

九宮推命合漂淪。

如今所得須甘分。

腰佩銀龜朱兩輪。

江州赴忠州至江陵以來舟中示舍弟五十韻

昔作咸秦客。

常思江海行。

今來仍盡室。

此去又專城。

典午猶爲幸。

分憂固是榮。

算篋州乘送。

樓船驛船迎。

共載皆妻子。

同遊卽弟兄。

寧辭浪迹遠。

且貴賞心并。

雲展帆高挂。

颺馳棹迅征。

泝流從漢浦。

循路轉荆衡。

山逐時移色。

江隨地改名。

風光近東早。

水木向南清。

夏口煙孤起。

湘川雨半晴。

日煎紅浪沸。

月射白砂明。

北渚寒留雁。

南枝暖待鶯。

駢朱桃露夢。

點翠柳含萌。

亥市魚鹽聚。

神林鼓笛鳴。

壺漿椒葉氣。

歌曲竹枝聲。

繫纜憐沙靜。

垂綸愛岸平。

水餐紅粒稻。

野茹紫花菁。

甌汎茶如乳。

臺粘酒似餲。

脰長抽錦纈。

藕脆削瓊英。

容易來千里。

斯須進一程。

未曾勞氣力。

漸覺有心情。

臥穩添春睡。

行遲帶酒醒。

早接文場戰。

曾爭翰苑盟。

掉頭稱俊造。

翹足取公卿。

且味隨時義。

徒輸報國誠。

衆排恩易失。

偏壓勢先傾。

虎尾憂危切。

鴻毛性命輕。

燭蛾誰救活。

蠶繭自纏荼。

斂手辭雙闕。

回眸望兩京。

長沙拋賈誼。

漳浦臥劉楨。

鷓鴣鳴還歇。

蟾蜍破又盈。

年光同激箭。

鄉思極搖旌。

潦倒親知笑。

衰羸舊誠驚。

烏頭因感白。

魚尾爲勞頰。

劔學將何用。

丹燒竟不成。

孤舟萍一葉。

雙鬢雪千莖。

老見人情盡。

閒思物理精。

如湯探冷熱。

似博鬪輸贏。

險路應須避。

迷塗莫共爭。

此心知止足。

何物要經營。

玉向泥中潔。

松經雪後貞。

無妨隱朝市。

不必謝寰瀛。

但在前非悟。

期無患後嬰。

多知非景福。

少語是元亨。

晦卽全身藥。

明爲伐性兵。

昏昏隨世俗。

蠢蠢學黎氓。

鳥以能言縉。

龜緣入夢烹。

知之一何晚。

猶足保餘生。

題岳陽樓

岳陽城下水漫漫。

獨上危樓凭曲欄。

春岸綠時連夢澤。

夕波紅處近長安。

猿攀樹立啼何苦。

鴈點湖飛渡亦難。

此地唯堪畫圖障。

華堂張與貴人看。

入峽次巴東

不知遠郡何時到。

猶喜全家此去同。

萬里王程三峽外。

百年生計一舟中。

巫山暮足霧花雨。

隴水春多逆浪風。

兩片紅旌數聲鼓。

使君鸞蝶上巴東。

二〇一八

十年三月三十日別微之於灤上十四年三月十一日夜遇微之於峽中。

停舟夷陵三宿而別言不盡者以詩終之因賦七言十七韻以贈且欲記

所遇之地與相見之時爲他年會話張本也

灤水店頭春盡日。

送君上馬謫通川。

夷陵峽口明月夜。

此處逢君是偶然。

一別五年方見面。

相攜三宿未廻船。

坐從日暮唯長歎。

語到天明竟未眠。

齒髮蹉跎將五十。

關河迢遞過三千。

生涯共寄滄江上。

鄉國俱拋白日邊。

往事渺茫都似夢。

舊遊零落半歸泉。

醉悲灑淚春杯裏。

吟苦支頤曉燭前。

莫問龍鍾惡官職。

且聽清脆好詩篇。

重開離宴貴留連。

別來只是成詩癖。

老去何曾更酒顛。

各限王程須去住。

黃牛渡北移征棹。

使君灘水急潺湲。

白狗崖東卷別筵。

月弔宵聲哭杜鵑。

神女臺雲閉綠繞。

一條白練峽中天。

風淒暝色愁楊柳。

我向忠州入瘴煙。

未死會應相見在。

又知何地復何年。

君還秦地辭炎徼。

昭君邨柳翠於眉。

誠知老去風情少。

見此爭無一句詩。

題峽中石上。

巫女廟花紅似粉。

見此爭無一句詩。

見此爭無一句詩。

巫女廟花紅似粉。

昭君邨柳翠於眉。

誠知老去風情少。

見此爭無一句詩。

白樂天詩集卷十八

律詩

五言七首
凡九十四首

夜入瞿塘峽

瞿塘天下險。夜上信難哉。岸似雙屏合。天如匹練開。逆風驚浪起。拔柁開船來。

欲識愁多少。高於滌瀆堆。

初到忠州贈李六

好在天涯李使君。江頭相見日黃昏。吏人生梗都如鹿。市井蕭疎只抵邨。

一隻蘭船當驛路。百層石磴上州門。更無平地堪行處。虛受朱輪五馬恩。

郡齋暇日憶廬山草堂兼寄二林僧社三十韻皆叙貶官以來出處之意

諫諍知無補。遷移分所當。不堪匡聖主。只合事空王。龍象投新社。鷄鶩失故行。

沈吟辭北闕。誘引向西方。更佳雙林寺。仍開一草堂。平治行道路。安置坐禪牀。

手版支爲枕。頭巾閣在牆。先生烏几寫。居士白衣裳。竟歲何曾悶。終身不擬忙。

滅除殘夢想。換盡舊心腸。世界多煩惱。形神久損傷。正從風鼓浪。轉作日銷霜。

吾道尋知止。君恩偶未忘。忽蒙頒鳳詔。兼謝剖魚章。蓮靜方依水。葵枯重仰陽。
 三車猶夕會。五馬已晨裝。去似尋前世。來如別故鄉。眉低出鷺嶺。脚重下蛇岡。
 漸望廬山遠。彌愁峽路長。香爐峯隱隱。巴字水茫茫。瓢挂留庭樹。經收在屋梁。
 春拋紅藥圃。夏憶白蓮塘。唯擬捐塵事。將何答寵光。有期追永遠。無政繼龔黃。
 南國秋猶熱。西齋夜暫涼。閒吟四句偈。靜對一爐香。身老同丘井。心空是道場。
 竟僧爲去伴。留伴作歸糧。爲報山中侶。憑看竹下房。會應歸去在。松菊莫教荒。

贈康叟

八十秦翁老不歸。

南賓太守乞寒衣。

再三憐汝非他意。

天寶遺民見漸稀。

鷓鴣

竟日語還默。中宵棲復驚。身囚緣彩翠。心苦爲分明。暮起歸巢思。春多憶侶聲。
 誰能拆籠破。從放快飛鳴。

京使回。累得南省諸公書。因以長句詩寄謝蕭五。劉二元。八吳十一韋大。

陸郎中。崔二十二。李七。庾三十二。李六。李十。楊三。樊大。楊十二。員外。
 雪壓泥埋未死身。每勞存問媿交親。浮萍漂泊三千里。列宿參差十五人。
 禁月落時君待漏。畚煙深處我行春。瘴鄉得老猶爲幸。豈敢傷嗟白髮新。

東城春意

風輕雲不動。郡城東北隅。晚來春澹澹。天氣似京都。絃管隨宜有。杯觴不道無。
 其如親故遠。無可共歡娛。

木蓮樹圖并序三首

木蓮樹生巴峽山谷。開巴民亦呼爲黃心樹。大者高五丈。涉冬不凋。身如青楊。有白文。葉如桂。厚大無脊。花如蓮。香色豔膩。皆同。獨房藥有異。四月初始開。自開迨謝。僅二十日。忠州西北十里有鳴玉谿。生者穠茂尤異。元和十四年夏。命道士母丘元志寫。惜其遐僻。因題三絕句云。

如折芙蓉栽旱地。似拋芍藥挂高枝。雲埋水隔無人識。唯有南賓太守知。

【二】

紅似燕支膩如粉。傷心好物不須臾。山中風起無時節。明日重來得在無。

【三】

已愁花落荒巖底。復恨根生亂石間。幾度欲移移不得。天教拋擲在深山。

種桃杏

無論海角與天涯。大抵心安卽是家。路遠誰能念鄉曲。年深兼欲忘京華。

忠州且作三年計。種杏栽桃擬待花。

新秋

二毛生鏡日。一葉落庭時。老去爭由我。慾來欲泥誰。空銷閒歲月。不見舊親知。

唯弄扶牀女。時時強展眉。

龍昌寺荷池

冷碧新秋水。殘紅半破蓮。從來寥落意。不似此池邊。

聽竹枝贈李侍御

巴童巫女竹枝歌。懊惱何人怨咽多。暫聽遺君猶悵望。長聞教我復如何。

寄胡餅與楊萬州

胡麻餅樣學京都。麪脆油香新出爐。寄與飢饉楊大使。嘗看得似輔興無。

感櫻桃花因招飲客

櫻桃昨夜開如雪。鬢髮今年白似霜。漸覺花前成老醜。何曾酒後更顛狂。

誰能聞此來相勸。共泥春風醉一場。

東亭閒望

按英華作
閒坐

東亭盡日坐。誰伴寂寥身。綠桂爲佳客。紅蕉當美人。笑言雖不接。情狀似相親。不作悠悠想。如何度晚春。

畫木蓮花圖寄元郎中

花房膩似紅蓮朶。豔色鮮如紫牡丹。唯有詩人應解愛。丹青寫出與君看。

和李澧州題韋開州經藏詩

既悟蓮花藏。須遺貝葉書。菩提無處所。文字本空虛。觀指非知月。忘筌是得魚。聞君登彼岸。捨筏復何如。

九日題塗谿

蕃艸席鋪楓葉岸。竹枝歌送菊花杯。明年尙作南賓守。或可重陽更一來。

卽事寄微之

畝田溢米不耕鋤。旱地荒園少菜蔬。想念土風今若此。料看生計合何如。衣縫紕類黃絲絹。飯下腥鹹白小魚。飽暖飢寒何足道。此身長短是空虛。

題郡中荔枝詩十八韻兼寄楊萬州八使君

奇果標南土。芳林對北堂。素華春漠漠。丹實夏煌煌。葉捧低垂戶。枝擎重壓牆。始因風弄色。漸與日爭光。夕訝條懸火。朝驚樹點粧。深於紅躑躅。大校白檳榔。星綴連心朶。珠排耀眼房。紫羅裁襯殼。白玉裹填瓤。早歲曾聞說。今朝始摘嘗。嚼疑天上味。嗅異世間香。潤勝蓮生水。鮮逾橘得霜。燕支掌中顆。甘露舌頭漿。

物少尤珍重。天高苦渺茫。已教生暑月。又使阻遐方。粹液靈難駐。妍姿嫩易傷。近南光景熱。向北道途長。不得充王賦。無由寄帝鄉。唯君堪擲贈。面白似潘郎。

雷北客
峽外相逢遠。樽前一會難。即須分手別。且強展眉歎。楚袖蕭條舞。巴絃趣數彈。笙歌隨分有。莫作帝鄉看。

重寄荔枝與楊使君時聞楊使君欲種植故有落句之戲

摘來正帶凌晨露。寄去須憑下水船。映我緋衫渾不見。對公銀印最相鮮。香連翠葉真堪畫。紅透青籠實可憐。聞道萬州方欲種。愁君得喫是何年。

和萬州楊使君四絕句

競渡

競渡相傳爲汨羅。不能止遏意無他。自經放逐來憔悴。能校靈均死幾多。

江邊艸

聞君澤畔傷春艸。憶在天門街裏時。漠漠淒淒愁滿眼。就中惆悵是江離。

嘉慶李

東都綠李萬州栽。君手封題我手開。把得欲嘗先悵望。與渠同別故鄉來。

白槿花

秋葍晚英無豔色。何因栽種在人家。使君只別羅敷面。爭解回頭愛白花。

和行簡望郡南山

反照前山雲樹明。從君苦道似華清。試聽腸斷巴猿叫。早晚驪山有此聲。

望郡南山

臨江一幘白雲閒。紅綠層層錦繡斑。不作巴南天外意。何如昭應望驪山。

種荔枝

紅顆珍珠誠可愛。白鬚太守亦何癡。十年結子知誰在。自向庭中種荔枝。

陰雨

嵐霧今朝重。江山此地深。灘聲秋更急。峽氣曉多陰。望闕雲遮眼。思鄉雨滴心。將何慰幽獨。賴此北窗琴。

送客歸京

水陸四千里。何時歸到秦。舟辭三峽雨。馬入九衢塵。有酒留行客。無書寄貴人。唯憑遠傳語。好在曲江春。

送蕭處士遊黔南

能文好飲老蕭郎。

身似浮雲鬢似霜。

生計拋來詩是業。

家園忘卻酒爲鄉。

江從巴峽初成字。

猿過巫陽始斷腸。

不醉黔中爭去得。

磨圍山月正蒼蒼。

東樓醉

天涯深峽無人地。

歲暮窮陰欲夜天。

不向東樓時一醉。

如何擬過二三年。

寄微之

時微之爲
徐州司馬

高天默默物茫茫。

各有來由致損傷。

鸚鵡能言長翦翅。

龜緣難死久撐牀。

莫嫌冷落拋閒地。

猶勝炎蒸臥瘴鄉。

外物竟關身底事。

謾排門戟繫腰章。

東樓招客夜飲

莫辭數數醉東樓。

除醉無因破得愁。

唯有綠樽紅燭下。

暫時不似在忠州。

醉後戲題

自知清冷似冬凌。

每被人呼作律僧。

今夜酒醺羅綺煖。

被君融盡玉壺冰。

冬至夜

老去襟懷常濩落。

病來鬚髮轉蒼浪。

心灰不及爐中火。

鬢雪多於砌下霜。

三峽南賓城最遠。

一年冬至夜偏長。

今宵始覺房櫺冷。

坐索寒衣詎孟光。

竹枝詞四首

瞿塘峽口水煙低。

白帝城頭月向西。

唱到竹枝聲咽處。

寒猿聞鳥一時啼。

【二】

竹枝苦怨怨何人。

夜靜山空歌又聞。

蠻兒巴女齊聲唱。

愁殺江南病使君。

【三】

巴東船舫上巴西。

波面風生雨脚齊。

水蓼冷花紅簇簇。

江蘿濕葉碧凄凄。

【四】

江畔誰人唱竹枝。

前聲斷咽後聲遲。

怪來調苦緣詞苦。

多是通州司馬詩。

酬嚴中丞晚眺黔江見寄

江水三廻曲。愁人兩地情。

磨圍山下色。明月峽中聲。

臨流有新恨。照見白鬚生。

寄題楊萬州四望樓

江上新樓名四望。東西南北水茫茫。

無由得與君攜手。同凭欄干一望鄉。

答楊使君登樓見憶

忠萬樓中南北望。南州煙水北州雲。

兩州何事偏相憶。各是籠禽作使君。

除夜

歲暮紛多思。天涯渺未歸。老添新甲子。病減舊容輝。鄉國仍畱念。功名已息機。明朝四十九。應轉悟前非。

聞雷

瘴地風霜早。溫天氣候催。窮冬不見雪。正月已聞雷。震蟄蟲蛇出。驚枯艸木開。空餘客方寸。依舊似寒灰。

春至

若爲南國春還至。爭向東樓日又長。白片落梅浮湖水。黃梢新柳出城牆。閒拈蕉葉題詩詠。悶取藤枝引酒嘗。樂事漸無身漸老。從今始擬負風光。

感春

巫峽中心郡。巴城四面春。草青臨水地。頭白見花人。憂喜皆心火。榮枯是眼塵。除非一杯酒。何物更關身。

春江

炎涼昏曉苦推遷。不覺忠州已二年。閉閣只聽朝暮鼓。上樓空望往來船。鶯聲誘引來花下。草色勾畱坐水邊。唯有春江看未厭。紫砂邊石綠潺湲。題東樓前李使君所種櫻桃花。

身入青雲無見日。手栽紅樹又逢春。

唯畱花向樓前看。

故故拋愁與後人。

巴水

城下巴江水。春來似麴塵。軟砂如渭曲。斜岸憶天津。影蘸新黃柳。香浮小白蘋。臨流搔首坐。惆悵爲何人。

野行

草潤衫襟重。沙乾屐齒輕。仰頭聽鳥立。信脚望花行。暇日無公事。衰年有道情。浮生短於夢。夢裏莫營營。

送高侍御使廻因寄楊八

明月峽邊逢制使。黃茆岸上是忠州。到城莫說忠州惡。無益虛教楊八愁。

奉酬李相公見示絕句

碧油幢下捧新詩。榮賤雖殊共一悲。涕淚滿襟君莫怪。甘泉侍從最多時。

戲贈蕭處士清禪師

三杯鬼蜮忘機客。百衲頭陀任運僧。又有放慵巴郡守。不營一事共騰騰。

錢虢州以三堂絕句見寄因以本韻和之

同事空王歲月深。相思遠寄定中吟。遙知清淨中和化。祇用金剛三昧心。

三月三日

二〇三〇

暮春風景初三日。流世光陰半百年。欲作閒遊無好伴。半江惆悵卻回船。

寒食夜。四十九年身老日。一百五夜月明天。抱膝思量何事在。癡男駭女喚鞦韆。

代州民間

龍昌寺底開山路。巴子臺前種柳林。官職家鄉都忘卻。誰人會得使君心。

答州民

宦情抖擻隨塵去。鄉思銷磨逐日無。唯擬騰騰作閒事。遮渠不道使君愚。

荔枝樓對酒

荔枝新熟雞冠色。燒酒初開琥珀香。欲摘一枝傾一盞。西樓無客共誰嘗。

房家夜宴喜雪戲贈主人

風頭向夜利如刀。賴此溫爐軟錦袍。桑落氣薰珠翠暖。柘枝聲引管絃高。

酒鉤送盡推蓮子。燭淚粘盤壘蒲萄。不醉遣儂爭散得。門前雪片似鵝毛。

醉後贈人

香毬趁拍迴環匝。花盞拋巡取次飛。自入春來未同醉。那能夜去獨先歸。

初除尚書郎脫刺史絰

親賓相賀問何如。服色恩光盡反初。頭白喜拋黃牛峽。眼明驚拆紫泥書。

便爾朱絨還鈴閣。卻著青袍侍玉除。無奈嬌癡三歲女。繞腰啼哭覓銀魚。

留題開元寺上方

東寺臺閣好。上方風景清。數來猶未厭。長別豈無情。戀水多臨坐。辭花剩繞行。

最憐新岸柳。手種未全成。

別種東坡花樹兩絕

三年留滯在江城。草樹禽魚盡有情。何處殷勤重回首。東坡桃李種新成。

【二】

花林好住莫顛顛。春至但知依舊春。樓上明年新太守。不妨還是愛花人。

別橋上竹

穿橋進竹不依行。恐礙行人被損傷。我去自慙遺愛少。不教君得似甘棠。

發白狗峽次黃牛峽登高寺卻望忠州

白狗次黃牛。灘如竹節稠。路穿天地險。人續古今愁。忽見千花塔。因停一葉舟。

畏途常迫促。靜境暫淹留。巴曲春全盡。巫陽雨半收。北歸雖引領。南望亦迴頭。

昔去悲殊俗。今來念舊遊。別僧山北寺。拋竹水西樓。郡樹花如雪。軍厨酒似油。時時大開口。自笑憶忠州。

棣華驛見楊八題夢兄弟詩

遙聞旅宿夢兄弟。應爲郵亭名棣華。名作棣華來早晚。自題詩後屬楊家。

商山路有感

萬里路長在。六年身始歸。所經多舊館。大半主人非。

商山路驛桐樹昔與微之前後題名處

與君前後多遷謫。五度經過此路隅。笑問中庭老桐樹。這回歸去兔來無。

德宗皇帝挽歌詞四首

執象宗玄祖。貽謀啓孝孫。文高柏梁殿。禮薄灞陵原。宮仗辭天闕。朝儀出國門。生成不可報。二十七年恩。

【二】

虞帝南巡後。殷宗諒闇中。初辭鑄鼎地。已閉望仙宮。曉落當陵月。秋生滿旆風。前星承帝座。不使北辰空。

【三】

業大承宗祖。功成付子孫。睿文詩播樂。遺訓史標言。節表中和德。方垂廣利恩。懸知千載後。理代數貞元。

【四】

夢滅三齡壽。哀延七月期。寢園愁望遠。宮仗哭行遲。雲日添寒慘。笳簫向晚悲。因山有遺詔。如葬漢文時。

昭德王后挽歌詞

仙去逍遙境。詩畱窈窕章。春歸金屋少。夜入壽宮長。鳳引曾辭輦。蠶休昔採桑。陰靈何處感。沙麓月無光。

太平樂詞二首

以下七首在論林時奉勅撰進。

歲豐仍節儉。時泰更銷兵。聖念長如此。何憂不太平。

【二】

湛露浮堯酒。薰風起舜歌。願同堯舜意。所樂在人和。

小曲新詞二首

霽色鮮宮殿。秋聲脆管絃。聖明千歲樂。歲歲似今年。

【二】

紅裙明月夜。碧簾早秋時。好向昭陽宿。天涼玉漏遲。
閨怨詞三首

朝憎鶯百轉。夜妬燕雙棲。不慣經春別。唯知到曉啼。

【二】

珠箔籠寒月。紗牕背曉燈。夜來巾上淚。一半是春冰。

【三】

關山征戍遠。閨閣別離難。苦戰應鶴唳。寒衣不要寬。

殘春曲 禁中口號

禁苑殘鶯三四聲。景遲風慢暮春情。日西無事墻陰下。

長安春

閒蹋宮花獨自行。

青門柳枝軟無力。東風吹作黃金色。

街東酒薄醉易醒。

滿眼春愁消不得。

長樂坡送人賦得愁字

行人南北分征路。流水東西接御溝。

終日坡前恨離別。

謾名長樂是長愁。

長洲苑

春入長洲艸又生。鷓鴣飛起少人行。

年深不辨娃宮處。

夜夜蘇臺空月明。

憶江柳

曾栽楊柳江南岸。一別江南兩度春。

遙憶青青江岸上。

不知攀折是何人。

南浦別

南浦淒淒別。西風嫋嫋秋。一看腸一斷。好去莫回頭。

三年別

悠悠一別已三年。相望相思明月天。

腸斷青天望明月。

別來三十六回圓。

傷春詞

深淺檐花千萬枝。碧紗牕外嘯黃鸝。

殘粧含淚下簾坐。

盡日傷春春不知。

後宮詞

淚濕羅巾夢不成。夜深前殿按歌聲。

紅顏未老恩先斷。

斜倚薰籠坐到明。

白樂天詩集卷十九

律詩

五言七首
凡九十八首

吟元郎中白鬢詩兼飲雪水茶因題壁上

白樂天詩集卷十九

吟詠霜毛句。閉管雪水茶。城中展眉處。只是有元家。

吳七郎中山人待制班中偶贈絕句

金馬東門隻日開。漢庭待詔重仙才。

第三松樹非華表。

那得遼東鶴下來。

和張十八秘書謝裴相公寄馬

齒齊臆足毛頭膩。

祕閣張郎叱撥駒。

洗了頰花鬪假錦。

走時蹄汗蹋真珠。

青衫乍見曾驚否。

紅粟難賒得飽無。

丞相寄來應有意。

遣君騎去上雲衢。

答山侶

領下髭鬚半是絲。

光陰向後幾多時。

非無解挂管纓意。

未有支持伏臘資。

冒熱衝寒徒自取。

隨行逐隊欲何爲。

更慙山侶頻傳語。

五十歸來道未遲。

早朝思退居

霜嚴月苦欲明天。

忽憶閒居思浩然。

自問寒燈夜半起。

何如暖被日高眠。

唯慙老病披朝服。

莫慮飢寒計俸錢。

隨有隨無且歸去。

擬求豐足是何年。

曲江亭晚望

曲江岸北凭欄干。

水面陰生日脚殘。

塵路行多綠袍故。

風亭立久白鬚寒。

詩成開著閒心記。

山好遙偷病眼看。

不被馬前提省印。

何人信道是郎官。

初除主客郎中知制誥與王十一李七元九三舍人中書同宿話舊感懷

閒青靜話喜還悲。

聚散窮通不自知。

已分雲泥行異路。

忽驚鷄鶴宿同枝。

紫垣曹署榮華地。

白髮郎官老醜時。

莫怪不如君氣味。

此中來校十年遲。

西省對花憶忠州東坡新花樹因寄題東樓

每看闕下丹青樹。

不忘天邊錦繡林。

西掖垣中今日眼。

南賓樓上去年心。

花含春意無分別。

物感人情有淺深。

最憶東坡紅爛熳。

野桃山杏水林檎。

寄題忠州小樓桃花

再遊巫峽知何日。

總是秦人說向誰。

長憶小樓風月夜。

紅欄干上兩三枝。

中書連直寒食不歸因憶元九

去歲清明日。南巴古郡樓。

今年寒食夜。西省鳳池頭。

併上新人直。難隨舊伴遊。

誠知視草貴。未免對花愁。

鬢髮莖莖白。光陰寸寸流。

經春不同宿。何異在忠州。

春憶二林寺舊遊因寄郎滿晦三上人

一別東林三度春。

每春常似憶情親。

頭陀會裏爲逋客。

供奉班中作老臣。

清淨久辭香火伴。

塵勞難索幻泡身。

最慙僧社題牆處。

十八人名空一人。

和元少尹新授官

官穩身應泰。春風信馬行。縱忙無苦事。雖病有心情。厚祿兒孫飽。前驅道路榮。花時八入直。無暇賀元兄。

朝回和元少尹絕句

朝客朝回同望好。盡紆朱紫佩金銀。此時獨與君爲伴。馬上青袍唯兩人。

重和元少尹

鳳閣舍人京亞尹。白題俱未著緋衫。南宮起請無消息。朝散何時得入衙。

中書夜直夢忠州

閣下燈前夢。巴南城裏遊。覓花來渡口。尋寺到山頭。江色分明綠。猿聲依舊愁。禁鐘驚睡覺。唯不上東樓。

醉後

酒後高歌且放狂。門前閒事莫思量。猶嫌小戶長先醒。不得多時住醉鄉。

待漏入閣書事奉贈元九學士閣老

衙排宣政仗。門啓紫宸關。彩筆停書命。花輒趁立班。稀星點銀燭。殘月墮金環。開漏猶傳水。明河漸下山。從東分地色。向北仰天顏。碧縷爐煙直。紅垂珮尾閒。綸閣慙竝入。翰苑忝先攀。笑我青袍故。饒君茜綬殷。詩仙歸洞裏。酒病滯人閒。

好去鴛鴦侶。冲天便不還。

晚春重到集賢院

官曹清切非入境。風日鮮明是洞天。滿砌荆花鋪紫毯。隔牆榆莢撒青錢。前時謫去三千里。此地辭來十四年。虛薄至今慙舊職。院名擡舉號爲賢。

紫薇花

絲綸閣下文書靜。鐘鼓樓中刻漏長。獨坐黃昏誰是伴。紫薇花對紫薇郎。

卜居

遊官京都二十春。貧中無處可安貧。長羨蝸牛猶有舍。不如碩鼠解藏身。且求容立錐頭地。免似漂流木偶人。但道吾廬心便足。敢辭湫隘與蠶塵。

題新居寄元八

青龍岡北近西邊。移入新居便泰然。冷巷閉門無客到。煖簷移榻向陽眠。階墀寬窄纔容足。墻壁高低粗及肩。莫羨昇平元八宅。自思買用幾多錢。

登龍尾道南望憶廬山舊隱

龍尾道邊一望。香爐峯下去無因。青山舉眼三千里。白髮平頭五十人。自笑形骸紆組綬。將何言語掌絲綸。君恩壯健猶難報。況被年年老逼身。

馮閣老處見與嚴郎中酬和詩因戲贈絕句

乍來天上宜清淨。不用回頭望故山。縱有舊遊君莫憶。塵心起即墮人閒。

見于給事暇日上直寄南省諸郎官詩因以戲贈

倚作天仙弄地仙。誇張一日抵千年。黃麻敕勝長生錄。白紵詞嫌內景篇。

雲彩誤居青瑣地。風流合在紫微天。東曹漸去西垣近。鶴駕無妨更著鞭。

題新昌所居

宅小人煩悶。泥深馬鈍頑。街東閒處住。日午熱時還。院窄難栽竹。墻高不見山。

唯應方寸內。此地覺寬閒。

西省北院新構小亭種竹開窗東通騎省與李常侍隔窗小飲因題四韻

結託白鬚伴。因依青竹叢。題詩新壁上。過酒小窗中。深院晚無日。虛簷涼有風。

酬元郎中同制加朝散大夫書懷見贈

命服雖同黃紙上。官班不共紫垣前。青衫脫早差三日。白髮生遲校九年。

曩者定交非勢利。老來同病是詩篇。終身擬作臥雲伴。逐月須收燒藥錢。

五品足爲婚嫁主。袞袍著了好歸田。

初著緋戲贈元九

晚遇緣才拙。先衰被病牽。那知垂白日。始是著緋年。身外名徒爾。人閒事偶然。

我朱君紫綬。猶未得差肩。

和韓侍郎苦雨

潤氣凝柱礎。繁聲注瓦溝。閨窗不曉。涼引簾先秋。葉濕蠶應病。泥稀燕亦愁。

仍聞放朝夜。誤出到街頭。

連雨

風雨間蕭蕭。雞鳴暮復朝。碎聲籠苦竹。冷翠落芭蕉。水鳥投簷宿。泥蛙入戶跳。

仍聞蕃客見。明日欲追朝。

初加朝散大夫又轉上柱國

紫微今日煙霄地。赤嶺前年泥土身。得水魚還動鱗鬣。乘軒鶴亦長精神。

且慙身忝官階貴。未敢家嫌活計貧。柱國勳成私自問。有何功德及生人。

行簡初授拾遺同早朝入閣因示十二韻

夜色尚蒼蒼。槐陰夾道長。聽鐘出長樂。傳鼓到新昌。宿雨沙隄潤。秋風樺燭香。

馬駟欺地軟。人健得天涼。待漏排闥闥。停珂擁建章。爾隨黃閣老。吾次紫微郎。

竝入連稱籍，齊趨對折方。圖班花接萼，綽立鴈分行。近職誠爲美，微才豈合當。綸言難下筆，諫紙易盈箱。老去何僂佂，時來不料量。唯求致身地，相誓答恩光。

立秋日登樂遊園

蕭颯涼風與衰鬢。

誰教計會一時秋。

獨行獨語曲江頭。

回馬遲遲上樂遊。

新秋早起有懷元少尹

蕭颯涼風與衰鬢。

誰教計會一時秋。

秋來轉覺此身衰。

漆匣鏡明頭盡白。

銅餅水冷齒先知。

光陰縱惜難畱住。

老去相逢無別計。

強開笑口展愁眉。

夜筇

紫袖紅絃明月中。

絃凝指咽聲停處。

別有深情一萬重。

妻初授邑號告身

自彈自感聞低容。

絃凝指咽聲停處。

別有深情一萬重。

弘農舊縣授新封。

銅軸金泥詰一通。

我轉官階常自愧。

君加邑號有何功。

花牋印了排窠濕。

錦標裝來耀手紅。

倚得身名便備墮。

日高猶睡綠窗中。

送客南遷

我說南中事。

君應不願聽。

曾經身困苦。

不覺語丁寧。

春畚煙勃勃。

秋瘴露冥冥。

蛟蚋經冬活。

魚龍欲雨腥。

蛟蚋經冬活。

魚龍欲雨腥。

水蟲能射影。

山鬼解藏形。

穴掉巴蛇尾。林飄鳩鳥翎。颶風千里黑。蕪草四時青。客似驚弦馬。舟如委浪萍。

誰人勸言笑。何計慰漂零。慎勿琴離膝。長須酒滿瓶。大都從此去。宜醉不宜醒。

暮歸

不覺百年半。何曾一日閒。朝隨燭影出。暮趁鼓聲還。囊裏非無酒。牆頭亦有山。

歸來常困臥。早晚得開顏。

寄遠

欲忘忘未得。欲去去無由。兩腋不生翅。二毛空滿頭。坐看新落葉。行上最高樓。

暝色無邊際。茫茫盡眼愁。

舊房

遠壁秋聲蟲絡絲。入簷新影月低眉。牀帷半故簾旌斷。仍是初寒欲夜時。

錢侍郎使君以題廬山草堂詩見寄因酬之

殷勤江郡守。悵望掖垣郎。慙見新瓊什。思歸舊草堂。事隨心未得。名與道相妨。

若不休官去。人閒到老忙。

寄山僧

眼看過半百。早晚掃巖扉。白首誰畱住。青山自不歸。百千萬劫障。四十九年非。

會擬抽身去。當風抖擻衣。

慈恩寺有感時約直初遣居敬方病。

自問有何惆悵事。寺門臨入卻遲迴。李家哭泣元家病。柿葉紅時獨自來。

酬嚴十八郎中見示

口厭含香握脈蘭。紫微青瑣舉頭看。忽驚鬢後蒼浪髮。未得心中本分官。

夜酌滿容花色暖。秋吟切骨玉聲寒。承明長短君應入。莫憶家江七里灘。

寄王祕書

霜菊花萎日。風梧葉碎時。怪來秋思苦。緣詠祕書詩。

中書寓直

繚繞宮牆圍禁林。半開閨闥曉沈沈。天晴更覺南山近。月出方知西掖深。

病對詞頭慙彩筆。老看鏡面愧華簪。自嫌野物將何用。土木形骸麋鹿心。

自問

黑花滿眼絲滿頭。早衰因病病因愁。途氣味已諳盡。五十不休何日休。

曲江獨行招張十八

曲江新歲後。冰與水相和。南岸猶殘雪。東風未有波。偶遊身獨自。相憶意如何。

莫待春深去。花時鞍馬多。

新居早春二首

靜巷無來客。深居不出門。鋪沙蓋苔面。掃雪擁松根。漸暖宜閒步。初晴愛小園。

覓花都未有。唯覺樹枝繁。

【二】

池潤東風暖。閒行蹋草芽。呼童遣移竹。畱客伴嘗茶。雷滴簷冰盡。塵浮隙日斜。

新居未曾到。鄰里是誰家。

新昌新居書事四十韻。因寄元郎中張博士

胃寵已三遷。歸朝始二年。囊中貯餘俸。郭外買閒田。狐兔同三選。蒿萊共一壠。

新園聊刻機。舊屋且扶顛。簷漏移傾瓦。梁欹換蠹椽。平治遶臺路。整頓近階甃。

巷狹開容駕。牆低疊過肩。門閭堪駐蓋。堂室可鋪筵。丹鳳樓當後。青龍寺在前。

市街塵不到。宮樹影相連。省吏嫌坊遠。豪家笑地偏。敢勞賓客訪。或望子孫傳。

不覓他人愛。唯將自性便。等閒栽樹木。隨分占風煙。逸致因心得。幽期遇境牽。

松聲疑澗底。草色勝河邊。虛潤冰銷地。晴和日出天。苔行滑如簞。莎坐軟於綿。

簾每當山卷。帷多待月褰。籬東花掩映。窗北竹嬋娟。迹慕青門隱。名慙紫禁仙。

假歸思晚沐。朝去戀春眠。拙薄才無取。疎慵職不專。題墻書命筆。沽酒率分錢。
 柏杵春靈藥。銅瓶漱暖泉。爐香穿蓋散。籠燭隔紗然。陳室何曾掃。陶琴不要絃。
 屏除俗事盡。養活道情全。尚有妻孥累。猶爲紅綬纏。終須拋爵祿。漸擬斷腥羶。
 大抵宗莊叟。私心事竺乾。浮榮水割字。眞諦火生蓮。梵部經十二。玄書字五千。
 是非都付夢。語默不妨禪。博士官猶冷。郎中病已痊。多同僻處住。久結靜中緣。
 緩步攜筇杖。徐吟展蜀箋。老宜閒語話。悶憶好詩篇。蟹棹來方瀉。蒙茶到始煎。
 無辭數相見。鬢髮各蒼然。

喜敏中及第偶示所懷

自知羣從爲儒少。豈料詞場中第頻。桂折一枝先許我。楊穿三葉盡驚人。
 轉於文墨須留意。貴向煙霄早致身。莫學爾兄年五十。蹉陀始得掌絲綸。

久不見韓侍郎戲題四韻以寄之

近來韓閣老。疎我我心知。戶大嫌甜酒。才高笑小詩。靜吟乖月夜。閒醉曠花時。
 還有愁同處。春風滿鬢絲。

寄白頭陀

近見頭陀伴。云師老更慵。性靈閒似鶴。顏狀古於松。山裏猶難覓。人閒豈易逢。

仍聞移住處。太白最高峯。

和韓侍郎題楊舍人林池見寄

渠水闌流春凍解。風吹日炙不成凝。鳳池冷暖君諳在。二月因何更有冰。

勤政樓西老柳

半朽臨風樹。多情立馬人。開元一株柳。長慶二年春。

偶題閣下廳

靜愛青苔院。深宜白髮翁。貌將松共瘦。心與竹俱空。暖有低簷日。春多颺幕風。
 平生閒境界。盡在五言中。

予與故刑部李侍郎早結道友以藥術爲事與故京兆元尹晚爲詩侶有林

泉之期周歲之閒二君長逝李住曲江北元居昇平西追感舊遊因貽同志

從哭李來傷道氣。自亡元後減詩情。金丹同學都無益。水竹鄰居竟不成。

月夜若爲遊曲水。花時那忍到昇平。如年七十身猶在。但恐傷心無處行。

送馮舍人閣老往襄陽

紫微閣底送君回。第二廳簾下不開。莫戀漢南風景好。峴山花盡早歸來。

莫走柳條詞送別

南陌傷心別。東風滿把春。莫欺楊柳弱。勸酒勝於人。

酬韓侍郎張博士雨後遊曲江見寄

小園新種紅櫻樹。閒遶花行便當遊。

何必更隨鞍馬隊。

衝泥蹋雨曲江頭。

元家花

今日元家宅。櫻桃發幾枝。稀稠與顏色。

一似去年時。失卻東園主。春風可得知。

代人贈王員外

好在王員外。平生記得不。共賒黃叟酒。

同上莫愁樓。靜接殷勤語。狂隨爛熳遊。

那知今日眼。相見冷於秋。

惜小園花

曉來紅夢凋零盡。但見空枝四五株。

前日狂風昨夜雨。

殘芳更合得存無。

蕭相公宅遇自遠禪師有感而贈

宦途堪笑不勝悲。

昨日榮華今日衰。

轉似秋蓬無定處。

長於春夢幾多時。

半頭白髮慙蕭相。

滿面紅塵問遠師。

應是世閒緣未盡。

欲拋官去尙遲疑。

草詞畢。遇芍藥初開。因詠小謝紅藥當階詩。以爲一句未盡其狀。偶成十六韻。

罷草紫泥詔。起吟紅藥詩。詞頭封送後。花口拆開時。坐對鉤簾久。行觀步履遲。

兩三叢爛熳。十二葉參差。背日房微斂。當階朶旋欹。釵葶抽碧股。粉蕊撲黃絲。動蕩情無限。低斜力不支。周廻看未足。比喻語難爲。勾漏丹砂裏。僊僊火焰旗。彤雲賸根蒂。絳幘欠纓綉。況有晴風度。仍兼宿露垂。疑香熏罷畫。似淚著胭脂。有意畱連我。無言怨思誰。應愁明日落。如恨隔年期。茵莖泥連萼。玫瑰刺繞枝。等量無勝者。唯眼與心知。

喜張十八博士除水部員外郎

老何歿後吟聲絕。雖有郎官不愛詩。

無復篇章傳道路。空畱風月在曹司。

長嗟博士官猶屈。亦恐騷人道漸衰。

今日聞君除水部。喜於身得省郎時。

與沈楊二舍人閣老同食敕賜櫻桃翫物感恩因成十四韻

清曉趨丹禁。紅櫻降紫宸。驅禽養得熟。和葉摘來新。圓轉盤傾玉。鮮明籠透銀。內園題兩字。西掖賜三臣。焚惑品華赤。醞翻氣味真。如珠未穿孔。似火不燒人。杏俗難爲對。桃頑詎可偷。肉嫌盧橘厚。皮笑荔枝皺。瓊液酸甜足。金丸大小勻。偷須防曼倩。惜莫擲安仁。手擘纔離核。匙抄半是津。甘爲舌上露。煖作腹中春。已懼長尸祿。仍驚數食珍。最慙恩未報。飽餒不才身。

送嚴大夫赴桂州

地壓坤方重。官兼憲府雄。桂林無瘴氣。柏署有清風。山水衙門外。旌旗樓殿中。大夫應絕席。詩酒與誰同。

春夜宿直

三月十四夜。西垣東北廊。碧梧葉重疊。紅藥樹低昂。月砌漏幽影。風簾飄閣香。禁中無宿客。誰伴紫微郎。

夏夜宿直

人少庭宇曠。夜涼風露清。槐花滿院氣。松子落階聲。寂寞挑燈坐。沈吟蹋月行。年衰自無趣。不是厭承明。

七言十二句贈駕部吳郎中七兄

四月天氣和且清。綠槐陰合沙堤平。獨騎善馬銜鈴穩。初著單衣肢體輕。退朝下直少徒侶。歸舍閉門無送迎。風生竹夜窗閒臥。月照松時臺上行。春酒冷嘗三數盞。曉琴閒弄十餘聲。幽懷靜境何人別。唯有南宮老駕兄。

玉真張觀主下小女冠阿容

綽約小天仙。生來十六年。姑山半峯雪。瑤水一枝蓮。晚院花留立。春窗月伴眠。迴眸雖欲語。阿母在傍邊。

龍花寺主家小尼

郭代公愛姬薛氏。幼嘗爲尼。小名仙人子。

頭青眉眼細。十四女沙彌。夜靜雙林怕。春深一食飢。步慵行道困。起晚誦經遲。應似仙人子。花宮未嫁時。

訪陳二

曉垂朱綬帶。晚著白綸巾。出去爲朝客。歸來是野人。兩餐聊過日。一榻足容身。此外皆閒事。時時訪老陳。

晚庭逐涼

送客出門後。移牀下砌初。趁涼行繞竹。引睡臥看書。老更爲官拙。慵多向事疎。松窗倚藤杖。人道似僧居。

曲江憶李十一

李君歿後共誰遊。柳岸荷亭兩度秋。獨遶曲江行一匝。依前還立水邊愁。

江亭翫春

江亭乘曉閱衆芳。春妍景麗草樹光。日消石桂綠嵐氣。風墜木蘭紅露漿。水蒲漸展書帶葉。山橘半含琴軫房。何物春風吹不變。愁人依舊鬢蒼蒼。

聞夜砧

誰家思婦秋擣帛，
應到天明頭盡白。

月苦風凄砧杵悲，
一聲添得一莖絲。

八月九月正長夜。

千聲萬聲無了時。

二〇五二

板橋路

梁苑城西二十里，
曾共玉顏橋上別。

一渠春水柳千條，
不知消息到今朝。

若爲此路今重過。

十五年前舊板橋。

青門柳

青青一樹傷心色。

曾入幾人離恨中。

爲近都門多送別。

長條折盡減春風。

梨園弟子

白頭垂淚話梨園。

五十年前雨露恩。

莫問華清今日事。

滿山紅葉鎖宮門。

暮江吟

一道殘陽鋪水中。

半江瑟瑟半江紅。

可憐九月初三夜。

露似真珠月似弓。

思婦眉

春風搖蕩自東來。

折盡櫻桃綻盡梅。

惟餘思婦愁眉結。

無限春風吹不開。

怨詞

奪寵心那慣。

尋思倚殿門。

不知移舊愛。

何處作新恩。

寒閨怨

寒月沈沈洞房靜。

眞珠簾外梧桐影。

秋霜欲下手先知。

燈底裁縫剪刀冷。

秋房夜

雲露青天月漏光。

中庭立久卻歸房。

水窗席冷未能臥。

挑盡殘燈秋夜長。

採蓮曲

菱葉紫波荷颭風。

荷花深處小船通。

逢郎欲語低頭笑。

碧玉搔頭落水中。

鄰女

娉婷十五勝天仙。

白日姮娥旱地蓮。

何處閒教鸚鵡語。

碧紗窗下繡牀前。

閨婦

斜凭繡牀愁不動。

紅銷帶緩綠鬟低。

遼陽春盡無消息。

夜合花前日又西。

移牡丹栽

金錢買得牡丹栽。

何處辭叢別主來。

紅芳堪惜還堪恨。

百處移將百處開。

聽夜箏有感

江州去日聽箏夜。

白髮新生不願聞。

如今格是頭成雪。

彈到天明亦任君。

琵琶

絃清撥刺語錚錚。

背卻殘燈就月明。

賴是心無惆悵事。

不然爭奈子絃聲。

和殷協律琴思

秋水蓮冠春草裙。

依稀風調似文君。

煩君玉指分明語。

知是琴心伴不聞。

後宮詞

雨露由來一點恩。

爭能遍布及千門。

三千宮女胭脂面。

幾箇春來無淚痕。

聽彈湘妃怨

玉軫朱絃瑟瑟微。

吳娃徵調奏湘妃。

分明曲裏愁雲雨。

似道蕭蕭郎不歸。

閒坐

煖擁紅爐火。

閒搔白髮頭。

百年慵裏過。

萬事醉中休。

有室同摩詰。

無兒比鄧攸。

莫論身在日。

身後亦無憂。

不睡

焰短寒缸盡。

聲長曉漏遲。

年衰自無睡。

不是守三尸。

白樂天詩集卷二十

律詩

七言五首
凡四十四首

初罷中書舍人

自慙拙宦叨清貴。

還有癡心怕素餐。

或望君臣相獻替。

可圖妻子免飢寒。

性疎豈合承恩久。

命薄元知濟事難。

分寸寵光酬未得。

不休更擬覓何官。

宿陽城驛對月

自後詩赴
杭州路中作

親故尋回駕。妻孥未出關。

鳳凰池上月。送我過商山。

商山路有感并序

前年夏予自忠州刺史除書歸闕。時刑部李十一侍郎戶部崔二十員外亦自澧果二郡守徵還。相次入關。皆同此路。今年予自中書舍人授杭州刺史。又由此途出。二君已逝。予獨南行。追歎興懷。慨然成詠。後來有與予約直虞平游者。見此短什。能無惻惻乎。儻未忘情。請爲繼和。長慶二年七月三十日。題於內鄉縣南亭云爾。

憶昨徵還日。三人歸同路。此生都是夢。前事旋成空。杓直泉埋玉。虞平燭過風。

唯殘樂天在。頭白向江東。

重感

停驂歇路隅。重感一長吁。擾擾生還死。紛紛榮又枯。因支青竹杖。閒捋白髭鬚。

莫歎身衰老。交游半已無。

逢張十八員外籍

旅思正茫茫。相逢此道傍。曉嵐林葉間。秋露草花香。白髮江城守。青衫水部郎。

客亭同宿處。忽似夜歸鄉。

赴杭州重宿棣華驛。見楊八舊詩感題一絕

往恨今愁應不殊。題詩梁下又踟躕。羨君猶夢見兄弟。我到天明睡亦無。

寓言題僧

劫風火起燒荒宅。苦海波生蕩破船。力小無因救焚溺。清涼山下且安禪。

內鄉縣郵路作

日下風高野路涼。緩驅疲馬聞思鄉。渭邨秋物應如此。棗赤梨紅稻穗黃。

路上寄銀匙與阿龜

謫宦心都慣。辭鄉去不難。緣留龜子住。涕淚一闌干。小子須嬌養。鄰婆爲好看。

銀匙封寄汝。憶我卽加餐。

山泉煎茶有懷

坐酌泠泠水。看煎瑟瑟塵。無由持一盃。寄與愛茶人。

鄂州贈別王八使君

昔是詩狂客。今爲酒病夫。強吟翻恨望。縱醉不歡娛。鬢髮三分白。交親一半無。

郢城君莫厭。猶校近京都。

吉祥寺見錢侍郎題名

雲雨三年別。風波萬里行。愁來正蕭索。況見故人名。

重到江州感舊遊題郡樓十一韻

掌綸知是忝。剖竹信爲榮。才薄官仍重。恩深責尙輕。昔徵從典午。今出自承明。鳳詔休揮翰。漁歌欲濯纓。還乘小艤。卻到古湓城。醉客臨江待。禪僧出郭迎。青山滿眼在。白髮半頭生。又校三年老。何曾一事成。重過蕭寺宿。再上庾樓行。雲水新秋思。閩閩舊日情。郡民猶認得。司馬詠詩聲。

贈江州李十使君員外十二韻

我本江湖上。悠悠任運身。朝隨賣藥客。暮伴釣魚人。迹爲燒丹隱。家緣嗜酒貧。經過剡溪雪。尋覓武陵春。豈有疎狂性。堪爲侍從臣。仰頭驚鳳闕。下口觸龍鱗。劔珮辭天上。風波向海濱。非賢虛偶聖。無屈敢求伸。昔去曾同日。今來卽後塵。

中年俱白髮。左宦各朱輪。長短才雖異。榮枯事略均。殷勤李員外。不合不相親。

題別遺愛草堂兼呈李十使君

李亦廬山人。常隱白鹿洞。

曾住爐峯下。書堂對藥臺。斬新蘿徑合。依舊竹窗開。砌水親開決。池荷手自栽。五年方覽至。一宿又須回。縱未長歸得。猶勝不到來。君家白鹿洞。聞道亦生苔。

重題

泉石尚依依。林疎僧亦稀。何年辭水閣。今夜宿雲扉。謾獻長楊賦。虛拋薜荔衣。不能成一事。贏得白頭歸。

夜泊旅望

少事多愁客。中宵起望鄉。沙明連浦月。帆白滿船霜。近海江彌潤。迎秋夜更長。煙波三十宿。猶未到錢塘。

九江北岸遇風雨

黃梅縣邊梅黃雨。白頭浪裏白頭翁。九江闊處不見岸。五月盡時多惡風。

人閒穩路應無限。何事拋身在此中。

舟中晚起

日高猶掩水窗眠。枕簟清涼八月天。泊處或依沽酒店。宿時多伴釣魚船。退身江海應無用。憂國朝廷自有賢。且向錢塘湖上去。冷吟閒醉二三年。

秋 寒

雪鬢年顏老。霜庭景氣秋。病看妻檢藥。寒遣婢梳頭。身外名何有。人閒事且休。澹然方寸內。唯擬學虛舟。

初到郡齋寄錢湖州李蘇州

聊取二郡一嘲。故用落句之戲。

俱來滄海郡。半作白頭翁。謾道風煙接。何曾笑語同。吏稀秋稅畢。客散晚亭空。霽後當樓月。潮來滿座風。雲溪殊冷僻。茂苑太繁雄。唯此錢塘郡。閒忙恰得中。

對酒自勉

五十江城守。停杯一自思。頭仍未盡白。官亦不全卑。榮寵尋過分。歡娛已校遲。肺傷雖怕酒。心健尚誇詩。醉舞吳娘袖。春歌蠻子詔。猶堪三五歲。相伴醉花時。

郡樓夜宴留客

北客勞相訪。東樓爲一開。寒簾待月出。把火看潮來。豔聽竹枝曲。香傳蓮子杯。寒天殊未曉。歸騎且遲迴。

醉題候仙亭

蹇步垂朱綬。華纓映白鬚。何因駐衰老。只有且歡娛。酒興還應在。詩情可便無。登山與臨水。猶未要人扶。

東 院

松下軒廊竹下房。

暖簷晴日滿繩牀。

淨名居士經三卷。

榮啓先生琴一張。

老去齒衰嫌橘醋。

病來肺渴覺茶香。

有時閒酌無人伴。

獨自騰騰入醉鄉。

虛白堂前衙退後。

更無一事到中心。

移牀就日檐閒臥。

臥詠閒詩側枕琴。

閒夜詠懷因招周協律劉薛二秀才。

世名檢束爲朝士。

心性疎慵是野夫。

高置寒燈如客店。

深藏夜火似僧爐。

香濃酒熟能嘗否。

冷澹詩成肯和無。

若厭雅嗔須俗飲。

妓筵勉力爲君鋪。

晚興

極浦收殘雨。

高城駐落暉。

山明虹半出。

松間鶴雙歸。

閒吟倚新竹。

筠粉汗朱衣。

將吏隨衙散。

文書入務稀。

衰病

老與病相仍。

華管髮不勝。

行多朝散藥。

睡少夜停燈。

性多移不得。

郡政謾如繩。

祿食分供鶴。

朝衣減施僧。

病中對病鶴

同病病夫憐病鶴。

精神不損翅翎傷。

未堪再舉摩霄漢。

只合相隨覓稻梁。

但作悲吟和喉喚。

難將俗貌對昂藏。

唯應一事宜爲伴。

我髮君毛俱似霜。

夜歸

半醉閒行湖岸東。

馬鞭敲鐙響瓊瑰。

萬株松樹青山上。

十里沙堤明月中。

樓角漸移當路影。

潮頭欲過滿江風。

歸來未放笙歌散。

畫戟門開蠟燭紅。

臘後歲前遇景詠意

海梅半白柳微黃。

凍水初融日欲長。

迎春先有好風光。

郡中起晚聽衙鼓。

城上行慵倚女牆。

公事漸閒身且健。

使君殊未厭餘杭。

白髮

雪髮隨梳落。

霜毛繞鬢垂。

加添老氣味。

改變舊容儀。

最憎明鏡裏。

黑白半頭時。

不肯長如漆。

無過總作絲。

錢湖州以箬下酒李蘇州以五酸酒相次寄到無因同飲聊詠所懷

勞將箬下忘憂物。

寄與江城愛酒翁。

鐘脚三州何處會。

甕頭一盞幾時同。

傾如竹葉盈樽綠。

飲作桃花上面紅。

莫怪殷勤最相憶。

曾陪西省與南宮。

花樓望雪命宴賦詩

連天際海白皚皚。

好上高樓望一回。

何處更能分道路。

此時兼不認池臺。

萬重雲樹山頭翠。

百尺花樓江畔開。

素壁聯題分韻句。

紅爐巡飲暖寒杯。

冰鋪湖水銀爲面。

風卷汀沙玉作堆。

絳惹舞人春艷曳。

勾留醉客夜徘徊。

儉將虛白堂前鶴

失卻樟亭驛後梅

別有故情偏憶得

曾經窮苦照書來

晚歲

壯歲忽已去

浮榮何足論

身為百口長

官是一州檜

不覺白雙鬢

徒言朱兩轡

病難施郡政

老未答君恩

歲暮別兄弟

年衰無子孫

惹愁諳世網

治苦賴空門

學帶知腰瘦

看燈覺眼昏

不緣衣食繫

尋合返丘園

宿竹閣

晚坐松檐下

青眠竹閣閒

清虛當服藥

幽獨抵歸山

巧未能勝拙

忙應不及閒

無勞別修道

卽此是玄關

歲暮柱衢州張使君書并詩因以長句報之

西州彼此意何如

官職蹉跎歲欲除

浮石潭邊停五馬

望濤樓上得雙魚

萬言舊手才難敵

張曾應萬言登科

五字新題思有餘

貧薄詩家無好物

反投桃李報瓊瑤

和薛秀才尋梅花同飲見贈

忽驚林下發寒梅

便試花前飲冷杯

白馬走迎詩客去

紅筵鋪待舞人來

歌聲怨處微微落

酒氣醺時旋旋開

若到歲寒無雨雪

猶應醉得兩三回

與諸客空腹飲

隔宿書招客

平明飲暖寒

麴神寅日合

酒聖卯時歡

促膝纔飛白

醅顏已渥丹

碧籌攢米椀

紅袖拂毬盤

醉後歌尤異

狂來舞可難

拋杯語同坐

莫作老人看

白樂天詩後集卷一

格詩

凡八十
九首

郡齋暇日辱常州陳郎中使君早晚坐水西館書事詩十六韻見寄亦以

十六韻酬之

新年多暇日

晏起褰簾坐

睡足心更慵

日高頭未裹

徐傾下藥酒

稍爇煎茶火

誰伴寂寥身

無絃琴在左

遙思毘陵館

春深物嫋娜

波拂黃柳梢

風搖白梅朵

衙門排曉戟

鈴閣開朝鎖

太守水西來

朱衣乘素舸

良辰不易得

佳會無由果

五馬正相望

雙魚忽前墮

魚中獲瑰寶

持翫何磊砢

一百六十言

字字靈珠顆

上申心款曲

下敘時艱軻

才富不如君

道孤還似我

敢辭官遠慢

且貴身安妥

勿復問榮枯

冥心無不可

官舍

高樹換新葉

陰陰覆地隅

何言太守宅

有似幽人居

太守臥其下

閒慵兩有餘

起嘗一甌茗

行讀一卷書

早梅結青實

殘櫻落紅珠

稚女弄庭果

嬉戲牽人裾

是日晚彌靜。巢禽下相呼。嘖嘖護兒鵲。啞啞母子烏。豈唯云鳥爾。吾亦引吾雛。

吾雛字阿羅。阿羅纔七齡。嗟吾不才子。憐爾無弟兄。撫養雖驕駘。性識頗聰明。學母畫眉樣。效吾詠詩聲。我齒今欲墮。汝齒昨始生。我頭髮盡落。汝頂髻初成。老幼不相待。父衰汝孩嬰。緬想古人心。慈愛亦不輕。蔡邕念文姬。于公歎緹縈。敢求得汝力。但未忘父精。

題小橋前新竹招客

鴈齒小虹橋。垂簷低白屋。橋前何所有。苒苒新生竹。皮開拆褐錦。節露抽青玉。筠翠如可餐。粉霜不忍觸。閒吟聲未已。幽翫心難足。管領好風煙。輕欺凡草木。誰能有月夜。伴我林中宿。為君傾一杯。狂歌竹枝曲。

病中逢秋招客夜酌

不見詩酒客。臥來半月餘。合和新藥草。尋檢舊方書。晚霽煙景度。早涼牕戶虛。雪生衰鬢久。秋入病心初。臥箠斲竹冷。風襟邛葛疎。夜來身校健。小飲復何如。

醉歌

示故人商玲瓏

罷胡琴。掩秦瑟。玲瓏再拜歌初畢。誰道使君不解歌。聽唱黃雞與白日。

黃雞催曉丑時鳴。白日催年酉時沒。腰閒紅綬繫未穩。鏡裏朱顏看已失。

玲瓏玲瓏奈老何。使君歌了汝更歌。

席上答微之

我住浙江西。君去浙江東。勿言一水隔。便與千里同。富貴無人勸君酒。今宵為我盡杯中。

蘇州李中丞以元日郡齋感懷詩寄微之及予。輒依來篇七言八韻。走筆

奉答兼呈微之

白首餘杭白太守。落魄拋名來已久。一辭渭北故園春。再把江南新歲酒。杯前笑歌徒勉強。鏡裏形容漸衰朽。領郡慙當潦倒年。鄰州喜得平生友。長洲草接松江岸。曲水花連鏡湖口。老去還能痛飲無。春來曾作閒遊否。憑鴛鴦傳語報李六。倩雁將書與元九。莫嗟一日日催人。且貴一年年入手。

食飽

食飽拂枕臥。睡足起閒吟。淺酌一杯酒。緩彈數聲琴。既可暢情性。亦足傲光陰。誰知利盡無。無復長安心。

十八郎中在郡日。改制東南樓。因名清輝。未立標榜。微歸。郎署。予既到郡。

性愛樓居。宴遊其閒。頗有幽致。聊成十韻。兼戲寄嚴

嚴郎制茲樓。立名曰清輝。未及署花榜。遽徵還粉闈。去來三四年。塵土登者稀。今春新太守。洒掃施簾幃。院柳煙婀娜。簷花雪霏微。看山倚前戶。待月關東扉。碧窗夏瑤瑟。朱欄飄舞衣。燒香捲幕坐。風燕雙雙飛。君作不得住。我來幸因依。始知天地閒。靈境有所歸。

南亭對酒送春

含桃實已落。紅薰花尚薰。冉冉三月盡。晚鶯城上聞。獨持一杯酒。南亭送殘春。半酣忽長歌。歌中何所云。云我五十餘。未是苦老人。刺史二千石。亦不為賤貧。天下三品官。多老於我身。同年登第者。零落無一分。親故半為鬼。僮僕多見孫。念此聊自解。逢酒且歡欣。

翫新庭樹因詠所懷

靄靄四月初。新樹葉成陰。動搖風景麗。蓋覆庭院深。下有無事人。竟日此幽尋。豈唯翫時物。亦可開煩襟。時與道人語。或聽詩客吟。度春足芳色。入夜多鳴禽。偶得幽閑境。遂忘塵俗心。始知真隱者。不必在山林。

仲夏齋戒月

仲夏齋戒月。三旬斷腥羶。自覺心骨爽。行起身翩翩。始知絕粒人。四體更輕便。初能脫病患。久必成神仙。禦寇馭冷風。赤松游紫煙。常疑此說謬。今乃知其然。我年過半百。氣衰神不全。已垂兩鬢絲。難補三丹田。但減蕙血味。稍結清淨緣。脫巾且修養。聊以終天年。

除官去未閒

除官去未閒。半月恣遊討。朝尋霞外寺。暮宿波上島。新樹少於松。平湖半連草。躋攀有次第。賞翫無昏早。有時騎馬醉。兀兀冥天造。窮通與生死。其奈吾懷抱。江山信為美。齒髮行將老。在郡誠未厭。歸鄉去亦好。

三年為刺史二首

三年為刺史。無政在人口。唯向郡城中。題詩十餘首。慙非甘棠詠。豈有思人否。

【二】

三年為刺史。飲冰復食蘗。唯向天竺山。取得兩片石。此抵有千金。無乃傷清白。

別萱桂

使君竟不住。萱桂徒栽種。桂有留人名。萱無忘憂用。不如江畔月。步步來相送。

自餘杭歸宿淮口作

爲郡已多暇。猶少勤吏職。罷郡更安閑。無所勞心力。舟行明月下。夜泊清淮北。豈止吾一身。學家同燕息。三年請祿俸。頗有餘衣食。乃至僮僕閒。皆無凍餒色。行行弄雲水。步步近鄉國。妻子在我前。琴書在我側。此外吾不知。於焉心自得。

舟中李山人訪宿

日暮舟悄悄。煙生水沈沈。何以延宿客。夜酒與秋琴。來客道門子。來自嵩高岑。軒軒舉雲貌。豁豁開清襟。得意言語斷。入玄滋味深。默然相顧哂。心適而忘心。洛下卜居。

三年典郡歸。所得非金帛。天竺石兩片。華亭鶴一隻。飲啄供稻粱。包裹用茵席。誠知是勞費。其奈心愛惜。遠從餘杭郭。同到洛陽陌。下擔拂雲根。開籠展霜翮。貞姿不可雜。高性宜其適。遂就無塵坊。仍求有水宅。東南得幽境。樹老寒泉碧。池畔多竹陰。門前少人跡。未請中庶祿。且脫雙驂易。豈獨爲身謀。安吾鶴與石。

洛中偶作

自此後在東都作

五年職翰林。四年洩潯陽。一年巴郡守。半年南宮郎。二年直綸閣。三年刺史堂。凡此十五載。有詩千餘章。境與周萬象。土風備四方。獨無洛中作。能不心悵悵。今爲春宮長。始來遊此鄉。徘徊伊澗上。睥睨嵩年傍。遇物輒一詠。一詠傾一觴。

筆下成釋憾。卷中同補亡。往往顧自哂。眠昏還蒼蒼。不知老將至。猶自放詩狂。

贈蘇少府

籍甚二十年。今日方款顏。相送嵩洛下。論心杯酒閒。何爲顧出入。府寮多閉關。蒼髮彼此老。白日尋常閑。朝欲攜手出。暮思聯騎還。何當挈一榼。同宿龍門山。

移家入新宅

移家入新宅。罷郡有餘資。既可避燥濕。復免憂寒飢。疾平未還假。官閒得分司。幸有俸祿在。而無職役羈。清且盥漱畢。開軒卷簾幃。家人及雞犬。隨我亦熙熙。取興不過酒。放情或作詩。何必苦修道。此卽是無爲。外累信已遣。中懷時有思。有思一何遠。默坐低雙眉。十載囚竄客。萬里征戍兒。春朝鑲籠鳥。冬夜支牀龜。驛馬走四蹄。痛酸無歇期。磴牛封兩目。昏閉何人知。誰能脫放去。四散任所之。各得適其性。如吾今日時。

琴

置琴曲几上。慵坐但含情。何煩故揮弄。風絃自有聲。

鶴

人各有所好。物固無常宜。誰謂爾能舞。不如閑立時。

自詠

夜鏡隱白髮。朝酒發紅顏。可憐假年少。自笑須臾閒。
 玄鬢化為雪。未聞休得官。咄哉箇丈夫。心性何墮頑。
 高聲發一吟。似得詩中仙。引滿飲一瓊。盡忘身外緣。
 于今居處在。許我當中眠。眠罷又一酌。酌罷又一篇。
 誠知此事非。又過知非年。豈不欲自改。改即心不安。
 林下閒步。寄皇甫庶子。且向安處去。其餘皆老閑。

扶杖起病初。策馬力未任。既懶出門去。亦無客來尋。
 天曉煙景淡。樹寒鳥雀深。一酌池上酒。數聲竹間吟。
 晏起。寄言東曹長。當知幽獨心。以此遂成閒。閒步遶園林。

鳥鳴庭樹上。日照屋簷時。老去慵轉極。寒來起尤遲。
 神安體穩暖。此味何人知。睡足仰頭坐。兀然無所思。
 緬想長安客。早朝霜滿衣。彼此各自適。不知誰是非。
 厚薄被適性。高低枕得宜。若都遺四肢。

池畔二首
 疏理池東樹。此意人不知。欲爲待月處。

【二】

持刀剔密竹。竹少風來多。此意人不會。欲令池有波。

春葺新居

江州司馬日。忠州刺史時。栽松滿後院。種柳蔭前墀。
 況茲是我宅。葺藝固其宜。平旦領僕使。乘春親指揮。
 池水變綠色。池芳動清輝。尋芳弄水坐。盡日心熙熙。
 設如宅門外。有事吾不知。一物苟可適。萬緣都若遺。

贈言

捧贏獻千金。彼金何足道。繼觴贈一言。此言真可寶。
 況君春風面。柔促如芳草。二十方長成。三十向衰老。
 胡爲坐脈脈。不肯傾懷抱。鏡中桃李色。不得十年好。

泛春池

白蘋湘渚曲。綠篠剡溪口。各在天一涯。信美非吾有。
 霜竹百千竿。煙波六七畝。泓澄動堦砌。淡泞映戶牖。
 主人過橋來。雙童扶一叟。恐汗清冷波。塵纓先抖擻。
 波上一葉舟。舟中一樽酒。

酒開舟不繫。去去隨所偶。或遶蒲浦前。或泊桃鳥後。未撥落杯花。低衝拂面柳。半酣迷所在。倚榜兀回首。不知此何處。復是人寰否。誰知始疏鑿。幾主相傳受。楊家去云遠。田氏將非久。天與愛水人。終焉落吾手。

郡齋旬假命宴呈座客示郡寮

自此後在蘇州作

公門日兩衙。公假月三旬。衙用決簿領。旬以會親賓。公多及私少。勞逸常不均。況爲劇郡長。安得閒宴頻。下車已二月。開筵始今晨。初黔軍厨突。一拂郡榻塵。既備獻酬禮。亦具水陸珍。萍醅若溪醕。水繪松江鱗。侑食樂懸動。佐饋妓席陳。風流吳中客。佳麗江南人。歌節點隨袂。舞香遺在茵。清奏凝未闕。醜顏氣已春。衆賓勿遽起。羣寮且逡巡。無輕一日醉。用犒九日勤。微彼九日勤。何以治吾民。微此一日醉。何以樂吾身。

題西亭

朝亦視簿書。暮亦視簿書。簿書視未竟。蟋蟀鳴座隅。始覺芳歲晚。復嗟塵務拘。西園景多暇。可以少躊躇。池鳥澹容與。橋柳高扶疎。煙蔓擱青蕪。水花披白蕪。何人造茲亭。華敞綽有餘。四檐軒鳥翅。複屋羅蜘蛛。直廊抵曲房。竊窻深且虛。修竹夾左右。清風來徐徐。此宜宴佳賓。鼓瑟吹笙竽。荒淫卽不可。廢曠將何如。

幸有酒與樂。及時歡且娛。忽其解郡印。他人來此居。

郡中西園

閒園多芳草。春夏香靡靡。深樹足佳禽。且暮鳴不已。院門閉松竹。庭徑穿蘭芷。愛彼池上橋。獨來聊徒倚。魚依藻長樂。鷗見人暫起。有時舟隨風。盡日蓮照水。誰知郡府內。景物閒如此。始悟諠靜緣。何嘗繫遠邇。

北亭臥

樹綠晚陰合。池涼朝氣清。蓮開有佳色。鶴唳無凡聲。唯此閒寂境。愜我幽獨情。病假十五日。十日臥茲亭。明朝吏呼起。還復視黎甍。

一葉落

煩暑鬱未退。涼颺潛已起。寒溫與盛衰。遞相爲表裏。蕭蕭秋林下。一葉忽先萎。勿言一葉微。搖落從此始。

崔湖州贈紅石琴薦煥如錦文。無以答之。以詩酬謝

頽錦支綠綺。韻同相感深。千年古潤石。八月秋堂琴。引出山水思。助成金玉音。人閒無可比。比我與君心。

九日宴集醉題郡樓兼呈周殷二判官

前年九日在餘杭。呼賓命宴虛白堂。去年九日到東洛。今年九日來吳鄉。
 兩邊蓬鬢一時白。三處菊花同色黃。一日日知添老病。一年年覺惜重陽。
 江南九月未搖落。柳青蒲綠稻穠香。姑蘇臺榭倚蒼霞。太湖山水含清光。
 可憐假日好天色。公門吏靜風景涼。榜舟鞭馬取賓客。掃樓拂席排壺觴。
 胡琴鉦鏗指撥刺。吳娃美麗眉眼長。笙歌一曲思凝絕。金銅再拜光低昂。
 日脚欲落備燈燭。風頭漸高加酒漿。觥盞灑飛菌茗葉。舞臺擺落茱萸房。
 半酣憑檻起四顧。七堰八門六十坊。遠近高低寺閒出。東西南北橋相望。
 水道脈分棹鱗次。里閭葦布城冊方。人煙樹色無隙罅。十里一片青茫茫。
 自問有何才與政。高廳大館居中央。門有榮戟腰有章。刺史自古吳郡王。
 郊無戎馬郡無事。使君醉倒亦何妨。請君停杯聽我語。壯歲忽去還感傷。
 從事醒歸應不可。七十為期蓋是常。須知菊酒登高會。此語真實非虛狂。
 五句已過不為天。同微之贈別郭虛舟鍊師五十韻。從此多無二十場。

我為江司馬。君為荆判司。俱當愁悴日。始識虛舟師。師年三十餘。自誓好容儀。
 專心在鉛汞。餘力工琴棋。靜彈絃數聲。閒飲酒一卮。因指塵土下。蜉蝣良可悲。

不聞姑射上。千歲冰雪肌。不見遼城外。古今塚纍纍。嗟我天地閒。有術人莫知。
 得可逃死籍。不唯走三尸。授我參同契。其辭妙且微。六一闕扁鵲。子午守雄雌。
 我讀隨日悟。心中了無疑。黃芽與紫車。謂其坐致之。自負因自歎。人生號男兒。
 若不佩金印。即合翳玉芝。高謝人閒世。深結山中期。泥壇方合矩。鑄鼎圓中規。
 鐘磬一以動。瑞氣紅輝輝。齊心獨歎拜。中夜偷一窺。二物正訴合。厥狀何怪奇。
 網膠夫婦體。狎獵魚龍姿。簡寂館鐘後。紫霄峰曉時。心塵未淨潔。火候遂參差。
 萬壽觀刀圭。千功失毫釐。先生彈指起。蛇女隨煙飛。始知緣會閒。陰陽不可移。
 藥竈今夕罷。詔書明日追。追我復追君。次第承恩私。官雖小大殊。同立白玉墀。
 我直紫微闈。手進賞罰詞。君侍玉皇座。口含生殺機。直躬易媒孽。浮俗多瑕疵。
 轉徙今安在。越嶠吳江湄。一提支郡印。一建連帥旗。何言四百里。不見如天涯。
 秋風旦夕來。白日西南馳。雪霜各滿鬢。朱紫徒為衣。師從廬山洞。訪舊來於斯。
 尋君又覓我。風馭紛逶迤。輅据曳黃絹。鬚髮垂青絲。逢人但斂手。問道亦頷頤。
 孤雲難久留。十日告將歸。款曲話平昔。殷勤勉衰羸。後會杳何許。前心日磷緇。
 俗家無異物。何以充別資。素牋一百句。題附元家詩。朱頂鶴一隻。與師雲閒騎。
 雲閒鶴背上。故情若相思。時時摘一句。唱作步虛辭。

霓裳羽衣舞歌

和微之。○按今本無舞字。

我昔元和侍憲皇，曾陪內宴宴昭陽。
舞時寒食春風天，玉鉤欄下香案前。
虹裳霞帔走搖冠，細環紫綉佩珊瑚。
磬簫箏笛遞相攬，擊鞞彈吹聲遞進。
中序擘騷初入拍，秋竹竿裂春冰折。
小垂手後柳無力，斜曳裾時雲欲生。
上元點鬢招夢綠，王母揮袂別飛瓊。
翔鸞舞了卻收翅，喉鶴曲終長引聲。
一落人閒八九年，耳冷不曾聞此曲。
移領錢塘第二年，始有心情問絲竹。
清絃脆管纖纖手，教得霓裳一曲成。
便除庶子拋卻來，聞道如今各星散。
貪看案牘常侵夜，不聽笙歌直到秋。
閒君部內多樂徒，問有霓裳舞者無。

千歌萬舞不可數，就中最愛霓裳舞。
案前舞者顏如玉，不著人家俗衣服。
娉婷似不任羅綺，願聽樂懸行復止。
散序六奏未動衣，陽臺宿雲慵不飛。
飄然轉旋迴雪輕，嫣然縱送游龍驚。
煙蛾斂略不勝態，風袖低昂如有情。
繁音急節十二遍，跳珠撼玉何鏗錚。
當時乍見驚心目，凝視諦聽殊未足。
溢城但聽山鶯語，巴峽唯聞杜鵑哭。
玲瓏篔簹謝好箏，陳寵繁栗沈平笙。
虛白亭前湖水畔，前後祇應三度按。
今年五月至蘇州，朝鐘暮角催白頭。
秋來無事多閉閤，忽憶霓裳無處問。
答云七縣十萬戶，無人知有霓裳舞。

唯寄長歌與我來，題作霓裳羽衣譜。
千姿萬狀分明見，恰與昭陽舞者同。
疑從魂夢呼召來，似著丹青圖寫出。
君不見我歌云，驚破霓裳羽衣曲。
由來能事皆有主，楊氏創聲君造譜。
吳妖小玉飛作煙，越豔西施化爲土。
如君所言誠有是，君試從容聽我語。
妍媸優劣寧相遠，大都只在人擡舉。

四幅花箋碧閒紅，眼前髣髴觀形質。
我愛霓裳君合知，又不見我詩云曲愛霓裳未拍時。
君言此舞難得人，須是傾城可憐女。
嬌花巧笑久寂寥，娃館苧蘿空處所。
若求國色始翻傳，但恐人閒廢此舞。
李娟張態君莫嫌，亦擬隨宜且教取。

小童薛陽陶吹管，和浙西李大夫作
剪削乾蘆插寒竹，九孔漏聲五音足。
衰今又老誰其嗣，薛氏樂童年十二。
澗州城高霜月明，吟霜思月欲發聲。
翕然聲作疑管裂，訕然聲盡疑刀截。
急聲圓轉促不斷，櫛櫛鱗鱗似珠貫。
下聲乍墜石沈重，高聲忽舉雲飄蕭。

近來吹者誰得名，關雎老死李袁生。
指點之下師授聲，含嚼之閒天與氣。
山頭江底何悄悄，猿聲不喘魚龍聽。
有時婉軟無筋骨，有時頓挫生稜節。
緩聲展引長有條，有條直直如筆描。
明且公堂陳宴席，主人命樂娛賓客。

碎絲細竹徒紛紛。宮調一聲雄出羣。衆音觀縷不落道。有如部伍隨將軍。嗟爾陽陶方穉齒。下手發聲已如此。若教頭白吹不休。但恐聲名壓關李。

喙木曲

按才調集·文苑英華並作四不如酒

莫買寶剪刀。虛費千金直。我有心中愁。知君剪不得。莫磨解結錐。虛勞入氣力。我有腸中結。知君解不得。莫染紅絲線。徒誇好顏色。我有雙淚珠。知君穿不得。莫近紅爐火。炎氣徒相逼。我有兩鬢霜。知君消不得。刀不能剪。心愁。錐不能解。腸結。線不能穿。淚珠。火不能銷。鬢雪。不如飲此神聖杯。萬念千憂一時歇。

題靈巖寺

寺即吳館娃宮。鳴鹿。硯池。採香徑。遺跡在焉。

娃宮屢廊尋已傾。硯池香徑又欲平。二三月時但草綠。幾百年來空月明。使君雖老頗多思。攜觴領妓處處行。今愁古恨入絲竹。一曲涼州無限情。直自當時到今日。中閒歌吹更無聲。

雙石

蒼然兩片石。厥狀怪且醜。俗用無所堪。時人嫌不取。結從胚渾始。得自洞庭口。萬古遺水濱。一朝入吾手。擔舁來郡內。洗刷云泥垢。孔黑煙痕深。罅青苔色厚。

老蛟蟠作足。古劍插爲首。忽疑天上落。不似人間有。一可支吾琴。一可貯吾酒。峭絕高數尺。坳泓容一斗。五絃倚其左。一杯置其右。窪樽酌未空。玉山頽已久。人皆有所好。物各求其偶。漸恐少年場。不容垂白叟。廻頭問雙石。能伴老夫否。石雖不能言。許我爲三友。

宿東亭曉興

溫溫土爐火。耿耿紗籠燭。獨抱一張琴。夜入東齋宿。窗聲渡殘漏。簾影浮初旭。頭癢曉梳多。眼昏春睡足。負喧檐宇下。散步池塘曲。南鴈去未廻。東風來何速。雪依瓦溝白。草遶牆根綠。何言萬戶州。太守常幽獨。

日漸長贈周殷二判官

日漸長。春尚早。墻頭半露紅萼枝。池岸新鋪綠芽草。蹋草攀枝仰頭歎。何人知此春懷抱。年顏盛壯名未成。官職欲高身已老。萬莖白髮真堪恨。一片緋衫何足道。賴得君來勸一杯。愁開悶破心頭好。

花前歎

前歲花前五十二。今年花前五十五。歲課年功頭髮知。從霜成雪君看取。幾人得老莫自嫌。樊李吳韋盡成土。南州桃李北州梅。且喜年年作花主。

花前置酒誰相勸。

容坐唱歌滿起舞。

欲散重拈花細看。

爭知明日無風雨。

自詠五首

朝亦隨羣動。暮亦隨羣動。榮華瞬息閒。求得將何用。形骸與冠蓋。假合相戲弄。何異睡著人。不知夢是夢。

【一】

一家五十口。一郡十萬戶。出爲差科頭。入爲衣食主。水旱合心憂。飢寒須手撫。何界食蓼蟲。不知苦是苦。

【三】

公私頻多事。衰憊殊少歡。迎送賓客懶。鞭笞黎庶難。老耳倦聲樂。病口厭杯盤。既無可戀者。何以不休官。

【四】

一日復一日。自問何留滯。爲貪逐日俸。擬作歸田計。亦須隨豐約。可得無限劑。若待足始休。休官在何歲。

【五】

官舍非我廬。官園非我樹。洛中有小宅。渭上有別墅。既無娘嫁累。幸有歸休處。

歸去誠已遲。猶勝不歸去。

和微之聽妻彈別鶴操因爲解釋其義依韻加四句

義重莫若妻。生離不如死。誓將死同穴。其奈生無子。商陵追禮教。婦出不能止。舅姑明且辭。夫妻中夜起。起聞雙鶴別。若與人相似。聽其悲唳聲。亦如不得已。青田八九月。遼城一萬里。徘徊去住雲。嗚咽東西水。寫之在琴曲。聽者酸心髓。況當秋月彈。先入愛人耳。怨抑掩朱絃。沈吟停玉指。一聞無兒歎。相念兩如此。無兒雖薄命。有妻偕老矣。幸免生別離。猶勝商陵氏。

題故元少尹集後二首

黃壤詎知我。白頭徒憶君。唯將老年淚。一灑故人文。

【一】

遺文三十軸。軸軸金玉聲。龍門原上土。埋骨不埋名。

和微之四月一日作

四月一日天。花稀葉陰薄。泥新燕影忙。蜜熟蜂聲樂。麥風低冉冉。稻水平漠漠。芳節或蹉跎。遊心稍牢落。春華信爲美。夏景亦未惡。颺浪嫩青荷。重欄晚紅藥。吳宮好風月。越郡多樓閣。兩地誠可憐。其奈久離索。

吳中好風景二首

吳中好風景。八月如三月。水荇葉仍香。木蓮花未歇。海天微雨散。江郭纖埃滅。暑退衣服乾。潮生船舫活。兩衙漸多暇。亭午初無熱。騎吏語使君。正是遊時節。

【二】

吳中好風景。風景無朝暮。曉色萬家煙。秋聲八月樹。舟移管絃動。橋擁旌旗駐。改號齊雲樓。重開武丘路。況當豐歲熟。好是歡遊處。州民勸使君。且莫拋官去。

答劉禹錫白太守行

吏滿六百石。昔賢輒去之。秩登二千石。今我方罷歸。我秩訝已多。我歸慙已遲。猶勝塵土下。終老無休期。臥乞百日告。起吟五篇詩。朝與府吏別。暮與州民辭。去年到郡時。麥穗黃離離。今年去郡日。稻花白霏霏。為郡已周歲。半歲罹旱飢。襦袴無一片。甘棠無一枝。何乃老與幼。泣別盡霑衣。下慙蘇人淚。上愧劉君辭。

別蘇州

浩浩姑蘇民。鬱鬱長洲城。來慙荷龍命。去愧無能名。青紫行將吏。班白列黎屯。一時臨水拜。十里隨舟行。餓筵猶未收。征棹不可停。稍隔煙樹色。尙聞絲竹聲。恨望武丘路。沈吟泝水亭。還鄉信有與。去郡能無情。

卯時酒

佛法讚醍醐。仙方誇沈湑。未如卯時酒。神速功力倍。一杯置掌上。三嚙入腹內。煦若春貫腸。暄如日炙背。豈獨肢體暢。仍加志氣大。當時遺形骸。竟日忘冠帶。似遊華胥國。疑反混元代。一性既完全。萬機皆破碎。半醒思往來。往來吁可怪。寵辱憂喜閒。惶惶二十載。前年辭紫闥。今歲拋皂蓋。去矣魚返泉。超然蟬離蛻。是非莫分別。行止無疑礙。浩氣貯胸中。青雲委身外。捫心私自語。自語誰能會。五十年來心。未如今日泰。況茲杯中物。行坐長相對。

自問行何遲

前月發京口。今辰次淮涯。二句四百里。自問行何遲。還鄉無他計。罷郡有餘資。進不慕富貴。退未憂寒飢。以此易過日。騰騰何所為。逢山輒倚棹。遇寺多題詩。酒醒夜深後。睡足日高時。眼底一無事。心中百不知。想到京國日。懶放亦如斯。何必冒風水。促促赴程歸。

除日答夢得同發楚州

共作千里伴。俱爲一郡廻。歲陰中路盡。鄉思先春來。山雪晚猶在。淮冰晴欲開。歸歎吟可作。休戀主人杯。

問楊瓊

古人唱歌兼唱情。今人唱歌唯唱聲。欲說向君君不會。試將此語問楊瓊。

有感三首
鬢毛已斑白。衣綬方朱紫。窮賤當壯年。富榮臨暮齒。車與紅塵合。第宅青煙起。彼來此須去。品物之常理。第宅非吾廬。逆旅暫畱止。子孫非我有。委蛇而已矣。有如蠶造繭。又似花生子。子結花暗凋。繭成蠶老死。悲哉可奈何。舉世皆如此。

【二】
莫養瘦馬駒。莫教小妓女。後事在目前。不信君看取。馬肥快行走。妓長能歌舞。三年五歲閒。已開換一主。借問新舊主。誰樂誰辛苦。請君大帶上。把筆書此語。

【三】
往事勿追思。追思多悲憤。來事勿相迎。相迎亦惆悵。不如兀然坐。不如塌然臥。食來即開口。睡來即合眼。二事最關身。安寢加餐飯。忘懷任行止。委命隨修短。更若有與來。狂歌酒一盞。

宿榮陽
生長在榮陽。少小辭鄉曲。迢迢四十載。復到榮陽宿。去時十一二。今年五十六。

追思兒戲時。宛然猶在目。舊居失處所。故里無宗族。豈唯變市朝。兼亦遷陵谷。獨有漆洧水。無情依舊綠。

經漆洧
落日駐行騎。沈吟懷古情。鄭風變已盡。漆洧至今清。不見士與女。亦無芍藥名。就花枝。移酒海。今朝不醉明朝悔。且算歡娛逐日來。任他容鬢隨年改。

醉翻衫袖拋小令。笑擲骰盤呼大采。自量氣力與心情。三五年閒猶得在。

喜雨
圃早憂萎蕤。農早憂禾菽。人各有所私。我早憂松竹。松乾竹焦死。眷眷在心目。澀葉既其根。汲水勞僮僕。油雲忽東起。涼雨淒相續。似面洗垢塵。如頭得膏沐。千柯習習潤。萬葉欣欣綠。千日澆灌功。不如一震霖。方知宰生靈。何異活草木。所以聖與賢。同心調玉燭。

題道宗上人十韻并序
普濟寺律大德宗上人法堂中。有故相國鄭司徒。歸尚書陸刑部元少尹。及今吏部鄭相。中書韋相錢左丞詩。覽其題皆與上人唱酬。閱其人皆朝賢。省其文皆義語。予始知上人

之文爲義作爲法作爲方便智作爲解脫性作不爲詩而作也知上人者云爾恐不知上人者謂爲護國法振靈一皎然之徒與故予題二十句以解之

如來說偈讚。菩薩著論議。是故宗律師。以詩爲佛事。一音無差別。四句有詮次。欲使第一流。皆知不二義。精潔露戒體。閒澹藏禪味。從容恣語言。縹緲離文字。旁延邦國彥。上達王公貴。先以詩句牽。後令入佛智。人多愛師句。我獨知師意。不似休上人。空多碧雲思。

寄星甫賓客

名利既兩忘。形體方自遂。臥掩羅雀門。無人驚我睡。睡足抖擻衣。閒步中庭地。食飽摩挲腹。心頭無一事。除卻玄晏翁。何人知此味。

寄庾侍郎

一雙華亭鶴。數片太湖石。巉巖蒼玉峯。矯矯青雲翮。是時歲云暮。淡薄煙景夕。庭霜封石稜。池雪印鶴迹。幽致竟誰別。閒靜聊自適。懷哉庾順之。好是今宵客。

寄崔少監

微微西風生。稍稍東方明。入秋神骨爽。琴曉絲桐清。彈爲古宮調。玉水寒冷冷。自覺絃指下。不是尋常聲。須臾羣動息。掩琴坐空庭。直至日出後。猶得心和平。

惜哉意未已。不使崔君聽。

醉題沈子明壁

不愛君池東十叢菊。不愛君池南萬竿竹。愛君簾下唱歌人。色似芙蓉聲似玉。我有陽關君未聞。若聞亦應愁殺君。

勸酒

勸君一杯君莫辭。勸君兩杯君莫疑。勸君三杯君始知。面上今日老昨日。心中醉時勝醒時。天地迢迢自長久。白兔赤烏相趁走。身後堆金挂北斗。不如生前一樽酒。君不見春明門外天欲明。喧喧歌哭半死生。遊人駐馬出不得。白叢素車爭路行。歸去來。頭已白。典錢將用買酒喫。

落花

留春春不住。春歸人寂寞。厭風風不定。風起花蕭索。既興風前歎。重命花下酌。勸君嘗綠醕。教人拾紅萼。桃飄火焰焰。梨墮雪漠漠。獨有病眼花。春風吹不落。

對鏡吟

白頭老人照鏡時。掩鏡沈吟吟舊詩。二十年前一莖白。如今變作滿頭絲。吟罷迴頭索杯酒。醉來屈指數親知。老於我者多窮賤。設使身存寒且飢。

少於我者半爲土。墓樹已抽三五枝。
眼前有酒心無苦。只合歡娛不合悲。

我今幸得見頭白。

祿俸不薄官不卑。

二〇八八

耳順吟寄教詩夢得

三十四十五慾牽。七十八十百病纏。

五十六十卻不惡。

恬淡清淨心安然。

已過愛貪聲利後。猶在病羸昏耄前。

未無筋力尋山水。

尙有心情聽管絃。

閒開新酒嘗數盞。

醉憶舊詩吟一篇。

教詩夢得且相勸。

不用嫌他耳順年。

別甞帳火爐

憶昨臘月天。北風三尺雪。年老不禁寒。

夜長安可徹。

賴有青氈帳。風前自張設。

復此紅火爐。雪中相暖熱。如魚入澗水。

似兔藏深穴。

婉軟墊鱗蘇。溫煖凍肌活。

方安陰慘夕。遽變陽和節。無奈時候遷。

豈是恩情絕。

氈簽逐日卷。香燎隨灰滅。

離恨屬三春。佳期在十月。但令此身健。

不作多時別。

六年春贈分司東都諸公

時爲河南尹

我爲同州牧。內愧無才術。忝擢恩已多。

遭逢幸非一。

偶當穀賤歲。適值民安日。

郡縣獄空虛。鄉閭盜奔逸。其閒最幸者。

朝客多分秩。

行接鴛鴦羣。坐成芝蘭室。

時聯拜表騎。閒動題詩筆。

夜雪乘燭遊。

春風攜榼出。

花教鶯點檢。柳付風排比。

法酒澹清漿。含桃爛紅實。洛童調金管。盧女鏗瑤瑟。黛慘歌思深。腰凝舞拍密。
每因同醉樂。自覺忘衰疾。始悟肘後方。不如杯中物。生涯隨日過。世事何時畢。
老子若乖慵。希君數牽率。

九日代羅樊二妓招舒著作

齊梁格

羅敷斂雙袂。樊姬獻一杯。不見舒員外。秋菊爲誰開。

憶舊遊

寄劉蘇州

憶舊遊

舊遊安在哉。

舊遊之人半白首。

舊遊之地多蒼苔。

江南舊遊凡幾處。

就中最憶吳江隈。

長洲苑綠柳萬樹。

齊雲樓春酒一杯。

閩門曉殿旗鼓出。

阜橋夕閣船舫迴。

修蛾慢臉燈下醉。

急管繁絃頭上催。

六七年前狂爛熳。

三千里外思徘徊。

李娟張態一春夢。

周五殷三歸夜臺。

虎丘月色爲誰好。

娃宮花枝應自開。

賴得劉郎解吟詠。

江山氣色合歸來。

答崔賓客晦叔十二月四日見寄

來篇云。共相呼喚醉歸來。

今歲日餘二十六。來歲年登六十二。

尙不能愛眼下身。

因何更算人閒事。

居士忘筌默默坐。

先生枕麴昏昏睡。

早晚相歸從醉鄉。

醉鄉去此無多地。

勸我酒

勸我酒。我不辭。請君歌。歌莫遲。歌聲長。辭亦切。此辭聽者堪愁絕。

洛陽女兒面似花。河南大尹頭如雪。

贈韋處士。六年夏大熱旱

驕陽連毒著。動植皆枯槁。旱日乾密雲。炎煙焦茂草。少壯猶困苦。況予病且老。既無白梅檀。何以除熱惱。華嚴經云。以白梅檀。塗身。能除一切熱惱。而得清涼也。汗巾束頭鬢。羶食熏襟抱。

始覺韋山人。休糧散髮好。

除官赴闕。畱贈微之。

去年十月半。君來過浙東。今年五月盡。我發向關中。兩鄉默默心相別。一水盈盈路不通。從此津人應省事。寂寥無復遞詩筒。

白樂天詩後集卷二

格詩 凡六十首

和微之詩二十三首并序

微之又以近作二十三首寄來。命僕繼和其閒。瘵絮四百字。車斜二十篇者流。皆韻劇辭。殫。瓌。奇。怪。譎。又題云。奉煩只此一度。乞不見辭。意欲定霸取威。置僕於窮地耳。大凡依次。

用韻韻同而意殊。約體爲文。文成而理勝。此足下素所長者。僕何有焉。今足下果用所長。過蒙見宥。然敵則氣作。急則計生。四十二章。磨掃並畢。不知大敵以爲如何。夫廟石破山。先觀錢跡。發矢中的。兼聽弦聲。以足下來章。惟求相困。故老僕報語不覺大誇。況曩者唱酬。近來因繼已十六卷。凡千餘首矣。其爲敵也。當今不見。其爲多也。從古未聞。所謂天下英雄。唯使君與操耳。戲及此者。亦欲三千里外。一破愁顏。勿示他人。以取笑誚。樂天白。

和晨霞 此後在上都作

君歌仙氏真。我歌慈氏真。慈氏發真念。念此閻浮人。左命大迦葉。右召桓堤因。千萬化菩薩。百億諸鬼神。上自非想頂。下及風水輪。胎卵濕化類。蠢蠢難具陳。弘願在救拔。大悲忘辛勤。無論善不善。豈閒冤與親。扶開生盲眼。擺去煩惱塵。燭以智慧日。灑之甘露津。千界一時度。萬法無與隣。借問晨霞子。何如朝玉宸。

【二】和送劉道士遊天台

聞君夢遊仙。輕舉超世雰。握持尊皇節。統衛吏兵軍。靈旂星月象。天衣龍鳳紋。佩服交帶籙。飄吟藥珠文。闔宮繚繆閉。鈞樂依稀聞。齋心謁西母。曠拜朝東君。煙霏子晉裾。霞爛麻姑裙。倏忽別眞侶。悵望隨歸雲。人生同大夢。夢與覺誰分。況此夢中夢。悠哉何足云。假如金闕頂。設使銀河濱。既未出三界。猶應在五蘊。

飲嘯日月精。茹嚼沆瀣芬。尙是色香味。六塵之所熏。仙中有大仙。首出夢幻羣。慈光一照燭。奧法相糾纏。不知萬齡暮。不見三光暉。一性自了了。萬緣徒紛紛。苦海不能漂。劫火不能焚。此是竺乾教。先生垂典墳。

【三】和栴沐寄道友

栴沐事朝謁。中門初動關。盛服去尙早。假寐須臾閒。鐘聲發東寺。夜色藏南山。停驂待五漏。人馬同時閒。高星粲金粟。落月沈玉環。出門向闕路。坦坦無阻艱。始出里北閭。稍轉市西園。晨燭照朝服。紫爛復朱殷。由來朝廷士。一入多不還。因循擲白日。積漸凋朱顏。青雲已難致。碧落安能攀。但且知止足。尙可銷憂患。

【四】和祝蒼華蒼華。吳神名。

日居復月諸。環迴照下土。使我玄雲髮。化爲素絲縷。稟質本羸劣。養生仍莽鹵。痛飲困連宵。悲吟飢過午。遂令頭上髮。種種無尺五。根稀比黍苗。梢細同釵股。豈是乏膏沐。非關栴風雨。最爲悲傷多。心焦衰落苦。餘者能有幾。落者不可數。秃似鵠填河。墮如鳥解羽。蒼華何用祝。苦辭亦休吐。匹如剃頭僧。豈要巾冠主。

【五】和我年三首

我年五十七。榮名得幾許。甲乙三道科。蘇杭兩州主。才能本淺薄。心力虛勞苦。

何能隨衆人。終老於塵土。

【六】

我年五十七。歸去誠已遲。歷官十五政。數若珠纒纒。野萍始實薦。場苗初紫維。因讀管蕭書。竊慕大有爲。及遭榮遇來。乃覺才力羸。黃紙詔頻草。朱輪車載脂。妻孥及僕使。皆免寒與飢。省躬私自愧。知我者微之。永懷山陰守。未遂嵩陽期。如何坐留滯。頭白江之湄。

【七】

我年五十七。榮名得非少。報國竟何如。謀身猶未了。昔嘗速官謗。恩大而懲小。一點鶴辭軒。七年魚在沼。將枯鱗再躍。經鍛翻重矯。白日上昭昭。青雲高渺渺。平生頗同病。老大宜相曉。紫綬足可榮。白頭不爲夭。夙懷慕箕穎。晚節期松篠。何當闕下來。同拜陳情表。

【八】和三月三十日四十韻

送春君何在。君在山陰署。憶我蘇杭時。春遊亦多處。爲君歌往事。豈敢辭勞慮。莫怪言語狂。須知酬答遽。江南臘月半。冰凍凝如瘧。寒景尙蒼茫。和風已吹噓。女墻城似甕。鴈齒橋如鋸。魚尾上蒼淪。草芽生沮洳。律遲太蕪管。日暖羲和馭。

布澤木龍催。迎春土牛助。雨師習習灑。雲將飄飄翥。四野萬里晴。千山一時曙。
 杭土麗且康。蘇民富而庶。善惡有懲勸。剛柔無吐茹。雨衙少辭牒。四境稀書疏。
 俗以勞徠安。政因閒暇著。仙亭日登眺。虎丘時游豫。尋幽駐旌軒。選勝廻寶御。
 舟移溪鳥避。樂作林猿起。池古莫耶沈。石奇羅刹踞。水苗泥易耨。畝粟灰難鋤。
 紫巖抽出畦。白蓮埋在淤。菱花紅帶鵲。濕葉黃含菸。鏡動波颭菱。雪迴風旋絮。
 手經攀桂馥。齒爲嘗梅楚。坐併船脚鼓。行多馬蹄趾。聖賢清濁醉。水陸鮮肥飮。
 魚鱸芥醬調。水葵鹽豉絮。雖微五袴詠。幸免兆人詛。但令樂不荒。何必遊無徂。
 吳苑僕尋罷。越城公尙據。舊遊幾客存。新宴誰人與。莫空文學酒。強下何曾筮。
 江上易優游。城中多毀譽。分應當自盡。事勿求人恕。我既無子孫。君仍畢婚娶。
 久爲雲雨別。終擬江湖去。范蠡有扁舟。陶潛有籃輿。兩心苦相憶。兩口遙相語。
 最恨七年春。春來各一處。

【九】和寄樂天

賢愚類相交。人情之大率。然自古今來。幾人號膠漆。近聞屈指數。元某與白乙。
 旁愛及弟兄。中權避家室。松筠與金石。未足喻堅密。在車如輪轅。在身如肘腋。
 又如風雲會。天使相召匹。不似勢利交。有名而無實。頃我在杭歲。值君之越日。

望愁來儀遲。宴惜流景疾。坐耀黃金帶。酌醖頽玉質。酣歌口不停。狂舞衣相拂。
 平生賞心事。施展十未一。會笑始啞啞。離嗟乃唧唧。餞筵纔收拾。征棹遽排比。
 後恨苦綿綿。前歡何卒卒。居人色慘澹。行子心紆鬱。風袂去時揮。雲帆望中失。
 宿醒和別思。目眩心忽忽。病魂黯然銷。老淚凄其出。別君只如昨。芳歲換六七。
 俱是官家身。後期難自必。

【十】和寄問劉白

時夢得與樂天方舟西上

正與劉夢得。醉笑大開口。適值此詩來。歡喜君知否。遂令高卷幕。兼遣重添酒。
 起望會稽雲。東南一回首。愛君金玉句。舉世誰人有。功用隨日新。資材本天授。
 吟哦不能散。自午將及酉。遂爾夢得眠。匡牀宿東牖。

【十一】和新樓北園偶集從孫公度周巡官韓秀才盧秀才范處士小

飲鄭侍御判官周劉二從事皆先歸

聞君新樓宴。下對北園花。主人既賢豪。賓客皆才華。初筵日未高。中飲景已斜。
 天地爲幕席。富貴如泥沙。愁劉陶阮徒。不足置齒牙。臥喪鄙畢卓。落帽嗤孟嘉。
 芳草供枕藉。亂鶯助諠譁。醉鄉得道路。狂海無津涯。一歲春又盡。百年期不賒。
 同醉君勿辭。獨醒古所嗟。銷愁若沃雪。破悶如割瓜。稱觴起爲壽。此樂無以加。

歌聲凝貫珠。舞袖飄亂麻。相公謂四座。今日非自誇。有奴善吹笙。有婢彈琵琶。十指纖若笋。雙鬢驚如鵝。履舄起交難。杯盤散紛拏。歸去勿推過。倒載逃難遮。明日宴東武。後日遊若耶。豈獨相公樂。謳歌千萬家。

【十二】和除夜作

君賦此詩夜。窮陰歲之餘。我和此詩日。微和春之初。老知顏狀改。病覺肢體虛。頭上毛髮短。口中牙齒疎。一落老病界。難逃生死墟。況此促促世。與君多索居。君在浙江東。榮駕方伯輿。我在魏闕下。謬乘大夫車。妻孥常各飽。奴婢亦盈廬。唯是利人事。比君全不如。我統十郎官。君領百吏胥。我掌四曹局。君管十鄉閭。君為父母君。大惠在資儲。我為刀筆吏。小惡乃誅鋤。君提七郡籍。我按三尺書。俱已佩金印。嘗同趨玉除。外寵信非薄。中懷何不據。恩光未報答。日月空居諸。磊落嘗許君。踟促應笑予。所以自知分。欲先歌歸歎。

【十三】和知非

因君知非問。詮較天下事。第一莫若禪。第二無如醉。禪能混入我。醉可忘榮悴。與君次第言。為我少留意。儒教重禮法。道家養神氣。重禮足滋彰。養神多避忌。不如學禪定。中有甚深味。曠廓了如空。澄凝勝於睡。屏除默默念。銷盡悠悠思。

春無傷春心。秋無感秋淚。坐成真諦樂。如受空王賜。既得脫塵勞。兼應離慙愧。除禪其次醉。此說非無謂。一酌機即忘。三杯性咸遂。逐臣去室婦。降虜敗軍帥。思苦膏火煎。憂深局鎖秘。須憑百杯沃。莫惜千金費。便似罩中魚。脫飛生兩翅。勸君雖老大。逢酒莫迴避。不然即學禪。兩途同一致。

【十四】和望曉

休吟稽山曉。聽詠秦城旦。鳴鶴初有聲。宿鳥猶未散。丁丁漏向盡。擘擘鼓過半。南山青沈沈。東方白漫漫。街心若流水。城角如斷岸。星河稍隅落。宮闕方輪煥。朝車雷四合。騎火星一貫。赦奕冠蓋盛。熒煌朱紫爛。沙堤互墓池。市路遶龍斷。白日忽照耀。紅塵紛散亂。貴教過客避。榮任行人看。祥煙滿虛空。春色無邊畔。鷄行候晷刻。龍尾登霄漢。臺殿暖宜攀。風光晴可翫。草鋪地茵褥。雲卷天幃幔。鸞雞佩錯錯。花遶衣粲粲。何言終日樂。獨起臨風歎。歎我同心人。一別春七換。相望山隔礙。欲去官羈絆。何日到江東。超然似張翰。

【十五】和李勢女

減一分太短。增一分太長。不朱面若花。不粉肌如霜。色為天下豔。心乃女中郎。自言重不幸。家破身未亡。人各有一死。此死職所當。忍將先人體。與主為疣瘡。

妾死主意快。從此兩無妨。願信赤心語。速即白刃光。南郡忽感激。卻立捨鋒鏑。撫背稱阿姉。歸我如歸鄉。竟以恩信待。豈止猜妬忘。由來机上肉。不足揮干將。南郡死已久。骨枯墓蒼蒼。願於墓上頭。立石鐫此章。勸誠天下婦。不令陰勝陽。

君得嘉魚置賓席。樂如南有嘉魚時。勁氣森爽竹竿竦。

妍文煥爛芙蓉披。

載筆在幕名已重。

補袞於朝官尚卑。

一絨疏入掩谷永。

三都賦成排左思。

自言拜辭主人後。

離心蕩颺風前旗。

東南門館別經歲。

春眼悵望秋心悲。以上叙嘉魚。

昨日嘉魚來訪我。

方駕同出何所之。

樂遊原頭春尚早。

百舌新語聲裊裊。

日趁花忙向南坼。

風催柳急從東吹。

流年恍不饒我。

美景鮮妍來爲誰。

紅塵三條界阡陌。

碧草千里鋪郊畿。

餘霞斷時綺幅裂。

斜雲展處羅文紙。

暮鐘遠近聲互動。

暝鳥高下飛追隨。

酒酣將歸未能去。

悵然迴望天四垂。

生何足養愁著論。

途何足泣楊漣洏。

胡不花下伴春醉。

滿酌綠酒聽黃鸝。

嘉魚點頭時一歎。

聽我此言不知疲。

語終興盡各分散。

東西軒騎分逶迤。

此詩勿遺閒人見。

見恐與他爲笑責。

白首舊寮知我者。

憑君一詠向周師。

【十七】和自勸二首

稀稀疎疎透籬竹。窄窄狹狹向陽屋。屋中有一曝背翁。委置形骸如土木。日暮半爐默炭火。夜深一盞紗籠燭。不知有益及民無。二十年來食官祿。就暖移盤簞下食。防寒擁被帷中宿。秋官月俸八九萬。豈徒遺爾身溫足。勤操丹筆念黃沙。莫使飢寒囚滯獄。

【十八】

急景凋年急於水。念此攬衣中夜起。門無宿客共誰言。煖酒挑燈對妻子。自飲數杯妻一盞。餘酌分張與兒女。微酣靜坐未能眠。風霰蕭蕭打窗紙。自問有何才與術。入爲丞郎出刺史。爭知壽命短復長。豈得營營心不止。請看韋孔與錢崔。半月之閒四人死。

【十九】和雨中花

真宰倒持生殺柄。閒物命長人短命。松枝上鶴著下龜。千年不死仍無病。人生不得似龜鶴。少去老來同旦暝。何異花開且暝閉。未落仍遭風雨橫。草得經年菜連月。唯花不與多時節。一年三百六十日。花能幾日供攀折。桃李無言難自訴。黃鸝解語憑君說。鸞雖爲說不分明。葉底枝頭謾饒舌。

【二十】和晨興因報問龜兒

冬且寒慘澹。雲日無晶輝。當此歲暮感。見君晨興詩。君詩亦多苦。苦在兒遠離。我苦不在遠。纏綿肝與脾。西院病婦婦。後牀孤姪兒。黃昏一慟後。夜半十起時。病眼兩行淚。衰鬢萬莖絲。咽絕五臟脈。瘦消百骸脂。雙目失一目。四肢斷兩肢。不如溘然逝。安用半活爲。誰謂茶藥苦。茶藥甘如飴。誰謂湯火熱。湯火冷如澌。前時君寄詩。憂念問阿龜。喉燥氣聲窒。經年無報辭。及覩晨興句。未吟先涕垂。因茲漣洳際。一吐心中悲。茫茫四海閒。此苦唯君知。去我四千里。使我告訴誰。仰頭向青天。但見鴈南飛。憑鴈寄一語。爲我達微之。弦絕有續膠。樹斬可接枝。唯我中腸斷。應無速得期。

【二十一】和朝回與王鍊師遊南山下

藹藹春景餘。峩峩夏雲初。霞蹤退朝騎。飄飄隨風裾。晨從四丞相。入拜白玉除。暮與一道士。出尋青谿居。吏隱本齊致。朝野孰云殊。道在有中適。機忘無外虞。但愧煙霄上。鸞鳳爲吾徒。又慙雲水閒。鷗鶴不我疎。坐傾數杯酒。臥枕一卷書。與酣兀兀。睡覺心于于。以此送日月。問師爲何如。

【二十二】和嘗新酒

空腹嘗新酒。偶成卯時醉。醉來擁褐裘。直至齋時睡。睡酣不語笑。真寢無夢寐。

殆欲忘形骸。詎知屬天地。醒餘和未散。起坐澹無事。舉臂一欠伸。引琴彈秋思。

【二十三】和順之琴者

陰陰花院月。耿耿蘭房燭。中有弄琴人。聲貌俱如玉。清冷石泉引。澹泞風松曲。遂使君子心。不愛凡絲竹。

感舊寫真

李放寫我真。寫來二十載。莫問真何如。畫亦銷光彩。朱顏與玄鬢。日夜改復改。無嗟貌遽非。且喜身猶在。

授太子賓客歸洛

南省去拂衣。東都來掩扉。病將老齊至。心與身同歸。白首外緣少。紅塵前事非。懷哉紫芝叟。千載心相依。

秋池二首

身閒無所爲。心閒無所思。況當故園夜。復此新秋池。岸闌鳥棲後。橋明月出時。菱風香散漫。桂露光參差。靜境多獨得。幽懷竟誰知。悠然心中語。自問來何遲。

【二】

朝衣薄且健。晚簾清仍滑。社近燕影稀。雨餘蟬聲歇。閒中得詩境。此境幽難說。

露荷珠自傾。風竹玉相夏。誰能一同宿。共翫新秋月。暑退早涼歸。池邊好時節。

大隱住朝市。小隱入丘樊。丘樊太冷落。朝市太囂譁。不如作中隱。隱在雷司官。似出復似處。非忙亦非閒。不勞心與力。又免飢與寒。終歲無公事。隨月有俸錢。君若好登臨。城南有秋山。君若愛遊蕩。城東有春園。君若欲一醉。時出赴賓筵。洛中多君子。可以恣歡言。君若欲高臥。但自深掩關。亦無車馬客。造次到門前。人生處一世。其道難兩全。賤即苦凍餒。貴則多憂患。唯此中隱士。致身吉且安。窮通與豐約。正在四者閒。

問秋光

殷卿領北鎮。崔尹開南幕。外事信爲榮。中懷未必樂。何如不才者。兀兀無所作。不引窗下琴。卽舉池上酌。淡交唯對水。老伴無如鶴。自適頗從容。旁觀誠淒落。身心轉恬泰。煙景彌淡泊。迴首語秋光。東來應不錯。

引泉

一爲止足限。二爲衰疾牽。邴罷不因事。陶歸非待年。歸來嵩洛下。閉戶何翛然。靜掃林下地。閒疏池畔泉。伊流狹似帶。洛石大如拳。誰教明月下。爲我聲潺潺。

竟夕舟中坐。有時橋上眠。何用施屏障。水竹繞牀前。

知足吟

和崔十八未貧作

不種一隴田。倉中有餘粟。不採一株桑。箱中有餘服。官閒雖憂責。身泰無羈束。中人百戶稅。賓客一年祿。樽中不乏酒。籬下仍多菊。是物皆有餘。非心無所欲。吟君未貧作。因歌知足曲。自問此時心。不足何時足。

酬集賢劉郎中對月見寄兼懷元浙東

月在洛陽天。天高淨如水。下有白頭人。擊衣中夜起。思遠鏡亭上。光深書殿裏。眇然三處心。相去各千里。

太湖石

遠望老嵯峨。近觀怪嶙峋。纔高八九尺。勢若千萬尋。嵌空華陽洞。重疊匡山岑。逸矣仙掌迴。呀然劒門深。形質冠今古。氣色通晴陰。未秋已瑟瑟。欲雨先沈沈。天姿信爲異。時用非所任。磨刀不如礪。擗帛不如砧。何乃主人意。重之如萬金。豈伊造物者。獨能知我心。

偶作二首

擾擾貧生人。幾何不天闕。遑遑愛名人。幾何能貴達。伊余信多幸。拖紫垂白髮。

身為三品官。年已五十八。筋骸雖早衰。尚未苦羸瘠。資產雖不豐。亦不甚貧竭。登山力猶在。遇酒興時發。無事日月長。不羈天地濶。安身有處所。適意無時節。解帶松下風。抱琴池上月。人閒所重者。相印將軍鉞。謀慮繫安危。威權主生殺。焦心一身苦。炙手旁人熱。未必方寸閒。得如吾快活。

【二】

日出起盥櫛。振衣入道場。寂然無他念。但對一爐香。日高始就食。食亦非膏粱。精粗隨所有。亦足飽充腸。日午脫巾簪。燕息窗下牀。清風颯然至。臥可致羲皇。日西引杖屨。散步遊林塘。或飲茶一盞。或吟詩一章。日入多不食。有時唯命觴。何以送閒夜。一曲秋霓裳。一日分五時。作息率有常。自喜老後健。不嫌閒中忙。是非一以貫。身世交相忘。若問此何許。此是無何鄉。

葺池上舊亭

池月夜淒涼。池風曉蕭颯。欲入池上冬。先葺池中閣。向暖窗戶開。迎寒簾幕合。苔封舊瓦木。水照新朱蠟。軟火深土爐。香醪小瓷榼。中有獨宿翁。一燈對一榻。

崔十八新池

愛君新小池。池色無人知。見底月明夜。無波風定時。忽看不似水。一泊稀琉璃。

翫止水

動者樂流水。靜者樂止水。利物不如流。鑿形不如止。淒清早霜降。淅瀝微風起。中面紅葉開。四隅綠萍委。廣狹八九丈。灣環有涯涘。淺深三四尺。洞徹無表裏。淨分鶴翹足。澄見魚掉尾。迎眸洗眼塵。隔智蕩心滓。定將禪不別。明與誠相似。清能律貪夫。淡可交君子。豈唯空狎翫。亦取相倫擬。欲識靜者心。心源只如此。聞崔十八宿予新昌弊宅。時予亦宿崔家依仁新亭。一宵偶同。兩興暗合。

因而成詠聊以寫懷

陋巷掩弊廬。高居敞華屋。新昌十株松。依仁萬莖竹。松前月臺白。竹下風池綠。君向我齋眠。我在君亭宿。平生有微尚。彼此多幽獨。何必求主人。兩心聊自足。

日長

日長晝加餐。夜短朝餘睡。春來寢食閒。雖老猶有味。林塘得芳景。園曲生幽致。愛水多棹舟。惜花不掃地。幸無眼下病。且向樽前醉。身外何足言。人閒本無事。

三月三十日作

今朝三月盡。寂寞春事畢。黃鳥漸無聲。朱櫻新結實。臨風獨長歎。此歎意非一。半百過九年。豔陽殘一日。隨年減歡笑。逐日添衰疾。且遣花下歌。送此杯中物。

慵不能

架上非無書。眼慵不能看。匣中亦有琴。手慵不能彈。腰慵不能帶。頭慵不能冠。午後恣情寢。午時隨事餐。一餐終日飽。一寢至夜安。飢寒亦閒事。況乃不飢寒。

晨興

宿鳥動前林。晨光上東屋。銅爐添早香。紗籠滅殘燭。頭醒風稍愈。眼飽睡初足。起坐兀無思。叩齒三十六。何以解宿齋。一杯雲母粥。

朝課

平甃白石渠。靜掃青苔院。池上好風來。新荷大如扇。小亭中何有。素琴對黃卷。藥珠諷數篇。秋思彈一遍。從客朝課畢。方與客相見。

天竺寺七葉堂避暑

鬱鬱復鬱鬱。伏熱何時畢。行入七葉堂。煩暑隨步失。檐雨稍霏微。窗風正蕭瑟。清宵一覺睡。可以銷百疾。

香山寺石樓潭夜浴

炎光晝方熾。暑氣宵彌毒。搖屏風甚微。袞袞汗霏霏。起向月下行。來就潭中浴。平石爲浴牀。窪石爲浴斛。綃巾薄露頂。草屨輕乘足。清涼詠而歸。歸上石樓宿。

嗟髮落

朝亦嗟髮落。暮亦嗟髮落。落盡誠可嗟。盡來亦不惡。既不勞洗沐。又不煩梳掠。最宜濕暑天。頭輕無髻縛。脫置垢巾幘。解去塵纓絡。銀瓶貯寒泉。當頂傾一勺。有如醍醐灌。坐受清涼樂。因悟自在僧。亦資於剝削。

安穩眠

家雖日漸貧。猶未苦飢凍。身雖日漸老。幸無疾病痛。眼逢闇處合。心向閒時用。既得安穩眠。亦無顛倒夢。

池上夜境

晴空星月落池塘。澄鮮淨綠表裏光。露箬清瑩迎夜滑。風襟瀟灑先秋涼。無人驚處野禽下。新睡覺時幽草香。但問塵埃能去否。濯纓何必向滄浪。

書紳

仕有職役勞。農有畎畝勸。優哉分司叟。心力無苦辛。歲晚頭又白。自問何欣欣。新酒始開甕。舊穀猶滿囷。吾嘗靜自思。往往夜達晨。何以送吾老。何以安吾貧。歲計莫如穀。飽則不干人。日計莫如醉。醉則兼忘身。誠知有道理。未敢勸交親。恐爲人所哂。聊自書諸紳。

秋遊平泉贈韋處士閒禪師

秋景引閒步。山遊不知疲。杖藜捨輿馬。十里與僧期。昔嘗憂六十。四體不支持。今來已及此。猶未苦衰羸。予往年有詩云。三十氣太壯。胸中多是非。六十年太老。四體不。支持。今故云。心興遇境發。身力因行知。尋雲到起處。愛泉聽滴時。南邨韋處士。西寺閒禪師。山頭與澗底。聞健且相隨。

遊坊口懸泉偶題石上

時爲河南尹

濟源山水好。老尹知之久。常日聽人言。今秋入吾手。孔山刀劍立。沁水龍蛇走。危磴上懸泉。澄灣轉坊口。虛明見深底。淨綠無纖垢。仙棹浪悠揚。塵纓風抖擻。巖寒松柏短。石古莓苔厚。錦座纓高低。翠屏張左右。雖無安石妓。不乏文舉酒。談笑逐身來。管絃隨事有。時逢杖錫客。或值垂綸叟。相與澹忘歸。自辰將及酉。公門欲返駕。溪路猶迴首。早晚重來遊。心期罷官後。

對火翫雪

平生所心愛。愛火兼憐雪。火是臘天春。雪爲陰夜月。鵝毛紛正墮。獸炭敲初折。盈尺白鹽寒。滿爐紅玉熱。稍宜杯酌動。漸引笙歌發。但識歡來由。不知醉時節。銀盤堆柳絮。羅袖搏瓊屑。共愁明日銷。便作經年別。

六年寒食洛下宴遊贈馮李二少尹

豐年寒食節。美景洛陽城。三尹皆強健。七日盡清明。東郊躡青草。南園攀紫荆。風拆海榴豔。露墜木蘭英。假開春未老。宴合日屢傾。珠翠混花影。管絃藏水聲。佳會不易得。良辰亦難并。聽吟歌暫輟。看舞杯徐行。米價賤如土。酒味濃於餒。此時不盡醉。但恐負平生。殷勤二曹長。各捧一銀觥。

苦熱中寄舒員外

何堪日衰病。復此時炎燠。厭對俗杯盤。倦聽凡絲竹。藤牀鋪晚雪。角枕截寒玉。安得清瘦人。新秋夜同宿。非君固不可。何夕枉高躅。

閒夕

一聲早蟬發。數點新螢度。蘭缸耿無煙。筠簟清有露。未歸後房寢。且下前軒步。斜月入低廊。涼風滿高樹。放懷常自適。遇境多成趣。何法使之然。心中無細故。

寄情

灼灼早春梅。東南枝最早。持來翫未足。花向手中老。芳香銷掌握。悵望生懷抱。豈無後開花。念此先開好。

舒員外遊香山寺數日不歸兼辱尺書大誇勝事時正值坐衙慮囚之際
走筆題長句以贈之

香山石樓倚天開。翠屏壁立波環迴。
 醜顏一笑天桃綻。清吟數聲寒玉哀。
 白頭老尹府中坐。早衙纔退暮衙催。
 豈無池塘長秋草。亦有絲竹生塵埃。
 早冬遊王屋。自靈都抵陽臺上方。望天壇。偶吟成章。寄溫谷尊師中書李相公。
 黃菊繁時好客到。碧雲合處佳人來。
 軒騎逶遲棹容與。畱連三日不能迴。
 庭前堦上何所有。榮囚成貫案成堆。
 今日清光昨夜月。竟無人來勸一杯。

霜降山水清。王屋十月時。石泉碧漾漾。巖樹紅離離。
 飄然世塵外。鸞鶴如可追。忽念公程盡。復慙身力衰。
 嘗聞此遊者。隱客與損之。各抱貴仙骨。俱非泥垢姿。
 若不為松喬。即須作皁變。今果如其語。光彩雙葳蕤。
 我來高其事。詠歎偶成詩。為君題石上。欲使故山知。
 一人佩金印。一人翳玉芝。

醉中重畱夢得

劉郎劉郎莫先起。蘇臺蘇臺隔雲水。
 酒盞來從一百分。馬頭去便三千里。

白樂天詩後集卷三

格詩

凡五十八首

詠興五首并序

七年四月予罷河南府歸履道第廬舍自給衣儲自充無欲無營或歌或舞頽然自適蓋
 河洛閒一幸人也遇興發詠偶成五章各以首句命為題目。

【一】解印出公府

解印出公府。抖擻塵土衣。百吏放爾散。雙鶴隨我歸。歸來履道宅。下馬入柴扉。
 馬嘶返舊廐。鶴舞還故池。雞犬何忻忻。鄰里亦依依。年顏老去日。生計勝前時。
 有帛禦冬寒。有穀防歲飢。飽於東方朔。樂於榮啓斯。人生且如此。此外吾不知。

【二】出府歸吾廬

出府歸吾廬。靜然安且逸。更無客干謁。時有僧問疾。家僮十餘人。攬馬三四匹。
 慵發經旬臥。興來連日出。出遊愛何處。嵩碧伊瑟瑟。況有清和天。正當疎散日。
 身閒自為貴。何必居榮秩。心足即非貧。豈唯金滿室。吾觀權勢者。苦以身徇物。
 炙手外炎炎。履冰中慄慄。朝飢口忘味。夕惕心憂失。但有富貴名。而無富貴實。

【三】池上有小舟

池上有小舟。舟中有胡牀。牀前有新酒。獨酌還獨嘗。熏若春日氣。皎如秋水光。可洗機巧心。可蕩塵垢腸。岸曲舟行遲。一曲進一觴。未知幾曲醉。醉入無何鄉。餐綠潭島閒。水竹深青蒼。身閒心無事。白日爲我長。我若未忘世。雖閒心亦忙。世若未忘我。雖退身難藏。我今異於是。身世交相忘。

【四】四月池水滿

四月池水滿。龜游魚躍出。吾亦愛吾池。池邊開一室。人魚雖異族。其樂歸於一。且與爾爲徒。逍遙同過日。爾無羨滄海。蒲藻可委質。吾亦忘青雲。衡茅足容膝。況吾與爾輩。本非蛟龍匹。假如雲雨來。祇是池中物。

【五】小底亦有月

小庭亦有月。小院亦有花。可憐好風景。不解嫌貧家。菱角執笙簧。谷兒抹琵琶。紅綃信手舞。紫綃隨意歌。菱。谷。紫。紅。皆小賊。獲名也。村歌與社舞。客哂主人誇。但問樂不樂。豈在鐘鼓多。客告暮將歸。主稱日未斜。請客稍深酌。願見朱顏酡。客知主意厚。分數隨後加。堂上燭未乘。座中冠已峩。左顧短紅袖。右命小青蛾。長跪謝貴客。蓬門勞見過。客散有餘興。醉臥獨吟哦。幕天而席地。誰奈劉伶何。

秋涼閒臥

殘暑晝猶長。早涼秋尙嫩。露荷散清香。風竹含疎韻。幽閒竟日臥。衰病無人問。薄暮宅門前。槐花深一寸。

酬思黯相公見過弊居戲贈

軒蓋光照地。行人爲徘徊。呼傳君子出。乃是故人來。訪我入窮巷。引君登小臺。臺前多竹樹。池上無塵埃。貧家何所有。新酒三兩杯。欸曲語上馬。從容復遲迴。畱守不外宿。日斜宮漏催。但畱金刀贈。未接玉山頽。家醞不敢惜。待君來卽開。村妓不辭出。恐君羈然哈。

再授賓客分司

優穩四皓官。清崇三品列。伊予再塵忝。內愧非才哲。俸錢七八萬。給受無虛月。分命在東司。又不勞朝謁。既資閒養疾。亦賴慵藏拙。賓友得從容。琴觴恣怡悅。乘籃城外去。繫馬花前歇。六遊金谷春。五看龍門雪。吾若默無語。安知吾快活。吾欲更盡言。復恐人豪奪。應爲時所笑。苦惜分司闕。但問適意無。豈論官冷熱。

把酒

把酒仰問天。古今誰不死。所貴未死閒。少憂多歡喜。窮通諒在天。憂喜卽由己。

是故達道人。去彼而取此。勿言未富貴。久忝居祿仕。借問宗族間。幾人拖金紫。勿憂漸衰老。且喜加年紀。試數班行中。幾人及暮齒。朝餐不過飽。五鼎徒爲爾。夕寢止求安。一衾而已矣。此外皆長物。於我雲相似。有子不甞金。何況兼無子。

首夏

林靜蚊未生。池靜蛙未鳴。景長天氣好。竟日和且清。春禽餘哢在。夏木新陰成。兀爾水邊坐。俯然橋上行。自問一何適。身閒官不輕。料錢隨月用。生計逐日營。食飽慙伯夷。酒足愧淵明。陶潛詩云。飲酒常不足。壽倍顏氏子。富百黔婁生。有一卽爲樂。況吾四者并。所以私自慰。雖老有心情。

代鶴

我本海上鶴。偶逢江南客。感君一顧恩。同來洛陽陌。洛陽寡族類。皎皎唯兩翼。貌是天與高。色非日浴白。主人誠可戀。其奈軒庭窄。飲啄雜雞羣。年深損標格。故鄉渺何處。雲水重重隔。誰念深籠中。七換摩天翮。

立秋夕有懷夢得

露簾荻竹青。風扇蒲葵輕。一與故人別。再見新蟬鳴。是夕涼颺起。閒境入幽情。迴燈見棲鶴。隔竹聞吹笙。夜茶一兩杓。秋吟三數聲。所思渺千里。雲水長洲城。

哭崔常侍晦叔

頑賤一拳石。精珍百鍊金。名價既相遠。交分何其深。中誠一以合。外物不能侵。逶迤二十年。與世同浮沈。晚有退閒約。白首歸雲林。垂老忽相失。悲哉口語心。春日嵩高陽。秋夜清洛陰。丘園共誰卜。山水共誰尋。風月共誰賞。詩篇共誰吟。花開共誰看。酒熟共誰斟。惠死莊杜口。鍾歿師廢琴。道理使之然。從古非獨今。吾道自此孤。我情安可任。唯將病眼淚。一灑秋風襟。

新秋曉興

濁暑忽已退。清宵未全長。晨缸耿殘焰。宿閣凝微香。喔喔雞下樹。輝輝日上梁。枕低茵席軟。臥穩身入牀。睡足景猶早。起初風乍涼。展張小屏障。收拾生衣裳。還有惆悵事。遲遲未能忘。拂鏡梳白髮。可憐冰照霜。

秋日與張賓客舒著作同遊龍門醉中狂歌凡二百三十八字

秋天高高秋光清。秋風嫋嫋秋蟲鳴。嵩峯餘霞錦綺卷。伊水細浪鱗甲生。洛陽閒客知無數。少出遊山多在城。商嶺老人自追逐。蓬丘逸士相逢迎。南出鼎門十八里。莊店遞迤橋道平。不寒不熱好時節。鞍馬穩快衣衫輕。竝轡踟躕下西岸。扣舷容與遶中汀。開懷曠達無所繫。觸目勝絕不可名。

荷衰欲黃荇猶綠。魚樂自躍鷗不驚。翠藻蔓長孔雀尾。彩船櫓急寒鴈聲。
 家醞一壺白玉液。野花數把黃金英。畫遊四看西日暮。夜話三及東方明。
 暫停杯觴輟吟詠。我有狂言君試聽。丈夫一生有二志。兼濟獨善難得并。
 不能救療生民病。即須先濯塵土纓。況吾頭白眼已暗。終日戚促何所成。
 不如展眉開口笑。龍門醉臥香山行。

履信池櫻桃島上醉後走筆送別舒員外兼寄宗正李卿考功崔郎中

櫻桃島前春。去春花萬枝。忽憶與宗卿閒飲日。又憶與考功狂醉時。
 歲晚無花空有葉。風吹滿地乾重疊。躡葉悲秋復憶春。池邊樹下重殷勤。
 今朝一酌臨寒水。此地三回別故人。櫻桃花來春千萬朵。來春共誰花下坐。
 不論崔李上青雲。明日舒三亦拋我。

秋池獨泛

蕭疎秋竹籬。清淺秋風池。一隻短舫艇。一張斑鹿皮。皮上有野叟。手中持酒卮。
 半酣箕踞坐。自問身為誰。嚴子垂釣日。蘇門長嘯時。悠然意自得。意外何人知。
 冬日早起閒詠
 冰塘耀初旭。風竹飄餘霰。幽境雖目前。不因閒不見。晨起對爐香。道經尋兩卷。

晚坐拂琴塵。秋思彈一遍。此外更無事。開樽時自勸。何必東風來。一杯春上面。

歲暮

慘澹歲云暮。窮陰動經旬。霜風裂人面。冰雪摧車輪。而我當是時。獨不知苦辛。
 晨炊糜有米。夕爨厨有薪。夾幅長覆耳。重裘寬裹身。加之一杯酒。煦嫗如陽春。
 洛城士與庶。比屋多飢貧。何處爐有火。誰家飯無塵。如我飽煖者。百人無一人。
 安得不慙愧。放歌聊自陳。

南池早春有懷

朝遊北橋上。晚憩南塘畔。西日雪全銷。東風冰盡泮。徙徙魚尾掉。瞥瞥鵝毛換。
 泥暖草芽生。沙虛泉脈散。晴芳冒苦島。宿潤侵蒲岸。洛下日初長。江南春欲半。
 時光共拋擲。人事堪嗟歎。倚棹忽尋思。去年池上伴。

古意

脈脈復脈脈。美人千里隔。不見來幾時。瑤草三四碧。玉琴聲悄悄。鸞鏡塵霽霽。
 昔為連理枝。今作分飛翮。寄書多不達。加飯終無益。心腸不自寬。衣帶何由窄。
 山遊示小妓
 雙鬢垂未合。三十纔過半。本是綺羅人。今為山水伴。春泉共揮弄。好樹同攀翫。

笑容花底迷，酒思風前亂。紅凝舞袖急，黛慘歌聲緩。莫唱楊柳枝，無腸與君斷。

神照禪師同宿
八年三月晦，山梨花滿枝。龍門水西寺，夜與遠公期。晏坐自相對，密語誰得知。

張常侍相訪

西亭晚寂寞，鶯散柳陰繁。水戶簾不卷，風牀席自翻。忽聞車馬客，來訪蓬蒿門。況是張常侍，安得不開樽。

早夏遊宴

雖慵興猶在，雖老心猶健。昨日山水遊，今朝花酒宴。山榴豔似火，玉葉飄如霰。榮落逐瞬遷，炎涼隨刻變。未收木綿褥，已動蒲葵扇。且喜物與人，年年得相見。

感白蓮花

白白芙蓉花，本生吳江濱。不與紅者雜，色類自區分。誰移爾至此，姑蘇白使君。初來苦顛顛，久乃芳氣氤。月月葉換葉，年年根生根。陳根與故葉，銷化成泥塵。化者日已遠，來者日復新。一爲池中物，永別江南春。忽想西涼州，中有天寶民。埋沒漢父祖，孳生胡子孫。已忘鄉土戀，豈念君親恩。生人尙復爾，草木何足云。

詠所樂

獸樂在山谷，魚樂在陂池。蟲樂在深草，鳥樂在高枝。所樂雖不同，同歸適其宜。不以彼易此，況論是與非。而我何所樂，所樂在分司。分司有何樂，樂哉人不知。官優有祿料，職散無羈縻。懶與道相近，鈍將閒自隨。昨朝拜表廻，今晚行香歸。歸來北窗下，解巾脫塵衣。冷泉灌我頂，暖水濯四肢。體中幸無疾，臥任清風吹。心中又無事，坐任白日移。或開書一篇，或引酒一卮。但得如今日，終身無厭時。

思舊

閒日一思舊，舊遊如目前。再思今何在，零落歸下泉。退之服硫黃，一病訖不痊。微之鍊秋石，未老身溘然。杜子得丹訣，終日斷腥羶。崔君誇藥力，經冬不衣綿。或疾或暴天，悉不過中年。唯予不服食，老命反遲延。況在小壯時，亦爲嗜慾牽。但耽葷與血，不識汞與鉛。飢來吞熱物，渴來飲寒泉。詩役五臟神，酒汨三丹田。隨日合破壞，至今粗完全。齒牙未缺落，肢體尙輕便。已開第七秩，飽食仍安眠。且進杯中物，其餘皆付天。

寄盧少尹

老誨心不亂，莊戒形太勞。生命既能保，死籍亦可逃。嘉香與旨酒，信是腐腸膏。

豔聲與麗色。真爲伐性刀。補養在積功。如裘集衆毛。將欲致千里。不得差一毫。顏回何爲者。章瓠纔自給。肥醲不到口。年不登三十。張蒼何爲者。染愛浩無際。妾媵填後房。竟壽百餘歲。蒼壽有何德。回夭有何辜。誰謂具聖體。不如肥瓠軀。遂使世俗心。多疑仙道書。寄問盧先生。此理當何如。心不亂。形大勞。至。弟。一毫。皆出。老莊及諸道書仙方禁戒。

池上清晨候皇甫郎中

曉景麗未熟。晨飈鮮且涼。池幽綠蘋合。霜潔白蓮香。深掃竹閒逕。靜拂松下牀。玉柄鶴翎扇。銀鬕雲母漿。屏除無俗物。瞻望唯清光。何人擬相訪。羸女從蕭郎。

詠懷

我知世如幻。了無干世意。世知我無堪。亦無責我事。由茲兩相忘。因得長自遂。自遂意何如。閒官在閒地。閒地唯東都。東都少名利。閒官是賓客。賓客無牽累。嵇康日日懶。畢卓時時醉。酒肆夜深歸。僧房日高睡。形安不勞苦。神泰無憂畏。從官三十年。無如今氣味。鴻雖脫羅弋。鶴尙居祿位。唯此未忘懷。有時猶內愧。

北窗三友

今日北窗下。自問何所爲。欣然得三友。三友者爲誰。琴罷輒舉酒。酒罷輒吟詩。三友遞相引。循環無已時。一彈愜中心。一詠暢四肢。猶恐中有閒。以醉彌縫之。豈獨吾拙好。古人多若斯。嗜詩有淵明。嗜琴有啓期。嗜酒有伯倫。三人皆吾師。

或乏儋石儲。或穿帶索衣。絃歌復觴詠。樂道知所歸。三師去已遠。高風不可追。三友游甚熟。無日不相隨。左擲白玉卮。右拂黃金徽。興酣不疊紙。走筆操狂詞。誰能持此詞。爲我謝親知。縱未以爲是。豈以我爲非。

吟四雖雜言

酒酣後。歌歇時。請君添一酌。聽我吟四雖。年雖老。猶少於韋長史。命雖薄。猶勝於鄭長水。眼雖病。猶明於徐郎中。家雖貧。猶富於郭庶子。省躬審分何僂俛。值酒逢歌且歡喜。忘榮知足委天和。亦應得盡生生理。分司同官中。韋長史。年七十餘。郭庶子。求。貧。苦。最甚。除郎中。時。因。

疾。喪。明。余。爲。河南。尹。時。見。同。年。鄭。會。始。授。長。水。縣。令。因。歎。四。子。而。成。此。篇。也。

裴侍中晉公以集賢林亭卽事詩二十六韻見贈猥蒙微和才拙詞繁輒

廣爲五百言以伸酬獻

三江路千里。五湖天一涯。何如集賢第。中有平津池。池勝主見覺。景新人未知。竹森翠琅玕。水深洞琉璃。水竹以爲質。質立而文隨。文之者何人。公來親指麾。疏鑿出人意。結構得地宜。虛襟一搜索。勝槩無遺遺。因下張沼沚。依高築階基。嵩峯見數片。伊水分一支。南溪修且直。長波碧逶迤。北館壯復麗。倒影紅參差。東島號晨光。杲曜留朝曦。西嶺名夕陽。杳曖留落暉。前有水心亭。動蕩架漣漪。

後有開闔堂。寒溫變天時。幽泉鏡泓澄。忽石山鼓危。春葩雪漠漠。夏果珠離離。
 主人命方舟。宛在水中央。親賓次第至。酒樂前後施。解纜始登汎。山遊仍水嬉。
 沿洄無滯礙。向背窮幽奇。瞥過遠橋下。飄旋深澗陲。管絃去縹緲。羅綺來霏微。
 棹風逐舞迴。梁塵隨歌飛。宴餘日云暮。醉客未放歸。高聲索彩牋。大笑催金卮。
 唱和筆走疾。問答杯行遲。一詠清兩耳。一酣暢四肢。主客忘貴賤。不知俱是誰。
 客有詩魔者。吟哦不知疲。乞公殘紙墨。一掃狂歌詞。維云社稷臣。赫赫文武姿。
 十授丞相印。五建大將旗。四朝致勛華。一身冠皁纓。去年才七十。決赴懸車期。
 公志不可奪。君恩亦難違。從容就中道。俛俛來保釐。貂蟬雖未脫。鸞鳳已不羈。
 歷徵今與古。獨步無等夷。陸賈功業少。二疏官秩卑。乘舟范蠡懼。辟穀甯侯飢。
 豈若公今日。身安家國肥。羊祜在漢南。空留峴香碑。柳惲在江南。祇賦汀洲詩。
 謝安入東山。但說攜蛾眉。山簡醉高陽。唯聞倒接羅。豈如公今日。餘力兼有之。
 願公壽如山。安樂長在茲。願我比蒲稗。永得相因依。

晚歸香山寺因詠所懷
 我年日已老。我身日已閒。閒出都門望。但見水與山。關塞碧巖巖。伊流清潺潺。
 中有古精舍。軒戶無扃關。岸草歇可藉。逕蘿行可攀。朝隨浮雲出。夕與飛鳥還。

吾道本迂拙。世途多險艱。唯聞稽呂輩。尤悔生疎頑。巢悟入箕穎。皓知返商巖。
 豈唯樂肥遯。聊復祛憂患。吾亦從此去。終老伊嵩閒。

張常侍池涼夜閒讌贈諸公

竹橋新月上。水岸涼風至。對月五六人。管絃三兩事。留連池上酌。款曲城外意。
 或嘯或謳吟。誰知此閒味。迴看市朝客。矻矻趨名利。朝忙少遊宴。夕困多眠睡。
 清涼屬吾徒。相逢勿辭醉。

和皇甫郎中秋曉同登天宮閣言懷六韻

碧天忽已高。白日猶未短。玲瓏曉樓閣。清脆秋絲管。張翰一杯酣。嵇康終日懶。
 塵中足憂累。雲外多疏散。病木斧斤遺。冥鴻羈縲斷。逍遙二三子。永願為閒伴。

送呂漳州

今朝一壺酒。言送漳州牧。半自要閒遊。愛花憐草綠。花前下鞍馬。草上攜絲竹。
 行客飲數杯。主人歌一曲。端居惜風景。屢出勞僮僕。獨醉似無名。借君作題目。
 短歌行

世人求富貴。多為奉嗜欲。盛衰不自由。得失常相逐。問君少年日。苦學將干祿。
 負笈塵中遊。抱書雪前讀。布衾不周體。藜茹纔充腹。三十登宦途。五十被朝服。

奴溫已挾纊。馬肥初食粟。未敢議歡遊。尙爲名檢束。耳目聾暗後。堂上調絲竹。牙齒缺落時。盤中堆酒肉。彼來此已去。外餘中不足。少壯與榮華。相避如寒燠。青雲去地遠。白日經天速。從古無奈何。短歌聽一曲。

詠懷

高人樂丘園。中人慕官職。一事尙難成。兩途安可得。遑遑于世者。多苦時命塞。亦有愛閒人。又爲窮餓逼。我今幸雙遂。祿仕兼游息。未嘗羨榮華。不省勞心力。妻孥與婢僕。亦免愁衣食。所以吾一家。面無憂喜色。

府西亭納涼歸

避暑府西亭。晚歸有閒思。夏淺蟬未多。綠槐陰滿地。帶寬衫解領。馬穩人攏轡。面上有涼風。眼前無俗事。路經府門過。落日照官次。牽聯繹綫囚。奔走塵埃吏。低眉悄不語。誰復知茲意。憶得五年前。晚衙時氣味。

老熱

一飽百情足。一酣萬事休。何人不衰老。我老心無憂。仕者拘職役。農者勞田疇。何人不苦熱。我熱身自由。臥風北窗下。坐月南池頭。腦涼脫烏帽。足熱濯清流。慵發晝高枕。興來夜汎舟。何乃有餘適。祇緣無過求。或問諸親友。樂天是與不。

亦無別言語。多道大悠悠。悠悠君不知。此味深且幽。但恐君知後。亦來從我遊。

新秋喜涼因寄兵部楊侍郎

外強火未退。中銳金方戰。一夕風雨來。炎涼隨數變。徐徐炎景度。稍稍涼颺扇。枕簟忽淒清。巾裳亦輕健。老夫納秋候。心體殊安便。睡足一屈伸。搔首摩挲面。褰簾對池竹。幽寂如僧院。俯觀游魚群。仰數浮雲片。閒忙各有趣。彼此寧相見。昨日聞羣集。召對延英殿。

懶放二首呈劉夢得吳方之

青衣報平旦。呼我起盥櫛。今早天氣寒。郎君應不出。又無賓客至。何以銷閒日。已向微陽前。暖酒開詩帙。

【二】

朝憐一牀日。暮愛一爐火。牀暖日高眠。爐溫夜深坐。雀羅門懶出。鶴髮頭慵裹。除卻劉與吳。何人來問我。

六十六

病知心力減。老覺光陰速。五十八歸來。今年六十六。鬢絲千萬白。池草八九綠。童稚盡成人。園林半喬木。看山倚高石。引水穿深竹。雖有潺湲聲。至今聽未足。

三適贈道友

楊綾袍厚暖。臥蓋行坐披。紫氍履寬穩。寒步頗相宜。足適已忘履。身適已忘衣。況我心又適。兼忘是與非。三適今爲一。怡怡復熙熙。禪那不動處。混沌未鑿時。此固不可說。爲君強言之。

洛陽春贈劉李二賓客

水南冠蓋地。城東桃李園。雪消洛陽堰。春入永通門。淑景方靄靄。遊人稍喧喧。年豐酒漿賤。日晏歌吹繁。中有老朝客。華髮映朱軒。從容三兩人。藉草開一樽。樽前春可惜。身外事勿論。明日期何處。杏花遊趙邨。
洛陽東有趙邨。杏花千餘樹。

寒食

人老何所樂。樂在歸鄉國。我歸故園來。九度逢寒食。故園在何處。池館東城側。四鄰梨花時。二月伊水色。豈獨好風土。仍多舊親戚。出去恣歡遊。歸來聊燕息。有官供祿俸。無事勞心力。但恐優穩多。微躬銷不得。

寄李蘇州兼示楊瓊

真娘墓頭春草碧。心奴鬢上秋霜白。爲問蘇臺酒席中。使君歌笑與誰同。就中猶有楊瓊在。堪上東山伴謝公。

和裴令公一日日一年年雜言見贈

一日日。作老翁。一年年。過春風。公心不以貴隔我。我散唯將閒伴公。我無才能忝高秩。合是人閒閒散物。公有功德在生民。何因得作自由身。前日魏王潭上宴連夜。今日午橋池頭遊拂晨。山客硯前吟待月。野人樽前醉送春。不敢與公閒中爭第一。亦應占得第二第三人。

奉和裴令公三月上巳日遊太原龍泉憶去歲稷洛見示之作

依來體雜言

去歲暮春上巳。共泛洛水中流。今歲暮春上巳。獨立香山下頭。風光閒寂寂。旌旆遠悠悠。丞相府。歸晉國。太行山。礙并州。鵬背負天龜曳尾。雲泥不可得同遊。

憶江南詞三首

江南好。風景舊曾諳。日出江花紅勝火。春來江水綠如藍。能不憶江南。

【二】

江南憶。最憶是杭州。山寺月中尋桂子。郡亭枕上看潮頭。何日更重遊。

【三】

江南憶。其次憶吳宮。吳酒一杯春竹葉。吳娃雙舞醉芙蓉。早晚復相逢。

汎小輪二首

水一塘。輪一隻。
忽疑身是江南客。

輪頭漾漾知風起。

輪背蕭蕭聞雨滴。

醉臥船中欲醒時。

【二】

船緩進。水平流。
如從鳳口向湖洲。

一莖竹篙別般尾。

兩幅青幕覆船頭。

亞竹亂藤多照岸。

白樂天詩後集卷四

格詩

凡八十
六首

題裴晉公女儿山刻石詩後并序

裴侍中晉公出討淮西時過女儿山下刻石題詩末句云待平賊壘報天子莫指仙山示
武夫果如所言剋期平賊由是淮蔡迄今底寧殆二十年人安生業夫嗟歎不足則詠歌
之故居易作詩二百言繼題公之篇末欲使採詩者修史者後之往來觀者知公之功德
本末前後也。

何處畫功業。何處題詩篇。麒麟高閣上。女儿小山前。爾後多少時。四朝二十年。
賊骨化為土。賊壘聚為田。一從賊壘平。陳蔡民晏然。驃軍成牛戶。鬼火變人煙。
生子已嫁娶。種桑亦絲絲。皆云公之德。欲報無由緣。公今在何處。守都鎮三川。
舊宅置永樂。新居開集賢。公今在何官。被袞珥貂蟬。戰袍破猶在。髀肉生欲圓。
襟懷轉蕭灑。氣力彌精堅。登山不拄杖。上馬能掉鞭。利澤浸入地。福降自昇天。
昔號天下將。今稱地上仙。勿追赤松遊。勿拍洪崖肩。商山有遺老。可以奉周旋。

洛陽有愚叟

洛陽有愚叟。白黑無分別。浪跡雖似狂。謀身亦不拙。點檢盤中飯。非精亦非糲。
點檢身上衣。無餘亦無闕。天時方得所。不寒復不熱。體氣正調和。不飢仍不渴。
閒將酒壺出。醉向人家歇。野食或烹鮮。寓眠多擁褐。抱琴榮啓樂。荷鍤劉伶達。
放眼看青山。任頭生白髮。不知天地內。更得幾年活。從此到終身。盡爲閒日月。

飽食閒坐

紅粒陸渾稻。白鱗伊水魴。庖童呼我食。飯熟魚鮮香。箸箸適我口。匙匙充我腸。
八珍與五鼎。無復心思量。捫腹起盥漱。下階振衣裳。逸庭行數匝。卻上檐下床。
箕踞擁裘坐。半身向日暘。可憐飽暖味。誰肯來同嘗。是歲太和八。兵銷時漸康。

朝廷重經術。草澤搜賢良。堯舜求理切。夔龍啓沃忙。懷才抱智者。無不走遑遑。唯此不才叟。頑慵戀洛陽。飽食不出門。閒坐不下堂。子弟多寂寞。僮僕少精光。衣食雖充給。神意不揚揚。爲爾謀則短。吾爲謀甚長。

閒居自題

門前有流水。牆上多高樹。竹迳遶荷池。紫迴百餘步。波閒戲魚鱉。風靜下鷗鷺。寂無城市喧。渺有江湖趣。吾廬在其上。偃臥朝復暮。洛下安一居。山中亦慵去。時逢過客愛。問是誰家住。此是白家翁。閉門終老處。

覽鏡喜老

今朝覽明鏡。鬢髮盡成絲。行年六十四。安得不衰羸。親屬惜我老。相顧與歎啓。而我獨微笑。此意何人知。笑罷仍命酒。掩鏡捋白髭。爾輩且安坐。從容聽我詞。生若不足戀。老亦何足悲。生若苟可戀。老卽生多時。不老卽須天。不天卽須衰。晚衰勝早天。此理決不疑。古人亦有言。浮生七十稀。我今欠六歲。多幸或庶幾。儻得及此限。何羨榮啓期。當喜不當歎。更傾酒一卮。

風雪中作

歲暮風動地。夜寒雪連天。老夫何處宿。煖帳溫爐前。兩重褐綺衾。一領花茸氈。

粥熟呼不起。日高安穩眠。是時心與身。了無閒事牽。以此度風雪。閒居來六年。忽思遠遊客。復想早朝士。踣凍侵夜行。凌寒未明起。心爲身君父。身爲心臣子。不得身自由。皆爲心所使。我心既知足。我身自安止。方寸語形骸。我應不負爾。

對琴酒

西窗明且暖。晚坐卷書帷。琴匣拂開後。酒瓶添滿時。角樽白螺盞。玉軫黃金徽。未及彈與酌。相對已依依。泠泠秋泉韻。貯在龍鳳池。油油春雲心。一杯可致之。自古有琴酒。得此味者稀。祇應康與籍。及我三心知。

雪中晏起偶詠所懷兼呈張常侍章庶子皇甫郎中

雜言

窮陰蒼蒼雪雰雰。雪深沒脛泥埋輪。東家典錢歸礙夜。南家貰米出凌晨。我獨何者無此弊。復帳重衾暖若春。怕寒放懶不肯動。日高睡足方頻伸。瓶中有酒爐有炭。甕中有飯庖有薪。奴溫婢飽身晏起。致茲快活良有因。上無阜陶伯益廊廟材。的不能匡君輔國活生民。下無巢父許由箕穎操。又不能食薇飲水自苦辛。君不見南山悠悠多白雲。又不見西京浩浩唯紅塵。紅塵鬧熱白雲冷。好於冷熱中閒安置身。三年徵倖忝洛尹。兩任優穩爲商賓。非賢非愚非智慧。不貴不富不賤貧。冉冉老去過六十。騰騰閒來經七春。不知張章與皇甫。

私喚我作何如人

和裴侍中南園靜興見示

池館清且幽。高懷亦如此。有時簾動風。盡日橋照水。靜將鶴爲伴。閒與雲相似。何必學留侯。崎嶇覓松子。

春寒

今朝春氣寒。自問何所欲。酥煖薤白酒。乳和地黄粥。豈唯厭饑口。亦可調病腹。助酌有枯魚。佐餐兼旨菹。省躬念前哲。醉飽多慚怩。君不聞靖節先生樽長空。廣文先生飯不足。

菩提寺上方晚望香山寺寄舒員外

晚登西寶刹。晴望東精舍。反照轉樓臺。輝輝似圖畫。冰浮水明滅。雪壓松偃亞。石閣僧上來。雲汀鴈飛下。西京闕於市。東洛閒如社。曾憶舊遊無。香山明月夜。

二月一日作贈韋七庶子

園杏紅萼拆。庭蘭紫芽出。不覺春已深。今朝二月一。去冬病瘡疖。將養遵醫術。今春入道場。清淨依僧律。嘗聞聖賢語。所慎齋與疾。遂使愛酒人。停杯一百日。明朝二月二。疾平齋復畢。應須挈一壺。尋花覓韋七。

犬齋

晚來天氣好。散步中門前。門前何所有。偶覩犬與鷲。鷲飽凌風飛。犬暖向日眠。腹舒穩貼地。翅凝高摩天。上無羅弋憂。下無羈鎖牽。見彼物遂性。我亦心適然。心適復何爲。一詠逍遙篇。此仍著於述。尙未能忘言。

夢劉二十八因詩問之

昨夜夢夢得。初覺思踟躕。忽忘來汝郡。猶疑在吳都。吳都三千里。汝郡二百餘。非夢亦不見。近與遠何殊。尙能齊近遠。焉用論榮枯。但問寢與食。近日兩何如。病後能吟否。春來曾醉無。樓臺與風景。汝又何如蘇。相思一相報。勿復慵爲書。

閒吟

貧窮汲汲求衣食。富貴營營役心力。人生不富卽貧窮。光陰易過閒難得。我今幸在窮富閒。雖在朝廷不入山。看雪尋花翫風月。洛陽城裏七年閒。

西行

衣裘不單薄。車馬不羸弱。藹藹三月天。閒行亦不惡。壽安流水館。硤石青山郭。官道柳陰陰。行宮花漠漠。常聞俗閒語。有錢在處樂。我雖非富人。亦不苦寂寞。家僮解絃管。騎從攜杯杓。時向春風前。歌鞍開一酌。

東歸

翩翩平肩舁，中有醉老夫。
膝上展詩卷，竿頭懸酒壺。
食宿無定程，僕馬多緩驅。
臨水歇半日，望山傾一盃。
藉草坐嵬峩，攀花行踟躕。
風將景共暖，體與心同舒。
始悟有營者，居家如在途。
方知無繫者，在道如安居。
前夕宿三堂，今日游申湖。
殘春三百里，送我歸東都。

途中作

早上上肩輿，一杯平旦醉。
晚憩下肩輿，一覺殘春睡。
身不經營物，心不思量事。
但恐綺與里，只如吾氣味。

小臺

新樹低如帳，小臺平似掌。
六尺白藤牀，一莖青竹杖。
風飄竹皮落，苔印鶴迹上。
幽境與誰同，閒人自來往。

睡後茶興憶楊同州

昨晚飲太多，嵬峩連宵醉。
今朝餐又飽，爛熳移時睡。
睡足摩挲眼，眼前無一事。
信脚遶池行，偶然得幽致。
婆娑綠陰樹，斑駁青苔地。
此處置繩牀，傍邊洗茶器。
白瓷甌甚潔，紅爐炭方熾。
沫下麴塵香，花浮魚眼沸。
盛來有佳色，嚙罷餘芳氣。

不見楊慕集，誰人知此味。

題文集櫃

破柏作書櫃，櫃牢柏復堅。
收貯誰家集，題云白樂天。
我生業文字，自幼及老年。
前後七十卷，小大三千篇。
誠知終散失，未忍遽棄捐。
自開自鎖閉，置在書帷前。
身是鄧伯道，世無王仲宣。
只應分付女，畱與外孫傳。

早熱二首

彤雲散不雨，赫日吁可畏。
端坐猶揮汗，出門豈容易。
忽思公府內，青衫折要吏。
復想驛路中，紅塵走馬使。
征夫更辛苦，逐客彌顛頓。
日入尚趨程，宵分不遑寐。
安知北窗叟，偃臥風颯至。
簟拂碧龍鱗，扇搖白鶴翅。
豈唯身所得，兼示心無事。
誰言苦熱天，元有清涼地。

【二】

勃勃旱塵氣，炎炎赤日光。
飛禽颺將墜，行人渴欲狂。
壯者不耐飢，飢火燒其腸。
肥者不禁熱，喘急汗如漿。
此時方自悟，老瘦亦何妨。
肉輕足健逸，髮少頭清涼。
薄食不飢渴，端居省衣裳。
數匙梁飯冷，一領綃衫香。
持此聊過日，焉知畏景長。

偶作二首

戰馬春放歸。農牛冬歇息。何獨徇名人。終身役心力。來者殊未已。去者不知還。我今悟已晚。六十方退閒。猶勝不悟者。老死紅塵閒。

【二】

名無高與卑。未得多健羨。事無小與大。已得多厭賤。如此常自苦。反此或自安。此理知甚易。此道行甚難。勿信人虛語。君當事上看。

池上作 西溪南潭皆池中勝處也

西溪風生竹森森。南潭萍開水沈沈。

叢翠萬竿湘岸色。

空碧一泊松江心。

浦派縈廻誤遠近。

橋鳥向背迷登臨。

澄瀾方丈若萬頃。

倒影咫尺如千尋。

泛然獨遊逸然坐。

坐念行心思古今。

菟裘不聞有泉沼。

西河亦恐無雲林。

豈如白翁退老地。

樹高竹密池塘深。

華亭雙鶴白矯矯。

太湖四石青岑岑。

眼前盡日更無客。

膝上此時唯有琴。

洛陽冠蓋自相索。

誰肯來此同抽簪。

何處堪避暑

何處堪避暑。林閒背日樓。何處好追涼。

池上隨風舟。

日高飢始食。食竟飽還遊。

遊罷睡一覺。覺來茶一甌。

眼明見青山。

耳醒聞碧流。

脫襪閒濯足。解巾快搔頭。

如此來幾時。已過六七秋。

從心至百骸。

無一不自由。

抽退是其分。榮耀非所求。

雖被世閒笑。終無身外憂。此語君莫怪。靜思吾亦愁。如何三伏月。楊尹謫虔州。

詔下

昨日詔下去罪人。

今日詔下得賢臣。

進退者誰非我事。

世閒寵辱常紛紛。

我心與世兩相忘。

時事雖聞如不聞。

但喜今年飽飯喫。

洛陽禾稼如秋雲。

更傾一樽歌一曲。

不獨忘世兼忘身。

七月一日作

七月一日天。秋生履道里。閒居見清景。高興從此始。林閒暑雨歇。池上涼風起。橋竹碧鮮鮮。岸莎青靡靡。蒼然古盤石。清淺平流水。何言中門前。便是深山裏。雙僮侍坐臥。一杖扶行止。飢聞麻粥香。渴覺雲湯美。平生所好物。今日多在此。此外更何思。市朝心已矣。

開襟

開襟何處好。竹下池邊地。餘熱體猶煩。早涼風有味。黃萎槐藥結。紅破蓮芳墜。無奈每年秋。先來入衰思。

自賓客遷太子少傅分司

頭上漸無髮。耳閒新有毫。形容逐日老。官秩隨年高。優饒又加俸。閒穩仍分曹。

飲食免藜藿。居處非蓬蒿。何言家尚貧。銀槎提綠醪。勿謂身未貴。金章照紫袍。

自在

杲杲冬日光。明暖真可愛。移榻向陽坐。擁裘仍解帶。小奴搥我足。小婢搔我背。自問我爲誰。胡然獨安泰。安泰良有以。與君論梗槩。心了事未了。飢寒迫於外。事了心未了。念慮煎於內。我今實多幸。事與心和會。內外及中閒。了然無一礙。所以日陽中。向君言自在。

詠史 九年十一月作

秦磨利刀斬李斯。齊燒沸鼎烹鄒其。可憐黃綺入商洛。閒臥白雲歌紫芝。彼爲蘊醢机上畫。此作鸞鳳天外飛。去者逍遙來者死。乃知禍福非天爲。

因夢有悟

交友淪歿盡。悠悠勞夢思。平生所厚者。昨夜夢見之。夢中幾許事。枕上無多時。款曲數杯酒。從客一局棋。初見韋尚書。金紫何輝輝。中閒李侍郎。笑言甚怡怡。終爲崔常侍。意色苦依依。一夕三改變。夢心不驚疑。此事人盡怪。此理誰得知。我粗知此理。聞於竺乾師。誠行妄分別。智隱迷是非。若轉識爲智。菩提其庶幾。

春遊

上馬臨出門。出門復逡巡。回頭問妻子。應怪春遊頻。誠知春遊頻。其奈老大身。朱顏去復去。白髮新更新。請君屈十指。爲我數交親。大限年百歲。幾人及七旬。我今六十五。走若下阪輪。假使得七十。祇有五度春。逢春不遊樂。但恐是癡人。

題天竺南院贈開元晏清四上人

雜芳閒草合。繁綠巖樹新。山深景候晚。四月有餘春。竹寺過微雨。石逕無纖塵。白衣一居士。方袍四道人。地是佛國土。人非俗交親。城中山下別。相送亦殷勤。

哭師阜

南康丹旆引魂廻。洛陽籃輿送葬來。北邙原邊草樹畔。月苦煙愁夜過半。妻孥兄弟號一聲。十二人腸一時斷。往者何人送者誰。樂天哭別師阜時。平生分義向人盡。今日哀冤唯我知。我知何益徒垂淚。籃輿迴竿馬廻轡。何日重聞掃市歌。誰家收得琵琶妓。師阜醉後善歌掃市詞。又有小妓工琵琶。不知今落在何處。蕭蕭風樹白楊影。蒼蒼露草青蒿氣。更就墳邊哭一聲。與君此別終天地。

隱几贈客

宦情本淡薄。年貌又老醜。紫綬與金章。於予亦何有。有時獨隱几。蒼然無所偶。

臥枕一卷書。起嘗一杯酒。書將引昏睡。酒用扶衰朽。客到忽已酣。脫巾坐搖首。疎頑倚老病。容恕慙交友。忽思莊生言。亦擬鞭其後。

夏日作

葛衣疎且單。紗帽輕復寬。一衣與一帽。可以過炎天。止於便吾體。何必被羅紈。宿雨林笋嫩。晨露園葵鮮。烹葵炮嫩笋。可以備朝餐。止於適吾口。何必餽腥羶。飯訖盥漱已。捫腹方果然。婆婆庭前步。安穩窗下眠。外養物不費。內歸心不煩。不費用難盡。不煩神易安。庶幾無天闕。得以終天年。

晚涼偶詠

日下西墻西。風來北窗北。中有逐涼人。單牀獨棲息。飄蕭過雲雨。搖曳歸飛翼。新葉多好陰。初筠有佳色。幽深小池館。優穩閒官職。不愛勿復論。愛亦不易得。

酬牛相公宮城早秋寓言見示兼呈夢得

七月中氣後。金與火交爭。一聞白雪唱。著退清風生。碧樹未搖落。寒蟬始悲鳴。夜涼枕簟滑。秋燥衣巾輕。疏受老慵出。劉楨疾未平。何人伴公醉。新月上宮城。

小臺晚坐憶夢得

汲泉灑小臺。臺上無纖埃。解帶面西坐。輕襟隨風開。晚涼閒興動。憶同傾一杯。

月明候柴戶。藜杖何時來。

種桃歌

食桃種其核。一年核生芽。二年長枝葉。三年桃有花。憶昨五六歲。灼灼盛芬華。迨茲八九載。有減而無加。去春已稀少。今春漸無多。明年後年後。芳意當如何。命酒樹下飲。停杯拾餘葩。因桃忽自感。悲吒成狂歌。

狂言示諸姪

世欺不識字。我忝攻文筆。世欺不得官。我忝居班秩。人老多病苦。我今幸無疾。人老多憂累。我今婚嫁畢。心安不移轉。身泰無牽率。所以十年來。形神閒且逸。況當垂老歲。所要無多物。一裘煖過冬。一飯飽終日。勿言舍宅小。不過寢一室。何用鞍馬多。不能騎兩匹。如我優幸身。人中十有七。如我知足心。人中百無一。傍觀愚亦見。當已賢多失。不敢論他人。狂言示諸姪。

偶以拙詩數首寄呈裴少尹侍郎蒙以盛製四篇一時酬和重投長句美而謝之。

投君之文甚荒蕪。數篇價值一束芻。報我之章何璀璨。纍纍四貫矚龍珠。毛詩三百篇後得。文選六十卷中無。一麋麗龜絕報賽。五鹿連柱難支梧。高興獨因秋日盡。清吟多與好風俱。銀鈎金錯兩殊重。宜上屏風張座隅。